

MESYUARAT KEDUA, PENGGAJAL KELIMA
PARLIMEN KEEMPAT BELAS
2022

HARI RABU : 20 JULAI 2022

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 5, 7, 10 HINGGA NO. 130)**

**[SOALAN NO. 5 DIJAWAB BERSEKALI DENGAN
SOALAN NO. 25 DAN 39]**

**[SOALAN NO. 7 DIJAWAB BERSEKALI DENGAN
SOALAN NO. 23]**

NOTA : [RUJUK PENYATA RASMI HARIAN (HANSARD)]

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK WILSON UGAK ANAK KUMBONG
[HULU RAJANG]**

TARIKH : 20 JULAI 2022 (RABU)

SOALAN

**Datuk Wilson Ugak Anak Kumbong [Hulu Rajang] minta MENTERI
KOMUNIKASI DAN MULTIMEDIA menyatakan:**

- (a) bilangan dan lokasi menara-menara telekomunikasi yang terkini dan yang baharu akan dibina di kawasan Parlimen Hulu Rajang; dan
- (b) status terkini pelaksanaan inisiatif JENDELA di kawasan Parlimen Hulu Rajang.

JAWAPAN

Tuan Yang di-Pertua,

Saya mohon untuk menjawab pertanyaan YB Hulu Rajang bersekali dengan pertanyaan yang dikemukakan oleh YB Baram, No. Soalan 25 dan YB Igan, No. Soalan 39 juga pada 20 Julai 2022.

Kementerian sentiasa memberikan tumpuan kepada penambahbaikan perkhidmatan komunikasi termasuk melaksanakan rancangan jangka panjang dan jangka pendek dengan melaksanakan beberapa inisiatif dalam menghasilkan sebuah rancangan yang dapat menangani isu akses kepada internet berkualiti terutamanya di kawasan luar bandar termasuk di negeri Sarawak. Untuk makluman Ahli Yang Berhormat, anggaran kos bagi pelaksanaan program Pelan Jalinan Digital Negara (JENDELA) Fasa 1 di Sarawak adalah sebanyak RM4.09 bilion.

Perkembangan Pelan Jalinan Digital Negara (JENDELA) Fasa 1 setakat suku pertama 2022 adalah seperti berikut:

Inisiatif	Tapak Menara Baharu		Naik Taraf Stesen Pemancar		Premis Tersedia Gentian Optik		Jalur Lebar Satelit	
	Siap	Dalam Pelaksanaan	Siap	Dalam Pelaksanaan	Siap	Dalam Pelaksanaan	Siap	Dalam Pelaksanaan
Sarawak	85	741	2,933	247	78,262	29,914	523	-
Hulu Rajang	0	59	38	12	-	118	124	-
Baram	1	110	49	15	-	569	101	-
Igan	5	8	36	9	-	466	2	-

Kesemua inisiatif ini masih dalam peringkat pelaksanaan dan dijangka siap secara berperingkat menjelang penghujung tahun 2023. Peratusan liputan 4G di kawasan berpenduduk di Sarawak telah meningkat kepada 84.24% pada suku pertama 2022 berbanding 73.67% sebelum pelaksanaan JENDELA manakala liputan di Parlimen Hulu Rajang, Baram dan Igan adalah seperti berikut:

SOALAN NO: 5

Parlimen	Liputan Jalur Lebar 4G di Kawasan Berpenduduk	
	Sebelum JENDELA (Q2 2020)	Terkini (Q1 2022)
Hulu Rajang	11.21%	21.56%
Baram	25.97%	35.34%
Igan	72.75%	74.16%

Selain itu, usaha penambahbaikan rangkaian akan diteruskan untuk memberikan kualiti pengalaman yang lebih baik kepada pengguna.

Menjawab pertanyaan YB Igan, sehingga kini terdapat lima lokasi WiFi Komuniti di Parlimen Igan iaitu di PEDi Igan, PEDi Kg Hilir, PEDi Kg Tian, Rh Fatimah dan Rh Hj Suhaili. Selain itu, terdapat dua lokasi yang disediakan dengan jalur lebar satelit iaitu di Rh Sandom dan Kg Muara Sawai.

Pelaksanaan JENDELA akan terus digiatkan bagi memastikan impak pelaksanaannya dapat diterima dengan cepat oleh rakyat. Ini termasuklah mengkaji semula secara berkala sasaran-sasaran awal yang telah ditetapkan sebelum ini seperti bilangan menara baharu yang akan dibina, stesen pemancar yang dinaiktarafkan serta premis-premis yang mendapat akses gentian optik bagi memastikan keperluan rakyat sentiasa diutamakan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK WIRA DR. MOHD HATTA BIN
MD. RAMLI [LUMUT]**

TARIKH : 20 JULAI 2022 (RABU)

SOALAN

DATUK WIRA DR. MOHD HATTA BIN MD. RAMLI [LUMUT] minta **MENTERI PELANCONGAN, SENI DAN BUDAYA** menyatakan kejayaan usaha-usaha yang telah dilaksanakan Kementerian bagi membantu pemain-pemain industri di Pangkor Pulau Bebas Cukai meningkatkan prestasi mereka.

JAWAPAN

Tuan Yang di-Pertua,

1. Kementerian Pelancongan, Seni dan Budaya (MOTAC) memang sentiasa komited dalam mempromosikan sektor pelancongan negara secara aktif. Pelbagai inisiatif telah dilaksanakan dan dirancang bagi membantu pemain-pemain industri di Negeri Perak, termasuk di Pulau Pangkor bagi meningkatkan aktiviti dan pendapatan pelancongan di kawasan tersebut.

2. Antara insiatif yang dilaksanakan termasuklah:

- (i) Penganjuran Program Jerayawara untuk geran-geran di bawah Pakej Rangsangan Ekonomi (PRE 2.0) iaitu Geran Sepadan Sektor Pelancongan (GSSP) dan Geran Sepadan Galakan Melancong Malaysia (GAMELAN). Untuk Negeri Perak, program ini telah dianjurkan pada 28 Mac 2022 lalu yang telah dihadiri oleh lebih 150 penggiat industri pelancongan di Negeri Perak, termasuk dari Pulau Pangkor;

Hasil daripada pengetahuan tentang insiatif GSSP ini, banyak pihak telah mengemukakan permohonan untuk mendapatkan geran sepadan ini bagi menganjurkan program-program yang boleh menjana pendapatan pelancongan. Untuk Negeri Perak sahaja, MOTAC telah meluluskan beberapa cadangan penganjuran program-program berkaitan pelancongan, dengan dana sepadan bernilai lebih RM1.2 juta.

Penganjuran acara-acara ini akan menarik kehadiran pelancong dan seterusnya akan meningkatkan permintaan kepada produk pelancongan serta memberi limpahan ekonomi kepada sektor pelancongan di tempat itu dan juga kawasan sekitarnya.

SOALAN NO : 10

- (ii) Melaksanakan program-program suaikenal produk pelancongan di Negeri Perak kepada pengamal media dan agensi pelancongan dari seluruh negara bagi mendapatkan publisiti yang optimum. Antaranya, baru-baru ini telah diadakan 'Program *'Northern Region Fruits Galore'* dan program suaikenal media Pulau Pangkor. *Product update* ini boleh memberi maklumat terkini tentang pembaharuan produk sedia ada dan juga pengenalan kepada produk pelancongan baharu, untuk diuar-uarkan kepada umum;
- (iii) Penganjuran seminar dan bengkel bersama para penggiat industri pelancongan Wilayah Utara di Ipoh, Perak yang melibatkan seramai 150 orang penggiat industri pelancongan di wilayah utara, termasuk dari Pulau Pangkor;
- (iv) Mengadakan program *'Networking Session with Industry Players'* Wilayah Utara di Negeri Pulau Pinang, Perak, Perlis dan Kedah dalam usaha memperkenalkan produk-produk baharu di negeri-negeri wilayah utara. Program ini juga telah menjadi platform bagi pemain industri pelancongan yang terdiri daripada hotel, pemilik produk dan agensi pelancongan untuk bertukar pendapat dan menjalinkan jaringan dan kerjasama baharu;
- (v) Membawa masuk krew-krew penggambaran televisyen untuk membuat liputan serta membuat penggambaran di Pulau Pangkor dan mempromosi produk pelancongan tempat tersebut. Sebagai contoh, Penggambaran Program *'Travelog Gastronomic Trail of Malaysia'* pada 25-26 Februari 2022 oleh stesen televisyen tempatan;
- (vi) Bekerjasama dengan agensi-agensi pelancongan dan hotel-hotel di Pulau Pangkor dalam mengemaskini pakej-pakej pelancongan sedia ada serta menghasilkan pakej-pakej khas yang lebih menarik;

SOALAN NO : 10

- (vii) Menjemput dan melibatkan pemain industri pelancongan dari Pulau Pangkor dalam *Jom Cuti-Cuti Malaysia Roadshow* di beberapa bandar utama di Malaysia bagi tahun 2022. Ini adalah platform kepada para pemain industri pelancongan tersebut untuk menjual terus pakej pelancongan dan produk kepada pengguna;
- (viii) Menambah penyertaan agensi-agensi pelancongan daripada Pulau Pangkor dalam pameran-pameran pelancongan utama dalam negara seperti dalam *MATTA Fair Perak* di Ipoh Convention Centre (ICC) dan *Malaysia International Travel Mart* (MITM) di SPICE Arena Pulau Pinang; dan
- (ix) Penyebaran maklumat pelancongan di Pulau Pangkor yang lebih meluas terutamanya secara atas talian di laman sesawang *www.malaysia.travel*, media sosial rasmi Tourism Malaysia dan *influencers* serta *e-brochure*.

3. Selain itu, MOTAC juga telah menjalankan kerja-kerja menyelenggara dan menaik taraf infrastruktur pelancongan di Pulau Pangkor seperti berikut:

- (i) Projek Naik Taraf Galeri Pangkor dan Kemudahan Pelancongan di Dataran Nelayan Pulau Pangkor, Perak di bawah Peruntukan *Rolling Plan* Ke-2, Rancangan Malaysia Kedua Belas dengan jumlah peruntukan sebanyak RM2juta; dan
- (ii) Projek Menyelenggara Pusat Pelancongan Di Kota Belanda Pulau Pangkor Untuk Majlis Perbandaran Manjung bernilai RM82,000 di bawah Peruntukan Kerja-Kerja Pemulihan, Pemuliharaan, Ubah Suai Dan Naik Taraf Tahun 2022.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB TUAN SYED IBRAHIM BIN SYED NOH
(LEDANG)**

TARIKH : 19 JULAI 2022 (SELASA)

SOALAN

TUAN SYED IBRAHIM BIN SYED NOH (LEDANG) minta **MENTERI DALAM NEGERI** menyatakan situasi permasalahan proses permohonan dan penerimaan pasport baru-baru ini serta langkah yang telah diambil bagi menangani isu berkenaan.

JAWAPAN

Tuan Yang Di Pertua,

Untuk makluman Ahli Yang Berhormat, permasalahan bagi pembaharuan pasport adalah disebabkan oleh pembukaan pintu sempadan dan dalam masa yang sama panggilan menunaikan Haji kepada yang layak.

Kementerian bersama Jabatan Imigresen Malaysia (JIM) telah mengambil inisiatif bagi permohonan pasport baru dan pembaharuan pasport boleh dilaksanakan secara dalam talian melalui portal MyIMMS. Justeru, bagi pemohon yang ingin membuat permohonan pasport baru atau pembaharuan pasport boleh memohon secara dalam talian dan membuat kutipan pasport di Jabatan Imigresen Malaysia yang terdekat. Walau bagaimanapun bagi permohonan pembaharuan Pasport Malaysia Antarabangsa (PMA), Pejabat Pasport Putrajaya hanya akan memproses permohonan yang dibuat di atas talian dan hanya pemohon yang telah menerima notifikasi melalui e-mel sahaja akan diberi perkhidmatan.

Sehubungan dengan itu, JIM juga telah mengambil langkah-langkah untuk mengatasi kesulitan yang dihadapi oleh rakyat Malaysia bagi mendapatkan PMA seperti berikut:

- i. memansuhkan Sistem Temujanji Online (STO) bagi semua pejabat pengeluar pasport di luar Lembah Klang mulai 9 Mei 2022;
- ii. memansuhkan STO bagi semua pejabat pengeluar pasport di WP Kuala Lumpur, Selangor, Johor Bahru, Negeri Sembilan dan Melaka mulai 16 Mei 2022. Pemohon yang telah menerima tarikh temu janji melalui STO mulai 16 Mei 2022 tidak perlu lagi mematuhi tarikh yang diberikan;
- iii. semua pejabat pengeluar pasport di WP Kuala Lumpur, Selangor, WP Putrajaya, Johor Bahru, Negeri Sembilan dan Melaka akan beroperasi

pada hari Sabtu mulai jam 8:00 pagi hingga 1:00 petang bermula pada 14 Mei 2022; dan

- iv. waktu pengoperasian kaunter UTC di WP Kuala Lumpur, Selangor dan Johor Bahru akan dipanjangkan sehingga jam 10:00 malam bermula pada 16 Mei 2022.

JIM telah menyediakan perkhidmatan permohonan PMA tanpa melalui STO seperti di Putrajaya di mana semua permohonan di bawah kategori baharu, warga emas, OKU, pelajar, kanak-kanak dan pemohon yang akan menunaikan haji boleh terus hadir ke kaunter.

Untuk makluman Ahli Yang Berhormat, jumlah pengeluaran pasport yang telah dikeluarkan sejak 1 Januari 2022 sehingga 15 Julai 2022 adalah sebanyak 1,116,730 manakala jumlah permohonan bermula daripada pembukaan sempadan sejak 1 April 2022 sehingga 15 Julai adalah sebanyak 803,011.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

DARIPADA : TUAN M. KULASEGARAN [IPOH BARAT]

TARIKH : 19 JULAI 2022 (SELASA)

SOALAN

TUAN M. KULASEGARAN [IPOH BARAT] minta **MENTERI SUMBER MANUSIA** menyatakan sebab Kerajaan hanya memilih 25 syarikat untuk pengambilan pekerja Bangladesh dan tidak berbuat demikian dengan negara sumber yang lain.

JAWAPAN

Tuan Yang di-Pertua,

Migrasi adalah merupakan isu global dan kompleks yang perlu ditangani secara berhemah. Terdapat banyak faktor yang berkaitan dengan migrasi termasuk jenayah pemerdagangan orang. Negara pada masa ini diletakkan di dalam kedudukan yang rendah (Tahap 3) bagi penilaian Laporan Tahunan Pemerdagangan Orang yang dikeluarkan oleh Jabatan Negara Amerika Syarikat.

Laporan ini secara konsisten telah menyatakan mengenai kos pengambilan yang tinggi bagi kemasukan warga Bangladesh ke Malaysia. Sebagai contohnya, sebuah syarikat berkaitan Kerajaan telah diminta untuk membayar semula kepada pekerja-pekerja warga Bangladesh kos pengambilan yang dikenakan terhadap mereka.

Sehubungan itu, Kerajaan perlu menangani isu yang dibangkitkan ini dan menghadkan bilangan agensi pengambilan dari Bangladesh adalah

SOALAN NO : 12

merupakan salah satu daripada langkah bagi menangani eksploitasi buruh dan buruh paksa yang berkait dengan pengambilan pekerja daripada negara sumber khususnya Bangladesh.

Malaysia menyokong sepenuhnya inisiatif Pertubuhan Buruh Antarabangsa (ILO) mengenai pengambilan pekerja warga asing secara adil dan beretika daripada negara sumber terutamanya dalam menangani elemen buruh paksa termasuk memastikan kos yang minima kepada pekerja terbabit.

Keputusan Kerajaan Malaysia untuk meningkatkan jumlah agensi pekerjaan Bangladesh daripada 10 kepada 25 merupakan satu pendekatan yang wajar. Ini mengambil kira tumpuan yang diberikan oleh Jabatan Negara Amerika Syarikat bagi pengambilan pekerja daripada negara tersebut. Justeru itu, langkah sebegini perlu diambil oleh Malaysia bagi menangani kebimbangan mengenai perkara ini. Keputusan untuk menghadkan jumlah agensi pekerjaan Bangladesh dalam proses pengambilan merupakan salah satu tindakan pencegahan dalam membendung permasalahan buruh paksa.

Proses pengambilan bagi pekerja warga Bangladesh adalah berdasarkan obligasi yang dinyatakan di bawah Memorandum Persefahaman (MoU) yang telah ditandatangani oleh kedua negara. Malahan, ianya telah dibincangkan secara terperinci sebelum MoU tersebut dimuktamadkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK ROBERT LAWSON CHUAT
[BETONG]**

TARIKH : 19.07.2022 (SELASA)

SOALAN

Datuk Robert Lawson Chuat [Betong] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan peranan dan program Kementerian dalam membantu produk PKS tempatan dapat dipasarkan di pasaraya besar (*hypermart*) dan adakah Kementerian akan memanjangkan bantuan dan sokongan ini kepada PKS dan usahawan di negeri Sarawak.

JAWAPAN

Tuan Yang di-Pertua,

Kementerian Perdagangan Dalam Negeri dan Hal Ehwal Pengguna (KPDNHEP) melaksanakan beberapa program bagi memudahcara penembusan dan peluasan pasaran produk PKS tempatan, khususnya di peringkat pasar raya besar asing dan tempatan. Antara program promosi produk PKS tempatan yang sedang dan pernah dilaksanakan adalah Program Citarasa Malaysia, Program Pembangunan Produk, Program *Sampling* dan *Merchandising* serta Program Padanan Perniagaan.

Program-program promosi produk PKS tersebut dianjurkan oleh pihak Kementerian dengan kerjasama pasar raya besar tempatan dan asing seperti Mydin, AEON, AEON Big, Lotuss dan Giant. Kerjasama strategik antara KPDNHEP dan pihak pasar raya besar merupakan kunci kepada usaha berterusan Kementerian dalam membantu usahawan-usahawan PKS tempatan untuk menembusi pasaran pasar raya besar di Malaysia dan seterusnya mampu meningkatkan peratusan *Stock Keeping Unit* (SKU) jenama PKS tempatan di pasar raya besar di Malaysia.

Selain itu, pelaksanaan Kempen Beli Barangan Malaysia dengan kerjasama sektor peruncitan turut memberikan manfaat kepada jenama PKS tempatan terutamanya dalam penembusan ke pasar raya besar asing dan tempatan.

Pelaksanaan program-program anjuran KPDNHEP adalah bersifat menyeluruh iaitu tidak ketinggalan penglibatan usahawan PKS daripada Sarawak. Pada tahun ini, penganjuran program adalah di seluruh negara dan penetapan lokasi Program Padanan Perniagaan adalah mengikut zon termasuk Sabah dan Sarawak. Pelawaan penyertaan program adalah terbuka kepada semua usahawan dan tidak terhad kepada lokaliti.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN AHMAD FAHMI BIN MOHAMED
FADZIL [LEMBAH PANTAI]**

TARIKH : 20 JULAI 2022 (RABU)

SOALAN

Tuan Ahmad Fahmi bin Mohamed Fadzil [Lembah Pantai] minta **MENTERI KOMUNIKASI DAN MULTIMEDIA** menyatakan bagaimana 100 juta set data peribadi dapat ditiris atau dibocorkan sejak 2017 serta langkah-langkah Kementerian bagi membawa mereka yang bersalah ke muka pengadilan.

JAWAPAN

Tuan Yang di-Pertua,

Kementerian Komunikasi dan Multimedia Malaysia (K-KOMM) melalui Jabatan Perlindungan Data Peribadi (JPDP) adalah bertanggungjawab mengawal selia pemprosesan data peribadi dalam transaksi komersial berdasarkan bidang kuasa yang termaktub di bawah Akta Perlindungan Data Peribadi 2010 [Akta 709]. Bagi data yang melibatkan Kerajaan Persekutuan dan Kerajaan Negeri, Agensi Keselamatan Siber Negara (NACSA) di bawah Majlis Keselamatan Negara (MKN) adalah bertanggungjawab untuk mengawal selia data-data tersebut yang merupakan Infrastruktur Maklumat Kritikal Nasional (*critical national information infrastructure* - CNII) melalui Arahan MKN 26. Dalam hal ini, insiden kebocoran data yang berunsurkan jenayah akan dirujuk kepada NACSA dan Polis Diraja Malaysia (PDRM).

Dalam hal ini, bagi transaksi komersial, kegagalan mematuhi prinsip-prinsip di bawah Akta Perlindungan Data Peribadi 2010 [Akta 709], jika disabitkan kesalahan, boleh membawa kepada denda tidak melebihi RM500,000 atau hukuman penjara tidak melebihi tiga tahun atau kedua-duanya sekali.

JPDP selaku badan kawal selia yang menguatkuasakan Akta 709, sentiasa mengambil pelbagai langkah untuk meningkatkan kesedaran mengenai Akta 709 untuk menjamin keselamatan data peribadi dalam transaksi komersial di Malaysia. Pelbagai program *outreach* seperti Persidangan Perlindungan Data Peribadi, webinar, sesi konsultasi dan khidmat nasihat serta program kolaborasi di serata negara giat dilaksanakan termasuklah program di kawasan luar bandar bagi mendidik usahawan-usahawan tempatan untuk meningkatkan kefahaman mengenai kepentingan melindungi data peribadi.

Suruhanjaya Komunikasi dan Multimedia Malaysia (SKMM) juga mengeluarkan nasihat awam mengenai ancaman-ancaman terbaru yang perlu diberikan perhatian oleh orang ramai dan melaksanakan program advokasi dan kesedaran pengguna. Antaranya seperti memastikan ciri-

ciri keselamatan seperti menggunakan kata laluan yang sukar dibuka dan mengaktifkan pengesahan dua langkah (*2-Factor Authentication*).

JPDP juga turut melibatkan pihak industri dalam membangunkan Kod Tata Amalan (KTA) Perlindungan Data Peribadi yang perlu dipatuhi oleh pihak industri bagi memastikan kebolehlaksanaan dan kelancaran prosedur berkaitan pemprosesan data peribadi terutama dari sudut perundangan sedia ada satu-satu sektor dan seterusnya menjamin keselamatan data tersebut.

Pemeriksaan ke atas sistem data peribadi pengguna data seperti yang diperuntukkan di bawah Seksyen 101 dan Seksyen 48 Akta 709 juga dilaksanakan selain menjalinkan kerjasama erat dengan agensi Kerajaan yang berkepentingan seperti NACSA dan PDRM bagi melaksanakan penguatkuasaan dan siasatan berterusan ke atas kes-kes kebocoran dan penjualan data peribadi.

Pihak K-KOMM melalui JPDP juga telah membuat cadangan pindaan Akta 709 perkara ini adalah di dalam tindakan Jabatan Peguam Negara. Antara perkara-perkara yang akan dipinda adalah termasuk:

- (i) Mewajibkan semua pengguna data melantik *Data Protection Officer*,
- (ii) Memperkenalkan *Data Breach Notification* yang mewajibkan semua pengguna data untuk melaporkan kebocoran data kepada Pesuruhjaya JPDP dalam tempoh 72 jam; dan
- (iii) Mewajibkan *Data Processor* untuk patuh kepada prinsip keselamatan di bawah Akta 709.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI MOHD. SALIM SHARIF
[JEMPOL]**

TARIKH : 19.07.2022 (SELASA)

SOALAN

Datuk Seri Haji Mohd. Salim Sharif [Jempol] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan status semasa cadangan untuk memperkenalkan lesen khas perniagaan dalam talian sebagai langkah melindungi pengguna daripada menjadi mangsa penipuan jual beli di platform tersebut.

JAWAPAN

Tuan Yang di-Pertua,

Cadangan untuk memperkenalkan lesen khas perniagaan atas talian masih di peringkat awal kajian dalam semua aspek berkaitan peniaga, perlindungan pengguna dan pemantauan dapat dilaksanakan secara berkesan. Pada masa yang sama, Kementerian mewajibkan peniaga yang menjalankan perniagaan atas talian berdaftar dengan Suruhanjaya Syarikat Malaysia (SSM) di bawah Seksyen 2, Akta Pendaftaran Perniagaan 1956 (Akta 197), dimana peniaga perlu memaparkan 8 perkara utama sepertimana berikut:

1. Nama – Individu/perniagaan/syarikat;
2. Nombor pendaftaran perniagaan/syarikat;
3. Emel, no telefon atau alamat perniagaan;
4. Perihal ciri-ciri utama barangan atau perkhidmatan;

5. Harga penuh termasuk kos penghantaran, pengangkutan, cukai atau kos-kos lain;
6. Kaedah pembayaran;
7. Terma dan syarat; dan
8. Anggaran masa penghantaran.

Ini adalah bagi memastikan langkah melindungi pengguna terpelihara dan kegagalan peniaga untuk mematuhi 8 perkara tersebut akan diambil tindakan penguatkuasaan selaras dengan Peraturan-Peraturan Perlindungan Pengguna (Urus Niaga Perdagangan Elektronik) 2012.

Kementerian juga sentiasa menjalankan program advokasi, memberikan panduan, tips dan kaedah yang seharusnya diikuti oleh pengguna dalam membuat sebarang pembelian atas talian. Pemantauan dan penguatkuasaan secara berterusan ke atas aktiviti perniagaan atas talian terus dilaksanakan oleh Kementerian bagi memastikan pengguna dilindungi daripada menjadi mangsa penipuan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : TUAN MUHAMMAD BAKHTIAR
BIN WAN CHIK [BALIK PULAU]**

TARIKH : 19 JULAI 2022 (SELASA)

SOALAN

Tuan Muhammad Bakhtiar Bin Wan Chik [Balik Pulau] minta **MENTERI BELIA DAN SUKAN** menyatakan langkah intervensi antara Kementerian bagi mengelakkan lambakan remaja yang hanya tertumpu pada ekonomi gig memandangkan had umur penunggang motosikal p-hailing daripada 21 ke 18 tahun.

JAWAPAN

Tan Sri Yang Di Pertua,

Untuk makluman Ahli Yang Berhormat, Kementerian Belia dan Sukan (KBS) sentiasa komited untuk meneruskan agenda pemerkasaan belia. Dalam menangani isu lambakan remaja yang berumur 18 hingga 21 tahun dalam industri p-hailing, Kementerian ini dengan kerjasama rentas Kementerian, agensi awam mahupun swasta menawarkan kursus atau latihan kemahiran jangka pendek yang boleh menjana sumber pendapatan melalui pendidikan dan latihan teknikal dan vokasional (TVET) di 22 buah Institusi Latihan Kemahiran Belia dan Sukan (ILKBS) di seluruh negara sama ada secara sepenuh masa atau latihan kemahiran jangka pendek.

SOALAN NO : 16

Antara program-program yang dilaksanakan adalah seperti berikut :

- i. Program Latihan Kemahiran Secara Intensif Dengan Kerjasama Industri iaitu Bootcamp KBS
- ii. STAR@U
- iii. Program Skim Latihan Dual Nasional (SLDN), Inisiatif-Inisiatif Di Bawah Pembangunan Sumber Manusia Berhad (HRD Corp), Serta Kursus Modular Yang Dirangka Khas
- iv. Program Pembangunan TVETpreneur: Program Makerspace Mybizhub@ILKBS dan Inkubator@ILKBS
- v. Projek MyAgro Future@ILKBS
- vi. Program *Skill For Youth* (S4Y) 2022

Semua inisiatif ini dilaksanakan bertujuan untuk memberi dan meningkatkan kemahiran belia dalam bidang-bidang yang boleh menjana sumber pendapatan melalui latihan kemahiran jangka masa pendek dan jangka masa panjang.

Selain itu juga, dalam usaha membantu menangani masalah lambakan remaja yang tertumpu pada ekonomi gig. Kementerian ini melalui Jabatan Belia dan Sukan Negara telah mendaftarkan seramai 2,676 orang belia untuk menyertai program MyGig Servis dan 1,009 daripadanya telah mendapat peluang pekerjaan. Selain dari itu seramai 1,872 orang belia telah mendaftar untuk program MyGig Digital Freelance dan 1037 telah mendapat peluang pekerjaan. Kementerian telah melaksanakan beberapa inisiatif seperti berikut: -

- i. Program *Youth Career* (Y-Career)
- ii. Program Ekonomi Digital

iii. Program MyPreneur

iv. Program Webinar Jom Cipta Kerjaya

KBS juga sentiasa peka dan amat prihatin untuk membantu para belia untuk meningkatkan kemahiran atau menjana pendapatan melalui teknologi digital. Berlandaskan kepada kesedaran tersebut, KBS turut menganjurkan beberapa siri kursus dengan kerjasama pihak universiti dan Institut Latihan Kemahiran Awam bagi meningkatkan kemahiran insaniah graduan termasuk kemahiran digital. Kursus Career Starter for Youth (CS4Y) mendedahkan peserta dengan penciptaan pekerjaan seperti startup dan digital pemasaran.

Diharapkan semua inisiatif ini dapat melengkapkan anak-anak muda dalam usaha pemerkasaan belia dalam sektor ekonomi dalam meningkatkan pembabitan golongan muda dalam arus perdana pembangunan TVET negara.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : TUAN ANYI NGAU [BARAM]

TARIKH : 19 JULAI 2022 (SELASA)

SOALAN

TUAN ANYI NGAU [BARAM] minta **MENTERI KESIHATAN** menyatakan status permohonan pembinaan kemudahan Hospital Long Lama dan status pelaksanaan kerja baik pulih Klinik Kesihatan Long Lama yang terjejas akibat tanah runtuh.

JAWAPAN

Tuan Yang di-Pertua,

1. Kementerian Kesihatan Malaysia (KKM) sentiasa mengkaji keperluan perkhidmatan kesihatan bagi penduduk di Negeri Sarawak, termasuk di kawasan Long Lama yang terletak di Daerah Telang Usan, Bahagian Miri. Pada masa ini, penduduk Long Lama yang mempunyai populasi seramai 7,658 orang mendapatkan perkhidmatan kesihatan di Klinik Kesihatan Long Lama dan Hospital Miri.
2. Kementerian mengambil maklum akan kedudukan Long Lama yang jauh daripada Hospital Miri. Sehubungan itu, antara pendekatan yang diambil adalah dengan menambah baik penyampaian perkhidmatan kesihatan di kawasan tersebut melalui peningkatan prasarana Klinik Kesihatan Long Lama yang lebih komprehensif seperti:

- (i) *sick bay* untuk pemerhatian pesakit;

- (ii) bilik bersalin; dan
- (iii) perkhidmatan diagnostik makmal perubatan.

3. Inisiatif ini dapat menambah baik akses penduduk luar bandar kepada perkhidmatan kesihatan yang lebih lengkap tanpa keperluan pembinaan sebuah hospital yang akan mengambil masa dan kos yang tinggi. Selain itu, purata kehadiran pesakit ke Klinik Kesihatan Long Lama adalah seramai 111 orang sehari.

4. Selain itu, projek pembinaan Klinik Kesihatan Long San berserta kuarters yang terletak di Daerah Telang Usan telah pun diluluskan dalam *Rolling Plan* Ke-4, Rancangan Malaysia Ke-11 (tahun 2020) dan dijangka akan ditender pada April 2023.

Tuan Yang di-Pertua,

5. Klinik Kesihatan Long Lama buat masa ini beroperasi secara sementara di Dewan Masyarakat Long Lama kerana masalah mendapan tanah di tapak Klinik Kesihatan Long Lama. Kerja pembaikan cerun dan mendapan tanah di Klinik Kesihatan Long Lama telah siap sepenuhnya pada 4 Januari 2021. Kerja pembaikan ini merupakan langkah jangka pendek bagi mengelakkan daripada kejadian tanah runtuh berulang.

6. Tender bagi kerja-kerja pembaikan jangka panjang pula telah dikeluarkan oleh Jabatan Kerja Raya (JKR) Sarawak pada 12 Mei 2022 dan pelantikan kontraktor dijangka pada bulan September 2022. Tempoh pembinaan dijangka mengambil masa 12 bulan.

7. Kerja-kerja pembaikan Klinik Kesihatan Long Lama yang membabitkan bangunan klinik akan bermula setelah kerja-kerja pembaikan cerun dan mendapan tanah siap sepenuhnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : PUAN NURUL IZZAH BINTI ANWAR
[PERMATANG PAUH]**

TARIKH : 19.7.2022 (SELASA)

SOALAN

Puan Nurul Izzah Binti Anwar [Permatang Pauh] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan alasan Suruhanjaya Syarikat Malaysia (SSM) memberi kelulusan kepada syarikat untuk menjual skim - skim pelaburan walaupun tidak mendapat kelulusan Suruhanjaya Sekuriti Malaysia dan Bank Negara di bawah Akta Pasaran Modal dan Perkhidmatan.

JAWAPAN

Tuan Yang di-Pertua,

Suruhanjaya Syarikat Malaysia (SSM) adalah agensi pengawal selia skim-skim pelaburan yang diperuntukkan di bawah Akta Skim Kepentingan 2016 (dahulunya di bawah Akta Syarikat 1965 yang kini telah dimansuhkan).

Skim kepentingan merupakan satu kaedah pelaburan untuk pemilikan sejenis kelas aset alternatif iaitu kepentingan dalam mana-mana kemudahan rekreasi, perkhidmatan, hasil atau keuntungan daripada mana-mana aktiviti perusahaan (enterprise) **yang bukan** merupakan saham, debentur atau lain-lain aset yang hakmiliknya boleh didaftarkan, contohnya geran hakmilik tanah, daftar paten, hakcipta dagang dan sebagainya.

Skim pelaburan yang didaftarkan atau diluluskan di bawah Akta Skim Kepentingan tidak perlu mendapat kelulusan atau tertakluk kepada undang-undang yang dikawal selia oleh Bank Negara Malaysia dan Suruhanjaya Sekuriti.

Kepentingan yang didaftarkan di bawah kerangka perundangan skim kepentingan (sebelum ini seksyen 84, Akta Syarikat 1965, manakala sekarang di bawah seksyen 2, Akta Skim Kepentingan 2016) dikecualikan daripada kawal selia di bawah Jadual ke 2, Akta Perkhidmatan Kewangan 2013, dan seksyen 4, Akta Pasaran Modal dan Perkhidmatan 2007.

Sehingga 93% nilai skim kepentingan yang didaftarkan oleh SSM melibatkan skim pelaburan atau pemilikan aset alternatif tanpa pulangan kewangan, contohnya skim kongsi masa, skim taman peringatan dan skim keahlian rekreasi. Ini bermakna hanya sejumlah kecil skim kepentingan yang menawarkan pulangan kewangan didaftarkan oleh SSM.

Kerangka perundangan dan proses pendaftaran skim kepentingan berperanan untuk meningkatkan tahap perlindungan kepada pelabur melalui proses berikut:

- (i) Semakan, pemeriksaan dan penilaian sebelum pendaftaran untuk memastikan penganjur yang sesuai dan berkualiti;
- (ii) Menetapkan mekanisme perlindungan pelabur seperti terma-terma di dalam surat ikatan amanah dan prospektus, pelantikan pemegang amanah dan lain-lain syarat semasa kelulusan skim; dan

- (iii) Memastikan pematuhan berterusan terhadap obligasi pelaporan, mengemaskini maklumat, penyediaan laporan kewangan, pengauditan akaun dan sebagainya sepanjang tempoh skim.

Skim kepentingan yang berdaftar di SSM perlu melalui proses penelitian yang dikehendaki oleh Akta Skim Kepentingan termasuk semakan ke atas model perniagaan yang ingin dijalankan, kandungan surat ikatan amanah dan prospektus skim tersebut sebelum diluluskan. Pemeriksaan fizikal juga dijalankan terlebih dahulu ke atas aset yang ingin digunakan bagi tujuan skim yang didaftarkan.

Orang ramai juga boleh membuat semakan terhadap skim kepentingan yang didaftarkan melalui laman web rasmi SSM.`

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI ABDUL AZEEZ BIN ABDUL
RAHIM (BALING)**

TARIKH : 19.7.2022 (SELASA)

SOALAN

DATO' SRI ABDUL AZEEZ BIN ABDUL RAHIM (BALING) minta **MENTERI PEMBANGUNAN LUAR BANDAR** menyatakan pencapaian terkini Program Peningkatan Pendapatan (PPP) untuk masyarakat luar bandar, dan apakah cabaran-cabaran utama yang dihadapi oleh Kementerian untuk mengeluarkan masyarakat luar bandar daripada belenggu kemiskinan.

JAWAPAN

Tuan Yang di-Pertua,

Untuk makluman Yang Berhormat, Program Peningkatan Pendapatan (PPP) telah mula dilaksanakan sejak RMKe-8 di bawah Skim Pembangunan Kesejahteraan Rakyat (SPKR) oleh Kementerian Pembangunan Luar Bandar (KPLB).

Objektif PPP adalah untuk meningkatkan pendapatan golongan miskin tegar, miskin dan berpendapatan rendah (B40) di kawasan luar bandar melalui penglibatan mereka di dalam projek-projek ekonomi berskala kecil supaya dapat menambah pendapatan bulanan dan meningkatkan kualiti hidup mereka.

Skop bantuan di bawah PPP ini adalah bagi membantu para peserta untuk menjalankan projek-projek ekonomi di dalam bidang perusahaan kecil seperti perusahaan produk makanan, perniagaan

kecil-kecilan, aktiviti perkhidmatan, aktiviti pertanian serta penternakan. Bantuan yang diberikan adalah melalui pemberian peralatan, mesin, penyediaan premis niaga, bengkel, bahan-bahan mentah serta termasuk program latihan bimbingan kepada setiap peserta dengan nilai maksimum bantuan berjumlah RM10,000 untuk setiap peserta.

Selain Program PPP, KPLB melalui pelbagai jabatan dan agensi di bawah Kementerian turut melaksanakan pelbagai lagi program pembangunan usahawan yang menyediakan bantuan daripada aspek pembiayaan dan latihan kepada para usahawan di kawasan luar bandar.

Bagi tempoh tiga (3) tahun yang lepas iaitu dari tahun 2020 sehingga tahun 2022, secara keseluruhannya Kementerian dan agensi-agensi dibawahnya telah berjaya membantu seramai 6,664 orang peserta dalam pelbagai jenis aktiviti ekonomi yang dilaksanakan di kawasan luar bandar di seluruh negara. Jumlah peruntukan yang telah terlibat bagi tempoh tersebut adalah sebanyak RM36 juta.

KPLB turut memastikan sekurang-kurangnya 70% daripada keseluruhan penerima bantuan PPP pada setiap tahun berjaya meningkatkan pendapatan sebanyak 30% daripada pendapatan asal mereka. Kementerian sentiasa memantau prestasi penerima sekurang-kurangnya untuk tempoh 6 bulan sehingga 1 tahun bagi memastikan penerima yang dibantu benar-benar dapat meningkatkan pendapatan masing-masing.

Antara cabaran-cabaran utama dalam memastikan penerima bantuan berjaya mencapai sasaran adalah faktor geografi iaitu kedudukan para usahawan yang kebanyakannya berada di kawasan pedalaman. Kedua, capaian kepada kemudahan-kemudahan fasiliti bagi tujuan pemasaran produk dan perniagaan seperti saluran kepada bekalan bahan mentah dan infrastruktur telekomunikasi yang masih terbatas. Ketiga, saiz pasaran dan permintaan terhadap produk dan perkhidmatan usahawan yang kecil di kawasan luar bandar. Kesemua faktor tersebut merupakan kekangan utama kepada Kementerian untuk mengeluarkan masyarakat luar bandar daripada belenggu kemiskinan melalui program-program keusahawanan seperti PPP.

Bagi mengatasi cabaran-cabaran tersebut, Kementerian mengambil pendekatan antaranya untuk melaksanakan program ini secara konsep *mentoring* iaitu dengan kerjasama pengusaha yang telah berjaya memberi bimbingan serta meluaskan pasaran perniagaan kepada penerima bantuan secara berterusan.

Di samping itu, dalam usaha untuk memperluaskan aktiviti pemasaran produk-produk usahawan luar bandar, Kementerian juga memperkasakan fungsi Pusat Komuniti Desa (PKD) sebagai pusat pengumpulan produk usahawan luar bandar dan menggalakkan pemasaran produk usahawan luar bandar secara atas talian melalui portal e-dagang DESAMALL di bawah KPLB.

Selain itu, Kementerian turut bersimpati dengan kejadian bencana kepala air dan banjir yang berlaku di Baling pada 4 Julai 2022 lalu. Sehubungan itu, KPLB telah mengambil inisiatif untuk membina baharu sebanyak 21 buah rumah kepada mangsa-mangsa bencana yang terjejas di Baling di bawah peruntukan Program Perumahan Rakyat Termiskin (PPRT) dengan jumlah peruntukan berjumlah RM1,176,000. Program bina baharu rumah ini akan diselaraskan oleh Lembaga Kemajuan Wilayah Kedah (KEDA).

KPLB juga telah memperuntukan sebanyak RM300,000 bagi bantuan pendawaian semula sistem bekalan elektrik di rumah-rumah mangsa yang terjejas dan bantuan memperbaiki motorsikal mangsa-mangsa banjir yang akan dilaksanakan oleh GIATMARA.

Semoga dengan bantuan yang diberikan ini akan dapat meringankan beban dan kesusahan yang sedang dihadapi oleh penduduk di Baling.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : TUAN BARU BIAN (SELANGAU)

TARIKH : 19 JULAI 2022 (SELASA)

SOALAN

TUAN BARU BIAN (SELANGAU) minta **MENTERI DALAM NEGERI** menyatakan berapakah jumlah banduan di setiap penjara di seluruh Malaysia yang tidak mempunyai dokumentasi kewarganegaraan.

JAWAPAN

Tuan Yang Di Pertua,

Untuk makluman Ahli Yang Berhormat, berdasarkan rekod statistik Jabatan Penjara Malaysia sehingga 12 Julai 2022, seramai 81 orang banduan di seluruh institusi penjara tidak mempunyai dokumentasi kewarganegaraan yang mana rekod tersebut merujuk kepada banduan pemegang kad UNHCR.

Daripada jumlah tersebut, seramai 35 orang banduan daripada Penjara Sungai Buloh, 12 orang banduan daripada Penjara Seberang Perai dan lapan (8) orang daripada Penjara Kajang.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI HASAN BIN ARIFIN
[ROMPIN]**

TARIKH JAWAB : 19 JULAI 2022 (SELASA)

SOALAN

**YB DATO' SRI HASAN BIN ARIFIN [ROMPIN] minta MENTERI
PERUMAHAN DAN KERAJAAN TEMPATAN menyatakan :-**

- (a) berapa jumlah rumah, tapak, atau ruang pejabat yang masih tidak dijual atau tidak dapat dijual. Nyatakan anggaran rumah yang tidak dapat dijual dari harga RM250 ribu hingga RM500 ribu, RM500 ribu hingga RM1 juta dan RM1 juta ke atas; dan
- (b) jumlah ruang pejabat yang tidak dijual di seluruh negara dan berapa nilainya.

JAWAPAN

Tuan Yang di-Pertua,

(a) Untuk makluman Ahli Yang Berhormat, berdasarkan data daripada **Pusat Maklumat Harta Tanah Negara (NAPIC)**, bagi suku pertama tahun 2022 (**Q1, 2022**) terdapat sebanyak **35,592 unit rumah siap dibina tidak terjual** yang **bernilai RM22.45 bilion** dengan pecahan seperti berikut:

Julat Harga	Unit Tidak Terjual	Peratus (%)
Di bawah RM300,000	10,158	28.6
RM300,000 hingga RM500,000	10,501	29.5
Melebihi RM500,000 hingga RM1 juta	10,227	28.7
Melebihi RM1 juta	4,706	13.2
JUMLAH	35,592	100

(b) Untuk makluman Ahli Yang Berhormat, bagi ruang pejabat (*purpose built office*, PBO), NAPIC hanya mempunyai maklumat penghunian (*occupancy*) sahaja. Pada suku pertama 2022, pejabat binaan khas (milik swasta) mencatatkan 1,570 bangunan yang menawarkan jumlah ruang sebanyak 18.15 juta meter persegi (m.p.). Daripada jumlah tersebut, sebanyak 12.93 juta m.p. (71.2%) ruang telah dihuni manakala baki sebanyak 5.22 juta m.p. (28.8%) yang meliputi 836 bangunan masih belum dihuni.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022

PERTANYAAN : LISAN

DARIPADA : TUAN RAMKARPAL SINGH A/L
KARPAL SINGH [BUKIT GELUGOR]

TARIKH : 19 JULAI 2022 (SELASA)

SOALAN

TUAN RAMKARPAL SINGH A/L KARPAL SINGH [BUKIT GELUGOR] minta **MENTERI KESIHATAN** menyatakan sama ada Kementerian telah bersetuju untuk membenarkan penanaman dan penggunaan hemp bagi tujuan perubatan dan sekiranya ya, apakah langkah-langkah yang telah diambil oleh Kementerian untuk merealisasikan perkara tersebut.

JAWAPAN

Tuan Yang di-Pertua,

1. Berdasarkan kepada tafsiran “cannabis” yang diperuntukkan di bawah Akta Dadah Berbahaya 1952, hemp adalah kanabis. Oleh itu, kawalan ke atas hemp adalah sama seperti kawalan ke atas kanabis. Buat masa ini, penanaman kanabis tidak dibenarkan di Malaysia sebagaimana yang diperuntukkan di bawah Akta tersebut.
2. Namun, Kementerian Kesihatan Malaysia (KKM) mengambil perhatian terhadap keperluan untuk menyemak semula dasar kawalan kanabis terutamanya penanaman bagi tujuan perubatan. Sehubungan itu, KKM telah menubuhkan Jawatankuasa Induk Pembangunan Industri Kanabis Dan Ketum Bagi Tujuan Perubatan selaras dengan keputusan Jemaah Menteri dalam mesyuaratnya pada 13 April 2022.
3. Jawatankuasa ini yang dipengerusikan oleh YB Menteri Kesihatan

dengan keanggotaannya terdiri daripada semua kementerian dan agensi berkaitan termasuklah Kementerian Dalam Negeri, Jabatan Peguam Negara, Kementerian Pertanian dan Industri Makanan dan Jabatan Kemajuan Islam Malaysia bertanggungjawab untuk mengkaji serta merangka hala tuju pembangunan industri kanabis dan ketum bagi tujuan perubatan.

4. Justeru, keperluan KKM untuk meminda Akta Dadah Berbahaya 1952 bagi membenarkan penanaman kanabis bagi tujuan perubatan adalah bergantung kepada hasil dapatan Jawatankuasa Induk ini dengan mengambil kira aspek perundangan, sosiobudaya, kesihatan, ekonomi, hukum syarak dan seterusnya keputusan Jemaah Menteri terhadap hasil dapatan tersebut.

5. Selain itu, Kementerian ini juga sedang menyediakan satu kerangka kerja bagi pendaftaran produk yang mengandungi cannabidiol (CBD). Rangka kerja tersebut akan menggariskan perkara berkenaan pendaftaran produk cannabidiol (CBD) tertentu sebagai langkah pertama kerajaan untuk mendaftarkan bahan ini bagi tujuan perubatan berpandukan akta sedia ada. Penyediaan rangka kerja tersebut akan mengambil kira amalan antarabangsa termasuk kajian penyelidikan tempatan dan bersandarkan data saintifik bagi memastikan produk yang didaftarkan adalah berkualiti, selamat dan berkesan.

6. Dalam pada itu, sekiranya terdapat pihak yang mempunyai bukti saintifik yang mencukupi untuk menggunakan keluaran (ubat) yang mengandungi ekstrak kanabis bagi tujuan perubatan, pihak berkenaan boleh mengemukakan permohonan pendaftaran keluaran tersebut kepada Pihak Berkuasa Kawalan Dadah dan seterusnya untuk dipasarkan di Malaysia.

7. KKM ingin menekankan bahawa Akta Dadah Berbahaya 1952 dan dua (2) Akta lain yang mengawal selia penggunaan ekstrak kanabis bagi tujuan perubatan iaitu Akta Racun 1952 dan Akta Jualan Dadah 1952 tidak menghalang pengimportan, penjualan, pembekalan atau pengilangan keluaran mengandungi ekstrak kanabis bagi tujuan perubatan selagi mana aktiviti tersebut dilakukan dengan mematuhi undang-undang. Sekian, terima kasih.

**PEMBERITAHUAN PERTANYAAN JAWAB LISAN DEWAN
RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI DR. SHAMSUL ANUAR
BIN HAJI NASARAH [LENGGONG]**

TARIKH : 20 JULAI 2022 (RABU)

SOALAN

DATUK SERI DR. SHAMSUL ANUAR BIN HAJI NASARAH (LENGGONG) minta **MENTERI PEMBANGUNAN USAHAWAN DAN KOPERASI** menyatakan adakah pihak Kementerian menyediakan inisiatif pembiayaan usahawan baru yang terdiri daripada kalangan mahasiswa dengan memberikan fokus kepada keusahawanan digital seiring dengan Revolusi Industri Keempat (IR4.0).

JAWAPAN

Tuan Yang di-Pertua,

Kementerian Pembangunan Usahawan dan Koperasi (KUSKOP) telah menyediakan inisiatif melalui pembiayaan dan program sedia ada kepada usahawan baharu dalam kalangan mahasiswa termasuk dengan memberi fokus kepada keusahawanan digital seperti berikut:

- (i) **TEKUN Nasional** telah melaksanakan **Program Pembangunan Usahawan Siswazah (PPUS)** dengan bantuan pembiayaan daripada nilai minimum RM1,000.00 sehingga maksimum RM100,000.00. Sehingga 30 Jun 2022, seramai 287 usahawan telah menerima manfaat berjumlah RM5.4 juta.
- (ii) **SME Corp.** telah melaksanakan **Program Pembangunan Perniagaan Usahawan Mikro (BizME)** melalui penyediaan latihan

berkenaan penggunaan teknologi dan digitalisasi seperti e-dagang serta pemasaran melalui media sosial. Bagi tahun 2021 sehingga Jun 2022, sejumlah 5,136 peserta telah diberikan latihan di bawah Program BizME ini.

- (iii) **SME Bank** menawarkan pembiayaan melalui **Program Dana Usahawan Muda 2.0 (YEF2.0)** bagi membantu usahawan muda termasuk mahasiswa. Sehingga 30 Jun 2022, sebanyak empat permohonan bernilai RM1.5 juta telah diluluskan.
- (iv) **Perbadanan Nasional Berhad (Pernas)** melalui **Program Be Your Own Boss (BYOB)/ Jom Jadi Usahawan Berjaya** pula telah menawarkan program **Young Entrepreneurship Engagement Talent (YOUNITY)** bagi golongan belia termasuk mahasiswa. Sehingga 30 Jun 2022, seramai 388 peserta telah menyertai program YOUNITY dan sebanyak 26 pembiayaan berjumlah RM4.3 juta telah diluluskan.
- (v) **Bank Rakyat** telah melaksanakan program rintis **Bank Rakyat UNIprenneur** yang memberi manfaat kepada usahawan mahasiswa asnaf. Sehingga 30 Jun 2022, program ini telah memanfaatkan seramai 100 usahawan mahasiswa asnaf.
- (vi) **Sekretariat PROTÉGÉ** telah melaksanakan **Program Latihan Intensif Dalam Talian Bagi Usahawan Generasi Baharu atau New Gen Entrepreneur Online Bootcamp (N-GENE 1.0)**. Program ini menyediakan penyaluran geran mikro permulaan perniagaan sebanyak RM3,000 seorang dan peluang pembiayaan sehingga RM100,000. Sehingga 30 Jun 2022, program N-GENE 1.0 telah memanfaatkan seramai 1,910 usahawan dengan jumlah penyaluran berjumlah RM11.94 juta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : DATUK SERI PANGLIMA HAJAH AZIZAH
BINTI DATUK SERI PANGLIMA HAJI
MOHD DUN [BEAUFORT]**

TARIKH : 19 JULAI 2022 (SELASA)

SOALAN

**DATUK SERI PANGLIMA HAJAH AZIZAH BINTI DATUK SERI
PANGLIMA HAJI MOHD DUN [BEAUFORT]** minta **MENTERI
SUMBER MANUSIA** menyatakan setakat ini berapa peratus
penglibatan warga asing yang bekerja di Malaysia mengikut negeri
dan sektor pekerjaan.

JAWAPAN

Tuan Yang di-Pertua,

Berdasarkan statistik Pas Lawatan Kerja Sementara, Jabatan Imigresen Malaysia, sehingga 30 Jun 2022, seramai 1,149,608 pekerja asing bekerja di semua sektor formal dan informal. Terdapat enam sektor formal yang dibenarkan iaitu sektor perkilangan, pembinaan, perladangan, perkhidmatan, pertanian, perlombongan dan satu sektor informal iaitu pembantu rumah asing.

Seramai 408,037 pekerja asing dalam **sektor perkilangan** iaitu 36.01% dan negeri yang terlibat mengambil pekerja asing dalam sektor perkilangan ialah Negeri Selangor, Johor, WP Kuala Lumpur, Pulau Pinang, Sabah, Perak, Sarawak, Melaka, Negeri Sembilan, Pahang, Kedah, Kelantan, Terengganu, WP Putrajaya, Perlis dan WP Labuan.

Untuk sektor **Pembinaan**, seramai 257,672 pekerja asing bersamaan 22.74% bagi Negeri Selangor, Johor, WP Kuala Lumpur, Pulau Pinang, Sabah, Perak, Sarawak, Melaka, Negeri Sembilan, Pahang, Kedah, Kelantan, Terengganu, WP Putrajaya, Perlis dan WP Labuan.

Untuk sektor **perladangan** terdapat 131,135 pekerja asing bersamaan 11.57 % yang bekerja di Negeri Selangor, Johor, WP Kuala Lumpur, Pulau Pinang, Sabah, Perak, Sarawak, Melaka, Negeri Sembilan, Pahang, Kedah, Kelantan, Terengganu, WP Putrajaya, Perlis dan WP Labuan.

Untuk sektor **perkhidmatan**, seramai 160,920 orang pekerja asing bersamaan 14.20% yang bekerja di Negeri Selangor, Johor, WP Kuala Lumpur, Pulau Pinang, Sabah, Perak, Sarawak, Melaka, Negeri Sembilan, Pahang, Kedah, Kelantan, Terengganu, WP Putrajaya, Perlis dan WP Labuan.

Untuk sektor **pertanian** pula, terdapat 95,531 pekerja asing bersamaan 8.43% yang bekerja di Negeri Selangor, Perak, Pahang, Kedah dan Kelantan.

Manakala terdapat 92 pekerja asing iaitu 0.01% yang bekerja di sektor **perlombongan dan pengkuarian**. Untuk **pembantu rumah asing** seramai 79,796 orang pekerja asing iaitu 7.04% yang bekerja di Negeri Selangor, Johor, WP Kuala Lumpur, Pulau Pinang, Sabah, Perak, Sarawak, Melaka, Negeri Sembilan, Pahang, Kedah, Kelantan, Terengganu, WP Putrajaya, Perlis dan WP Labuan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK HAJI SHABUDIN BIN YAHAYA
[TASEK GELUGOR]**

TARIKH : 19 JULAI 2022 (SELASA)

SOALAN

DATUK HAJI SHABUDIN BIN YAHAYA minta **MENTERI KESIHATAN** menyatakan adakah Kementerian bersedia melaksanakan insurans kesihatan sosial bagi mengelakkan kebergantungan kepada sistem kesihatan percuma. Apakah langkah bagi memberikan perkhidmatan kesihatan terbaik kepada rakyat namun dengan kos yang minima.

JAWAPAN

Tuan Yang di-Pertua,

1. Menurut data daripada *Malaysia National Health Accounts* yang dikeluarkan pada 2021 oleh Kementerian Kesihatan Malaysia, Kerajaan telah membelanjakan sebanyak RM36.6 bilion pada tahun 2020 berbanding hanya RM12.6 bilion pada tahun 2006 bagi tujuan pembiayaan penjagaan kesihatan kepada rakyat. Ini adalah satu peningkatan yang ketara iaitu sebanyak 190% dalam tempoh 14 tahun. Sementara itu, kutipan hasil Kerajaan yang dikenakan ke atas pesakit hanyalah sekitar 1% daripada jumlah yang dibelanjakan.
2. Kutipan hasil yang rendah ini adalah kerana pada masa ini Kerajaan hanya mengenakan caj rawatan pesakit luar sebanyak RM1 atau RM5 kepada warga negara mengikut Perintah Fi (Perubatan) 1982.

3. Kerajaan sedar bahawa model pembiayaan kesihatan awam sedia ada tidak mampan dan akan memberikan tekanan kepada beban kewangan Kerajaan. Sehubungan itu, Kerajaan sedang mengkaji pelbagai opsyen pembiayaan kesihatan yang kalis masa hadapan bagi mengukuhkan sistem kesihatan negara secara menyeluruh, agar perkhidmatan kesihatan lebih saksama (*equitable*), berkualiti tinggi, mudah diakses dengan kos berpatutan dan mampan untuk jangka masa panjang. Perkara-perkara ini akan dimasukkan dalam Kertas Putih Kesihatan yang akan dibentangkan pada hujung tahun ini.

4. Kerajaan memberikan jaminan, dalam pelaksanaan apa juga sistem pembiayaan kesihatan kepada rakyat, Kerajaan akan menggunakan pendekatan '*whole-of-government*' dan '*whole-of-society*' bagi memastikan kepentingan kesihatan rakyat terpelihara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB DATUK MOHD AZIS BIN JAMMAN
(SEPANGGAR)**

TARIKH : 19 JULAI 2022 (SELASA)

SOALAN

DATUK MOHD. AZIS BIN JAMMAN (SEPANGGAR) minta **MENTERI DALAM NEGERI** menyatakan adakah Kerajaan bersetuju dan menyokong cadangan Kad Pengenalan Sabah yang ingin dilaksanakan secara pentadbiran oleh Kerajaan Negeri Sabah ketika ini.

JAWAPAN

Tuan Yang Di Pertua,

Untuk makluman Ahli Yang Berhormat, berdasarkan peruntukan undang-undang, pengeluaran dokumen pengenalan diri adalah di bawah bidang kuasa Kerajaan Persekutuan dan terdapat lima (5) jenis kad pengenalan di bawah peruntukan undang-undang sedia ada iaitu MyKad, MyPR, MyKas, MyTentera, dan MyPoca. Berhubung dengan perkara ini, Kerajaan melalui Kementerian Dalam Negeri (KDN) tidak bercadang untuk mengeluarkan Kad Pengenalan Sabah mahupun menyokong cadangan Kad Pengenalan Sabah yang ingin dilaksanakan secara pentadbiran oleh Kerajaan Negeri Sabah. Walau bagaimanapun, KDN melalui Jawatankuasa Pengurusan Warga Asing di Sabah (JKPWAS) yang dipengerusikan bersama oleh YB Menteri Dalam Negeri dan YAB Ketua Menteri Sabah bercadang mengeluarkan “Kad Warga Asing” bagi menyelesaikan isu pendatang asing di Negeri Sabah.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB TUAN BARU BIAN (SELANGAU)

TARIKH : 19 JULAI 2022 (SELASA)

SOALAN

TUAN BARU BIAN (SELANGAU) minta **MENTERI DALAM NEGERI** menyatakan :-

(a) berapa permohonan untuk kewarganegaraan di bawah Perkara 15A Perlembagaan Persekutuan yang masih dalam proses pertimbangan dari setiap negeri dan berapa lama masa yang diperlukan untuk Kementerian mempertimbangkan permohonan tersebut; dan

(b) apakah status permohonan kewarganegaraan 9 orang bekas pengawal sempadan (Border Scout) dari Ba'Kelalan.

JAWAPAN

Tuan Yang Di Pertua,

- a) Berdasarkan rekod Jabatan Pendaftaran Negara (JPN) dari tahun **2018 hingga Jun 2022**, sebanyak **12,154 permohonan** kewarganegaraan di bawah Perkara 15A Perlembagaan Persekutuan yang masih di dalam proses.

Untuk makluman Ahli Yang Berhormat, setiap permohonan kewarganegaraan yang diterima oleh Kementerian Dalam Negeri (KDN) melalui JPN akan diproses dan diteliti dengan sewajarnya sebelum sesuatu keputusan dikeluarkan. Dalam mempertimbangkan permohonan kewarganegaraan Malaysia, beban untuk membuktikan kelayakan untuk dianugerahkan kewarganegaraan Malaysia adalah di bawah tanggungjawab setiap pemohon dan proses pertimbangan adalah tertakluk kepada syarat-syarat di bawah Bahagian III, Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak dan peraturan imigresen.

Permohonan kewarganegaraan dikemukakan secara berasingan dengan kandungan maklumat dan dokumen sokongan yang berbeza-beza, maka hasil penilaian dan pertimbangan juga adalah berbeza mengikut keperluan, bukti dan fakta kes berdasarkan maklumat yang diberikan. Fakta dan dokumen bukti yang dikemukakan oleh setiap pemohon akan diteliti mengikut giliran yang sewajarnya sebelum keputusan dikeluarkan. Sehubungan dengan itu, tiada tempoh tertentu yang ditetapkan bagi pengeluaran keputusan dan ia berbeza-beza mengikut keperluan kes.

KDN sedang melaksanakan tindakan segera secara berperingkat terhadap semua permohonan kewarganegaraan yang diterima dan sentiasa berusaha untuk memudahcara permohonan berkenaan selagi ia selaras dengan perundangan yang berkuatkuasa.

- b) Kerajaan Malaysia sentiasa menghargai jasa dan pengorbanan bekas pengawal sempadan (*Border Scout*) yang telah menjaga keamanan dan keselamatan negara. Walau bagaimanapun, permohonan kewarganegaraan Malaysia masih tertakluk kepada Perlembagaan Persekutuan.

Untuk makluman Ahli Yang Berhormat, permohonan kewarganegaraan Malaysia hendaklah dibuat secara rasmi kepada Jabatan Pendaftaran Negara (JPN) dan setiap permohonan akan diteliti berdasarkan fakta dan dokumen yang dikemukakan tertakluk kepada syarat-syarat di bawah Bahagian III, Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak dan peraturan imigresen.

Berdasarkan rekod Kementerian ini, hanya tiga (3) orang bekas pengawal sempadan (*Border Scout*) yang telah membuat permohonan kewarganegaraan Malaysia di bawah Perkara 19(1) Perlembagaan Persekutuan, dan kesemua permohonan tersebut telah diluluskan. Salah seorang daripada bekas pengawal sempadan (*Border Scout*) tersebut telah pun melengkapkan proses pemerolehan Sijil Kewarganegaraannya pada 5 April 2021. Manakala dua (2) orang lagi bekas pengawal sempadan (*Border Scout*) telah pun dimaklumkan untuk mengambil surat keputusannya.

Sebagai makluman tambahan Ahli Yang Berhormat, seorang bekas pengawal sempadan (*Border Scout*) sedang dalam proses permohonan kewarganegaraan, seorang lagi telah meninggal dunia dan tiga (3) orang bekas pengawal sempadan (*Border Scout*) masih belum mengemukakan permohonan kewarganegaraan Malaysia secara rasmi kerana pemohon belum memenuhi syarat mendapat taraf Pemastautin Tetap sekurang-kurangnya 12 tahun sebelum permohonan dikemukakan. Pemohon hanya layak mengemukakan permohonan kewarganegaraan Malaysia di bawah Perkara 19(1) Perlembagaan Persekutuan selepas Jun 2025.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : DATUK SERI HAJI SALAHUDDIN BIN AYUB
[PULAI]**

TARIKH : 19 JULAI 2022 (SELASA)

SOALAN

DATUK SERI HAJI SALAHUDDIN BIN AYUB [PULAI] minta **MENTERI SUMBER MANUSIA** menyatakan apakah pandangan Kementerian, serta adakah Kementerian mempunyai perancangan untuk mengimplementasi had hari bekerja kepada empat hari seminggu.

JAWAPAN

Tuan Yang di-Pertua,

Mengenai perancangan untuk mengimplementasi had hari bekerja kepada empat hari seminggu. Kementerian berpandangan perkara ini hendaklah dilihat secara holistik terutamanya dari segi kesesuaian serta keberkesanan terhadap landskap pekerjaan di negara ini.

Sebarang impak pelaksanaan terhadap dasar baharu khususnya ketika Kerajaan dalam proses merencanakan semula ekonomi negara hendaklah diteliti sepenuhnya.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATUK ABD RAHIM BIN BAKRI [KUDAT]

TARIKH : 20 JULAI 2022 (RABU)

SOALAN

DATUK ABD RAHIM BIN BAKRI [KUDAT] minta **MENTERI KANAN PENDIDIKAN** menyatakan status projek bangunan gantian sekolah menumpang SMK Bongkol Pitas yang telah diluluskan pada tahun 2016 dan bilakah kerja-kerja pembinaan bangunan tersebut akan dimulakan.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di seluruh negara termasuk negeri Sabah.

Untuk makluman Ahli Yang Berhormat, di bawah RMKe-11, Rolling Plan 1 tahun 2016, KPM telah diluluskan projek pembinaan gantian penuh 18 bilik darjah dan lain-lain kemudahan di Sekolah Menengah Kebangsaan Bongkol, Pitas, Sabah dengan kos keseluruhan sebanyak RM56 juta. Projek ini telah diserahkan kepada Jabatan Kerja Raya (JKR) negeri Sabah untuk dilaksanakan dan kini berada dalam peringkat prabina. Dalam hal ini, kerja-kerja pembinaan dijangka akan dilaksanakan pada tahun 2023.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATUK SERI PANGLIMA HAJI MOHD
SHAFIE BIN HAJI APDAL [SEMPORNA]
TARIKH : 20 JULAI 2022 (RABU)

SOALAN

DATUK SERI PANGLIMA HAJI MOHD SHAFIE BIN HAJI APDAL [SEMPORNA] minta **MENTERI KEWANGAN** menyatakan daripada manakah hasil tambahan untuk menanggung subsidi berjumlah RM77.3 bilion pada tahun ini dan adakah ini akan memberikan kesan ke atas sasaran defisit tahunan negara.

JAWAPAN

Tuan Yang di-Pertua,

Belanjawan 2022 menganggarkan Hasil Kerajaan Persekutuan tahun 2022 berjumlah RM234 bilion. Anggaran ini akan disemak semula semasa pembentangan Bajet 2023 akan datang dengan mengambil kira jangkaan peningkatan hasil berikutan purata harga minyak mentah dunia yang tinggi (USD106 setong: harga sehingga 11 Julai 2022) berbanding andaian yang digunakan semasa pembentangan Bajet 2022 yang lalu iaitu USD66 setong.

Berdasarkan harga semasa, diunjurkan hasil cukai berkaitan petrol dan minyak akan mencatat tambahan melebihi RM10 bilion berbanding Bajet 2022. Tambahan kepada itu, momentum pemulihan melebihi jangkaan dengan pertumbuhan KDNK negara pada suku pertama tahun ini amat memberangsangkan pada kadar 5%; dan dijangka lebih kukuh pada

suku kedua. Berdasarkan tren tersebut, kita bakal menerima hasil tambahan berkaitan cukai pendapatan serta cukai tidak langsung melebihi RM10 bilion lagi.

Walau bagaimanapun, pertambahan hasil tersebut tidak mencukupi untuk membiayai perbelanjaan Kerajaan Persekutuan tambahan berkaitan subsidi. Berdasarkan unjuran terkini, bantuan dan subsidi untuk tahun 2022 dijangka mencecah RM77.7 bilion berbanding dengan peruntukan Bajet 2022 yang diluluskan sebanyak RM31 bilion disebabkan terutamanya peningkatan subsidi produk petroleum (petrol RON95, diesel, LPG).

Tuan Yang di-Pertua,

Dari segi penjimatan, Kementerian Kewangan telah mengeluarkan Pekeliling Perbendaharaan 3.1 pada 14 Julai 2022 mengenai langkah penjimatan untuk dilaksanakan oleh semua Kementerian dan agensi Kerajaan bagi menampung sebahagian daripada keperluan subsidi tambahan. Antara langkah pekeliling tersebut adalah kawalan terhadap lawatan ke luar negara, barangan import, serta penangguhan perbelanjaan yang belum komited. Namun, saya juga ingin menegaskan bahawa langkah-langkah yang berpaksikan kesejahteraan rakyat akan tetap diteruskan.

Kementerian Kewangan sedang meneliti keadaan ini dan merangka strategi fiskal tambahan termasuk sumber hasil dan penjimatan tambahan demi mengekalkan sasaran defisit fiskal 6% untuk 2022. Perincian perbelanjaan serta kedudukan kewangan Kerajaan Persekutuan yang disemak semula akan dibentangkan dalam Belanjawan 2023 yang akan datang.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' HAJI CHE ABDULLAH BIN MAT NAWI
[TUMPAT]**

TARIKH : 19 JULAI 2022 (SELASA)

SOALAN

YB DATO' HAJI CHE ABDULLAH BIN MAT NAWI [TUMPAT] minta **MENTERI PERUMAHAN DAN KERAJAAN TEMPATAN** menyatakan keberkesanan Program Kitar Semula sehingga kini dan sejauh manakah penglibatan rakyat secara umumnya dalam program ini di seluruh negara.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) melalui Perbadanan Pengurusan Sisa Pepejal dan Pembersihan Awam (SWCorp) sentiasa berusaha bagi memastikan **Kadar Kitar Semula Kebangsaan** berada pada tahap optimum. Kadar Kitar Semula Kebangsaan telah menunjukkan trend positif bermula pada **tahun 2015** yang mencatatkan **15.7%** dan telah **meningkat kepada 31.52%** pada **tahun 2021**. Ini menunjukkan program kitar semula yang dilaksanakan oleh Kerajaan telah memberi impak positif kepada rakyat Malaysia di mana rakyat semakin sedar untuk mengamalkan kitar semula dalam kehidupan seharian. Namun, usaha-usaha menggalakkan amalan kitar semula terus giat dilaksanakan bagi memastikan Malaysia mencapai Kadar Kitar Semula Kebangsaan sebanyak 40% menjelang tahun 2025.

Kejayaan program kitar semula amat bergantung kepada tahap penyertaan rakyat secara menyeluruh. Bagi memastikan tahap penyertaan rakyat yang tinggi, KPKT melalui SWCorp telah dan akan melaksanakan pelbagai program kesedaran awam seperti berikut:

a) Program Trash to Cash

Bagi tahun 2022 (sehingga bulan Mei 2022), bilangan Program Trash to Cash yang telah dilaksanakan adalah seperti berikut:

- i) 85 program di prasekolah dan tadika dengan jumlah kutipan sebanyak 5,763.95 kg dengan nilai RM1,864.63;
- ii) 798 program di sekolah rendah dan menengah dengan jumlah kutipan sebanyak 288,872.81kg dengan nilai RM108,595.30;
- iii) 110 program di Institut Pengajian Tinggi (IPT) dengan jumlah kutipan sebanyak 24,564.87 kg dengan nilai RM7,742.03;
- iv) 557 program di pejabat kerajaan dengan jumlah kutipan sebanyak 333,701.63 kg dengan nilai RM106,901.48;
- v) 3,266 program melibatkan komuniti dengan jumlah kutipan sebanyak 652,672.56 kg dengan nilai RM184,577.23; dan
- vi) 3,312 program di industri dengan jumlah kutipan sebanyak 4,545,476.63 kg dengan nilai RM1,672,421.87.

b) Inisiatif Komuniti Sifar Sisa (KOSIS)

Inisiatif ini dilaksanakan di Program Perumahan Rakyat (PPR) yang terpilih untuk mengumpul sisa makanan dan barangan kitar semula bagi penebusan mata ganjaran. Jumlah penyertaan penduduk di 17 PPR yang terlibat dari tahun 2019 sehingga 2022 adalah sebanyak 54,344 penduduk. Jumlah barangan yang boleh dikitar semula

terkumpul keseluruhannya adalah sebanyak 282,739.75 kg dengan nilai RM190,131.93.

c) Sambutan Hari Kitar Semula Kebangsaan (HKSK)

Sambutan HKSK diadakan pada bulan November setiap tahun. Menerusi program ini, orang awam akan memperoleh maklumat dan inspirasi untuk membudayakan amalan kitar semula dalam kehidupan seharian. Pada tahun ini, sambutan dijangka akan diadakan pada 12 November 2022.

Selain itu, KPKT melalui SWCorp turut mengadakan program dan inisiatif seperti berikut:

- a) Pertandingan Kitar Semula Sekolah-Sekolah Peringkat Kebangsaan (PerKISS);
- b) Pendidikan Untuk Pelbagai Peringkat Umur;
- c) Aplikasi Trash for Cash;
- d) Kempen Pengasingan Sisa di Punca (Separation at Source – SAS);
- e) Kempen Kesedaran Melalui Platform Media Sosial, Digital dan Elektronik; dan
- f) Program *World Cleanup Day*.

Usaha-usaha ini akan diteruskan bagi menggalakkan penyertaan dan meningkatkan kesedaran masyarakat terhadap gaya hidup yang sejahtera melalui pembudayaan amalan kitar semula dan sekali gus meminimumkan janaan sisa pepejal. Kerjasama di antara SWCorp dan agensi-agensi yang berkaitan akan dipergiatkan dalam memastikan kebersihan dan kelestarian alam sekitar yang terjamin untuk generasi yang akan datang. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA, PARLIMEN KEEMPAT
BELAS TAHUN 2022**

PERTANYAAN : LISAN

DARIPADA : TUAN CHE ALIAS BIN HAMID (KEMAMAN)

TARIKH : 20 JULAI 2022 (RABU)

SOALAN

TUAN CHE ALIAS BIN HAMID (KEMAMAN) minta **MENTERI PERTANIAN DAN INDUSTRI MAKANAN** menyatakan sejauh mana penerimaan dan usaha syarikat insurans terhadap cadangan Kementerian untuk mewujudkan skim insurans bagi sektor agromakanan dan pertanian.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) bersama Agrobank sedang membangunkan skim perlindungan khusus berlandaskan prinsip syariah yang dinamakan sebagai Skim Takaful Agromakanan menawarkan pakej perlindungan dengan caruman premium tahunan pada kadar yang berpatutan (*affordable*) bagi memenuhi keperluan komuniti pertanian yang menghadapi risiko ancaman bencana alam seperti banjir dan kemarau serta ancaman penyakit. Skim Takaful Agromakanan ini akan dimulakan dengan sektor padi.

Setakat ini, syarikat insurans telah menunjukkan respons yang positif terhadap cadangan mewujudkan skim insurans bagi sektor agromakanan dan pertanian. Proses perolehan yang telah dilakukan oleh pihak Agrobank menyaksikan beberapa syarikat pengendali takaful berminat untuk menyertai skim takaful. Pembangunan skim takaful agromakanan kini telah berada di fasa akhir mendapatkan kelulusan daripada pihak Bank Negara Malaysia. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN CHOW KON YEOW [TANJONG]
TARIKH : 20 JULAI 2022 (RABU)

SOALAN

TUAN CHOW KON YEOW [TANJONG] minta **MENTERI KEWANGAN** menyatakan bilakah pembayaran kos tanah dianggarkan berjumlah RM62 juta membabitkan keluasan 9.77 ekar di bahagian pulau Pulau Pinang milik Perbadanan Pembangunan Pulau Pinang (PDC) yang telah diguna pakai dan merupakan sebahagian daripada kawasan Jambatan Sultan Abdul Halim Muazam Shah bermula tahun 2007 sehingga kini akan dilangsaikan. Perincikan tahap pemprosesannya sehingga kini.

JAWAPAN

Tuan Yang di-Pertua,

Untuk makluman Ahli Yang Berhormat, Projek pembinaan Jambatan Sultan Abdul Halim Mu'adzam Shah yang juga dikenali sebagai "Jambatan Kedua Pulau Pinang" ialah projek berimpak tinggi yang dilaksanakan di bawah Rancangan Malaysia Ke-9 dan menjadi "*game changer*", dengan izin, untuk membawa pembangunan ekonomi yang lebih pesat dan memberi manfaat kepada rakyat Pulau Pinang khususnya dan negara amnya. Projek ini secara tidak langsung telah membawa pembangunan ke kawasan Barat Daya dan kawasan Seberang Prai Selatan di Pulau Pinang, yang sebelum ini adalah kawasan pertanian bertanah gambut, berpayau, agak terpencil dan tidak membangun. Jambatan tersebut menghubungkan Kawasan Batu Kawan di tanah besar dan Batu Maung di bahagian pulau, Negeri Pulau Pinang.

Projek ini juga merupakan manifestasi hubungan dan kerjasama antara Kerajaan Pusat dan Kerajaan Negeri Pulau Pinang daripada segi pembangunan ekonomi negara. Kerajaan Negeri Pulau Pinang pada ketika itu juga mengalu-alukan pembinaan jambatan tersebut dan adalah sejajar dengan Rancangan Struktur Negeri Pulau Pinang 2020, yang diwartakan pada 28 Jun 2007. Projek ini membuka ruang kepada pembangunan yang lebih pesat melibatkan beberapa buah kawasan dan meningkatkan jaringan perhubungan di Negeri Pulau Pinang. Projek pembinaan ini adalah berjumlah RM4.5 bilion yang dilaksanakan oleh Kerajaan Persekutuan melalui syarikat milik Menteri Kewangan Diperbadankan iaitu Jambatan Kedua Sdn Bhd.

Tuan Yang di-Pertua,

Kerajaan Negeri Pulau Pinang telah memberikan kerjasama yang erat dalam pelaksanaan projek ini terutama daripada segi proses pengambilan tanah. Proses pengambilan tanah milik persendirian bagi tujuan projek pembinaan jambatan tersebut berjalan lancar dengan pengambilan tanah dilaksanakan menurut peruntukan Akta Pengambilan Tanah 1960 dan kesemua pemilik tanah yang terkesan dibayar pampasan

yang sewajarnya oleh Kerajaan Persekutuan. Bagi tanah milik Kerajaan di kawasan tersebut, seperti lazimnya kebenaran memasuki telah diperolehi.

Berkenaan isu bayaran pampasan kepada pihak Perbadanan Pembangunan Pulau Pinang (PDC) untuk pembinaan Jambatan Sultan Abdul Halim Mu'adzam Shah, tuntutan sebanyak RM62 juta bukanlah untuk tanah seluas 9.77 ekar di Batu Maung sahaja tetapi turut melibatkan keseluruhan tanah-tanah di kawasan Batu Kawan seluas 237 ekar yang juga digunakan untuk projek pembinaan jambatan tersebut. Tanah-tanah yang terlibat sehingga kini masih lagi didaftarkan atas nama Kerajaan Negeri dan bukannya atas nama PDC. Sewaktu projek pembinaan dimulakan, kesemua pemilik tanah persendirian telah mendapat pampasan masing-masing dan nama PDC tidak tersenarai sebagai salah satu daripada pemilik tanah yang terkesan.

Namun, dengan anggapan bahawa PDC ialah '*beneficial owner*' atau pihak berkepentingan ke atas tanah tersebut, syarikat Jambatan Kedua Sdn Bhd sedang dalam proses rundingan dengan pihak PDC bagi mendapatkan pengurangan kepada tuntutan kos tanah yang dibuat oleh PDC ke atas tanah-tanah tersebut, antaranya berdasarkan kepada faktor-faktor berikut:

Pertama: Syarikat Jambatan Kedua Sdn Bhd telah membina persimpangan *clover leaf* di Batu Kawan dengan peruntukan sebanyak RM55 juta, yang pada mulanya tiada dalam perancangan asal projek pembinaan jambatan. Difahamkan wujudnya persefahaman di antara YAB Ketua Menteri Pulau Pinang dan YB Menteri Kerja Raya pada ketika itu untuk menaik taraf persimpangan asal kepada persimpangan *clover leaf* apabila melihat kepada potensi kepesatan pembangunan yang bakal dibawa oleh kewujudan jambatan tersebut. Persimpangan *clover leaf* membantu dalam menyuraikan trafik secara lebih berkesan berdasarkan kepada magnitud pembangunan yang dialami oleh kawasan Batu Kawan selepas terbinanya jambatan.

Kedua: Sebanyak RM166 juta telah dibelanjakan oleh syarikat Jambatan Kedua Sdn Bhd untuk menstabilkan tanah di kawasan Batu Kawan bagi pembinaan projek jambatan tersebut memandangkan kawasan asalnya adalah tanah gambut yang juga berpayau dan langsung tidak sesuai untuk dibina struktur, bangunan, mahupun lebuh raya, tanpa rawatan dan penstabilan tanah yang sewajarnya dibuat terlebih dahulu.

Ketiga: Pembinaan Jambatan Sultan Abdul Halim Mu'adzam Shah yang menelan belanja sekurang-kurangnya RM4.5 bilion itu telah membawa banyak limpahan kemakmuran kepada rakyat Negeri Pulau Pinang. Jambatan tersebut telah membuka peluang baharu kepada Kerajaan Negeri Pulau Pinang untuk memajukan kawasan-kawasan industrinya di tanah besar, yang dahulunya lebih tertumpu ke kawasan industri di bahagian pulau yang semakin padat. Kawasan *Batu Kawan Industrial Park* di bawah PDC mendapat sambutan yang begitu baik memandangkan ia dapat dihubungkan secara terus dengan Lapangan Terbang Antarabangsa Bayan Lepas melalui jambatan tersebut, yang memudahkan mobiliti serta pengimportan dan pengeksportan barangan melalui jalan udara. Penjualan tanah-tanah perindustrian di *Batu Kawan Industrial Park*, dan kemudiannya *Batu Kawan Industrial Park 2*, membawa banyak keuntungan kepada PDC dan keuntungan tersebut semestinya jauh lebih besar daripada jumlah tuntutan yang dibuat ke atas tanah-tanah yang digunakan untuk pembinaan Jambatan Sultan Abdul Halim Mu'adzam Shah. Ini kerana, jika dahulunya harga bagi tanah-tanah di Batu Kawan kurang daripada RM10 sekaki persegi, tetapi pada hari ini harga bagi tanah-tanah di kawasan tersebut telah melebihi RM50 sekaki persegi. Kawasan Batu Kawan yang dahulunya tidak berpenghuni kini mula dipenuhi dengan pelbagai jenis projek perumahan yang dibina oleh syarikat-syarikat pemaju yang terkemuka, dan berharga beratus ribu ringgit setiap unit.

Keempat: Selain daripada memudahkan perjalanan rakyat ke tanah besar negeri Pulau Pinang, dengan wujudnya perhubungan jalan yang baharu melalui Jambatan Sultan Abdul Halim Mu'adzam Shah, pelbagai peluang perniagaan dan peluang pekerjaan dicetuskan hasil daripada kewujudan jambatan tersebut yang juga dimanfaatkan rakyat Negeri Pulau Pinang dan meningkatkan taraf hidup mereka. Kerajaan

Negeri juga mendapat habuan daripada peningkatan hasil yang dijana daripada hartanah dan pelbagai jenis pembangunan yang diwujudkan di kawasan Batu Kawan.

Sehubungan itu, saya menyarankan agar YB Tanjong, atas semangat setiakawan dan kerjasama antara Kerajaan Persekutuan dan Kerajaan Negeri dan kapasiti beliau sebagai Ketua Menteri Pulau Pinang dan juga Pengerusi PDC, **dapat mempertimbangkan pengurangan malah lebih baik dan dialu-alukan pengecualian bayaran kos tanah sebagai pampasan oleh Jambatan Kedua Sdn Bhd kepada PDC.** Ini mengambilkira pelbagai limpahan kemakmuran, pembangunan, peluang pekerjaan dan perniagaan yang telah diwujudkan yang kini dinikmati oleh segenap lapisan rakyat negeri Pulau Pinang, termasuklah oleh pihak Kerajaan Negeri sendiri, hasil daripada terbinanya Jambatan Sultan Abdul Halim Mu'adzam Shah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : PUAN NURUL IZZAH BINTI ANWAR
(PERMATANG PAUH)**

TARIKH : 20 JULAI 2022 (RABU)

SOALAN

PUAN NURUL IZZAH BINTI ANWAR (PERMATANG PAUH) minta
MENTERI PERTANIAN DAN INDUSTRI MAKANAN menyatakan :-

- (a) kesan larangan eksport ayam sebanyak 3.6 juta ekor sebulan mulai 1 Jun oleh pengeluar dan penternak tempatan kepada ekonomi negara; dan
- (b) pelan jangka masa panjang bagi memastikan bekalan telur dan ayam dalam negara stabil dan mencukupi. Rancangan Kementerian untuk mewujudkan subsidi makanan ternakan bersumberkan PKE (*Palm Kernel Expeller*) seperti yang dibentangkan di dalam Bajet 2022 lalu.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) melalui Jabatan Perkhidmatan Veterinar (DVS) sentiasa memantau dan mengadakan sesi libat urus dengan semua pihak berkepentingan dalam rantai pengeluaran bekalan ayam termasuk di peringkat ladang bagi memastikan bekalan dan kelangsungan pengeluaran ayam negara berada pada tahap yang stabil dan mencukupi.

Melalui sesi libat urus yang diadakan, penternak dan pengusaha ladang-ladang penternakan ayam juga telah menyatakan komitmen untuk bersama-sama memperkukuh sekuriti makanan negara melalui tahap pengoperasian ladang pada tahap yang optimum demi menjamin bekalan ayam yang berterusan.

Kerajaan telah menghentikan eksport ayam sebanyak 3.6 juta ekor (*commercial broiler*) sebulan bermula 1 Jun 2022 bagi menstabilkan bekalan ayam di pasaran tempatan. Berdasarkan data eksport ayam hidup pada tahun 2021, penternak yang mengeksport ke luar negara kerugian dengan anggaran nilai sebanyak RM55.7 juta sebulan. Sekatan pengeksportan bersifat sementara sehingga harga dan pengeluaran ayam kembali stabil.

Kerajaan juga telah menubuhkan Jawatankuasa Teknikal Menangani Isu Sekuriti Bekalan Makanan Negara bagi memantau status bekalan komoditi utama makanan negara serta mengenal pasti isu dan mencari jalan penyelesaian jangka pendek, sederhana dan panjang terhadap isu sekuriti makanan negara. Antara langkah proaktif jangka pendek yang dilaksanakan bagi memastikan bekalan ayam kekal terjamin, termasuk:

- (i) membatalkan kelulusan kuota import (*Approved Permit – AP*) barangan makanan dari luar negara termasuk bagi ayam bulat dan keratan ayam

- (ii) pelaksanaan stokpail ayam untuk menangani kekurangan bekalan ayam di pasaran menerusi Lembaga Pertubuhan Peladang (LPP) yang akan melibatkan Pertubuhan Peladang secara gabungan;
- (iii) mempermudah proses pembayaran tuntutan subsidi harga ayam dengan membenarkan bayaran pendahuluan tuntutan khususnya penternak kecil dan sederhana;
- (iv) mudah cara prosedur import (IP) Jabatan Perkhidmatan Kuarantin dan Pemeriksaan Malaysia (MAQIS) ke atas empat (4) komoditi merangkumi soya, gandum, jagung dan makanan ternakan berasaskan haiwan dan tumbuhan melalui penangguhan fi permit serta mewujudkan *priority lane* bagi proses kemasukan pantas sehingga bekalan ayam kembali stabil.
- (v) mempercepatkan proses keperluan lesen pengimportan dibawah DVS melalui kelulusan secara interim bermula 1 Julai 2022 dengan proses kelulusan dalam masa tujuh (7) hari bekerja berbanding dengan 30 hingga 90 hari yang akan memberi manfaat kepada 380 syarikat pengimport bahan makanan ternakan;
- (vi) memberikan pengecualian khas bagi pengambilan pekerja asing dalam industri penternakan ayam mengikut keperluan bagi membolehkan aktiviti penternakan ayam beroperasi pada tahap optimum sekaligus menjamin kesinambungan pengeluaran;
- (vii) mengkaji mekanisme mengurangkan kos minyak sawit mentah (*crude palm oil*) kepada syarikat-syarikat pengilangan makanan ternakan (*feedmill operators*) yang dikenalpasti bagi mengurangkan kos makanan ternakan; dan
- (viii) penambahan abattoir dan loji pemprosesan luar negara bagi meningkatkan dan mempelbagaikan sumber import bekalan ayam.

Untuk makluman Ahli Yang Berhormat jua, Kerajaan telah memperuntukkan subsidi sebanyak RM369.5 juta bagi melanjutkan tempoh pemberian subsidi bermula 1 Julai 2022 hingga 31 Ogos 2022.

Manakala jumlah subsidi yang diperuntukkan bagi tempoh 5 Februari 2022 hingga 30 Jun 2022 adalah sebanyak RM730 juta. Ini menjadikan jumlah subsidi yang diluluskan sejak 5 Februari 2022 adalah sebanyak RM1.1 bilion. Setakat 15 Julai 2022, sebanyak 7,680 permohonan subsidi telah diluluskan berjumlah RM632.6 juta.

Kerajaan melaksanakan langkah intervensi melalui pemberian subsidi kepada penternak ini bagi meringankan beban penternak yang berhadapan dengan kenaikan kos pengeluaran ayam. Langkah intervensi ini diharap dapat menstabilkan kembali bekalan sekaligus memastikan Keluarga Malaysia dapat membeli ayam dan telur dengan harga yang berpatutan dan tidak terbeban dengan cabaran kos sara hidup.

Kerajaan turut bersetuju dengan pelaksanaan Dana Pembiayaan Agromakanan Keluarga Malaysia (DPAKM) di bawah Agrobank yang melibatkan peruntukan sebanyak RM800 juta bagi menjamin kesinambungan aktiviti pengeluaran makanan. Program DPAKM ini menawarkan kemudahan pembiayaan yang khusus sebanyak RM300 juta bagi ternakan ayam. Had maksimum pembiayaan ditetapkan sehingga RM5 juta dengan tempoh pembiayaan sehingga 8.5 tahun termasuk 6 bulan moratorium ditawarkan kepada semua golongan sasar.

Bagi jangka panjang pula, antara inisiatif yang diambil meliputi penanaman jagung bijian dalam negara bagi mengurangkan kebergantungan kepada sumber import, menjalankan kajian untuk menghasilkan bahan mentah gantian dari sumber tempatan, meningkatkan penggunaan PKC/PKE tempatan dalam rumusan makanan haiwan dengan bekerjasama dengan Kementerian Perusahaan Perladangan dan Komoditi (MPIC), menjalankan kajian bagi menghasilkan makanan ternakan tempatan berasaskan isirung sawit PKC/PKE; dedak beras; mil ikan dan mil ofal ikan; larva *Black Soldier Fly* (BSF); dan sisa hampas soya serta bekerjasama dengan Kerajaan Negeri bagi meningkatkan keluasan tanah untuk aktiviti pertanian di bawah Lesen Pendudukan Sementara.

Antara strategi jangka panjang yang telah dan akan dilaksanakan oleh Kementerian Pertanian dan Industri Makanan (MAFI) untuk menangani isu sekuriti makanan adalah digariskan dalam Dasar

Agromakanan Negara 2021-2030 (DAN 2.0) dan Pelan Tindakan Dasar Sekuriti Makanan Negara 2021-2025 (DSMN 2021-2025).

Pada masa yang sama, bagi memastikan isu sekuriti makanan negara sentiasa diberi perhatian, Kementerian turut memastikan isu-isu tersebut dibincang dan dibawa kepada pertimbangan Jemaah Menteri menerusi platform seperti Mesyuarat Jawatankuasa Kabinet Mengenai Dasar Sekuriti Makanan Negara (FSCC), Mesyuarat Jawatankuasa Teknikal Menangani Isu Sekuriti Bekalan Makanan Negara dan Mesyuarat Jawatankuasa Pasukan Jihad Tangani Inflasi. Kerajaan akan terus memainkan peranan efektif dengan kerjasama semua pihak bagi menjamin kemampuan memperoleh bekalan makanan yang mencukupi dan selamat pada harga berpatutan secara berterusan oleh Keluarga Malaysia.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN SHAHARIZUKIRNAIN BIN ABD. KADIR
[SETIU]**

TARIKH : 20 JULAI 2022 (RABU)

SOALAN

TUAN SHAHARIZUKIRNAIN BIN ABD. KADIR [SETIU] minta **MENTERI KANAN PENDIDIKAN** menyatakan kayu ukur yang digunakan bagi menetapkan standard menu makanan asrama yang didakwa tidak memenuhi citarasa khususnya pelajar luar bandar.

JAWAPAN

Tuan Yang di-Pertua,

Kementerian Pendidikan Malaysia (KPM) dengan kerjasama Kementerian Kesihatan Malaysia (KKM) bertanggungjawab menyediakan menu makanan standard di asrama sekolah bagi memastikan murid mendapat makanan yang berkhasiat dan selamat.

Untuk makluman Ahli Yang Berhormat, menu makanan asrama sekolah disediakan dengan mengambil kira keperluan kalori bagi seorang murid berdasarkan Saranan Pengambilan Nutrien Malaysia (2017) KKM. Keperluan murid sekolah rendah adalah di antara 1,800 kilokalori (kcal) hingga 2,200 kcal sehari manakala keperluan murid menengah adalah di antara 2,000 kcal hingga 2,600 kcal sehari. Anggaran keperluan kalori adalah berdasarkan tahap aktiviti fizikal murid. Dalam hal ini, murid yang tinggal di asrama dikategorikan dalam kumpulan yang aktif.

Menu makanan asrama yang disediakan juga memenuhi saranan

Piramid Makanan Malaysia yang dikeluarkan oleh KKM mengambil kira kumpulan makanan iaitu bijirin, buah-buahan, sayur-sayuran, protein dan susu. Cara penyediaan makanan berkhasiat turut ditekankan dengan mengurangkan penggunaan minyak, gula dan garam dalam hidangan.

Penetapan menu standard makanan asrama turut mengambil kira beberapa kriteria berikut:

- i. pandangan pihak sekolah termasuk penyelia asrama;
- ii. kesesuaian, kegemaran, penerimaan murid (termasuk faktor alahan, budaya dan kepercayaan); dan
- iii. bahan mentah yang mudah diperoleh.

KPM dengan kerjasama KKM memperkenalkan Buku Menu Makanan Asrama Kementerian Pendidikan Malaysia dan Resepi Standard yang mengandungi 119 jenis resepi. Buku ini telah diguna pakai di seluruh asrama sekolah bawah KPM sejak tahun 2018.

Buku menu ini telah disediakan oleh panel penggubal yang terdiri daripada pegawai bahagian KPM, jabatan pendidikan negeri, sekolah dan pakar pemakanan daripada KKM. Buku menu ini disemak atas nasihat KKM dan mengikut keperluan.

KPM komited untuk memastikan penyediaan menu makanan asrama sekolah adalah mengikut keperluan nutrisi murid seperti mana yang disarankan oleh KKM.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATO' SERI ANWAR BIN IBRAHIM
[PORT DICKSON]
TARIKH : 20 JULAI 2022 (RABU)

SOALAN

DATO' SERI ANWAR BIN IBRAHIM [PORT DICKSON] minta **MENTERI KEWANGAN** menyatakan langkah-langkah persediaan dan dasar fiskal Kerajaan bagi menghadapi potensi cabaran ekonomi seperti kemelesetan global dan stagflasi, memandangkan kadar inflasi kekal tinggi seperti yang disarankan oleh Bank Dunia.

JAWAPAN

Tuan Yang di-Pertua,

Dasar fiskal Kerajaan dirangka berdasarkan dengan matlamat utama untuk memastikan kemampunan kewangan awam, kestabilan makro-ekonomi dan kesejahteraan rakyat. Beberapa peraturan dan prinsip utama menjadi asas dalam merangka dasar fiskal termasuk pematuhan kepada peraturan fiskal, ruang dan fleksibiliti, kecairan pasaran bagi pembiayaan Kerajaan dan kemampuan keberhutangan negara. Dasar fiskal mengembang yang dilaksanakan oleh Kerajaan membolehkan sokongan fiskal disediakan bagi menangani krisis COVID-19, menyokong ekonomi domestik, menjana pelaburan, merangsang perbelanjaan pengguna dan mewujudkan peluang pekerjaan.

Dalam situasi pemulihan ekonomi global yang tidak seimbang dan tidak menentu, operasi fiskal kekal proaktif dan pantas bertindak balas terhadap persekitaran ekonomi dan keutamaan dasar yang dinamik. Usaha untuk meningkatkan keberkesanan dan kecekapan perbelanjaan akan disokong oleh langkah perbelanjaan berhemat serta mengoptimumkan sumber sedia ada selari dengan keperluan semasa. Selain itu, dasar dan pengurusan hasil akan ditambah baik secara berperingkat tanpa menjejaskan momentum pemulihan. Dalam Bajet 2022, defisit fiskal telah disasarkan pada 6% daripada KDNK dan unjuran ekonomi berkembang antara 5.3% hingga 6.3%.

Tuan Yang di-Pertua,

Sebagai sebuah ekonomi terbuka, Malaysia terdedah kepada perubahan senario ekonomi global termasuk ketegangan geopolitik, tekanan inflasi dan gangguan rantai makanan. Justeru, bagi melindungi rakyat daripada beban kenaikan kos sara hidup, Kerajaan menjangkakan perbelanjaan subsidi akan meningkat kepada sekitar RM77.7 bilion pada tahun 2022 berbanding peruntukan yang diluluskan dalam Bajet 2022 sebanyak RM31 bilion. Walau bagaimanapun, peningkatan perbelanjaan

subsidi ini dijangka tidak dapat ditampung sepenuhnya melalui peningkatan hasil cukai berkaitan komoditi.

Dengan itu, Kerajaan juga akan melaksanakan inisiatif pembaharuan fiskal termasuk semakan semula perbelanjaan awam termasuk menambah baik program subsidi bersasar bagi memastikan kecekapan dan keberkesanan perbelanjaan Kerajaan. Di samping itu, Kerajaan juga akan memperkenalkan Akta Tanggungjawab Fiskal (FRA) dan Strategi Hasil Jangka Sederhana (MTRS) bagi meningkatkan disiplin kewangan dan ketelusan pengurusan kewangan negara. Semua inisiatif ini adalah penting bagi memastikan kedudukan kewangan Kerajaan kekal kukuh, seterusnya menyediakan ruang fiskal yang mencukupi bagi menghadapi sebarang krisis pada masa hadapan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : PUAN VIVIAN WONG SHIR YEE
[SANDAKAN]**

TARIKH : 20 JULAI 2022 (RABU)

SOALAN

Minta **MENTERI PENGAJIAN TINGGI** menyatakan mengapa universiti awam utama di Malaysia, terutamanya Universiti Malaya, secara konsisten telah mengalami penurunan dalam kedudukan global mereka seperti yang diterbitkan oleh QS World University Rankings.

JAWAPAN

Tan Sri Yang di-Pertua,

Merujuk kepada laporan *Quacquarelli Symonds (QS) World University Rankings (WUR) 2023* yang dikeluarkan pada 09 Jun 2022 yang lalu, Universiti Malaya (UM) masih kekal berada pada kedudukan 100 universiti terbaik di dunia iaitu pada kedudukan ke-70. Walau bagaimanapun, kedudukan ini menurun lima (5) anak tangga berbanding tahun 2022 (ke-65). Dalam hal ini, pihak UM, dengan sokongan daripada pihak Kementerian Pengajian Tinggi, akan terus mengatur strategi untuk bersaing dalam memastikan ianya akan terus memperbaiki kedudukan di dalam ranking 100 universiti terbaik dunia.

Untuk makluman ahli Yang Berhormat, terdapat pelbagai faktor yang mempengaruhi kedudukan sesebuah universiti di dalam penilaian QS WUR ranking. Ianya merangkumi enam petunjuk prestasi utama sebagai skor pemberat yang diukur iaitu reputasi akademik (40%), reputasi majikan (10%), nisbah pelajar:pensyarah (20%), nisbah sitasi:pensyarah (20%), jumlah pensyarah antarabangsa (5%) dan jumlah pelajar antarabangsa (5%). Sistem ranking ini juga menilai tiga bidang utama iaitu impak penyelidikan, pengajaran dan pengantarabangsaan.

Justeru, bagi memastikan Institut Pendidikan Tinggi (IPT) di Malaysia terus bersaing dan berada di dalam kedudukan 100 universiti terbaik dunia, usaha-usaha penambahbaikan IPT di Malaysia sentiasa dilaksanakan secara berterusan dalam menilai kapasiti pengajaran, impak penyelidikan dan tahap pengantarabangsaan. Untuk makluman ahli-ahli Dewan, universiti di Malaysia telah mencapai kemajuan yang positif dalam tempoh enam tahun terkini. Dengan kesungguhan, perancangan yang teliti, dana yang sewajarnya dan strategi yang berkesan, kementerian ini percaya IPT di Malaysia mampu terus bersaing dan berada sebaris dengan universiti terkemuka dunia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN RUSNAH BINTI ALUAI (TANGGA
BATU)**

TARIKH : 20 JULAI 2022 (RABU)

SOALAN

PUAN RUSNAH BINTI ALUAI (TANGGA BATU) minta **MENTERI PERTANIAN DAN INDUSTRI MAKANAN** menyatakan apakah faktor-faktor yang menyebabkan tanah-tanah pertanian dijadikan kawasan perumahan dan perindustrian terutamanya di pinggir bandar sedangkan tanah tersebut boleh dikekalkan sebagai tanah pertanian.

JAWAPAN

Tuan Yang di-Pertua,

Untuk makluman Ahli Yang Behormat, antara faktor-faktor yang menyebabkan tanah pertanian dijadikan sebagai kawasan tanah perumahan dan perindustrian adalah seperti berikut:-

- i. Tiada infrastruktur asas seperti jalan ladang, sumber air dan sebagainya;
- ii. Tanah tersebut mempunyai banyak penama menyebabkan persetujuan untuk mengekalkan status tanah sebagai tanah pertanian menjadi sukar;
- iii. Keuzuran pemilik tanah yang telah berusia untuk mengusahakan tanah pertanian tersebut;
- iv. Kekurangan modal bagi menjalankan aktiviti pertanian kerana cabaran peningkatan kos pengeluaran; dan
- v. Penukaran status tanah pertanian kepada tanah perumahan dan perindustrian yang memberikan pulangan yang lebih tinggi kepada pemilik tanah.

Kementerian juga telah mengambil inisiatif melaksanakan Projek Pembangunan Tanah Terbiar dengan matlamat memajukan tanah pertanian yang kurang produktif agar status tanah pertanian tersebut dapat dikekalkan sekaligus dimanfaatkan sebaiknya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DR. KELVIN YII LEE WUEN
[BANDAR KUCHING]**

TARIKH : 19 JULAI 2022 (SELASA)

SOALAN

DR. KELVIN YII LEE WUEN [BANDAR KUCHING] minta **MENTERI KESIHATAN** menyatakan jumlah peratusan vaksinasi termasuk dos ke-4 di seluruh negara. Selain itu, berapa jumlah vaksin yang masih ada dan bila stok tersebut akan mencapai tarikh luput dan perancangan Kementerian untuk menghabiskan stok tersebut.

JAWAPAN

Tuan Yang di-Pertua,

1. Sejak 24 Februari 2021 sehingga 18 Julai 2022, seramai 27,384,528 atau 83.9% penduduk berumur 5 tahun dan ke atas telah lengkap vaksinasi. Daripada jumlah tersebut, seramai:

- (i) 23,043,714 juta atau 97.9% penduduk berumur 18 tahun dan ke atas telah lengkap vaksinasi;
- (ii) 2,890,891 atau 92.9% remaja berumur 12 hingga 17 tahun telah lengkap vaksinasi; dan
- (iii) 1,449,923 atau 40.8% kanak-kanak berumur 5 hingga 11 tahun telah lengkap vaksinasi.

2. KKM juga telah melaksanakan pemberian dos penggalak pertama pada 13 Oktober 2021 dan dos penggalak kedua pada 22 April 2022. Sehingga 18 Julai 2022, seramai 16,119,815 penduduk atau 68.5% daripada populasi penduduk berumur 18 tahun dan ke atas telah menerima dos penggalak pertama manakala 225,848 penduduk telah menerima dos penggalak kedua. Kini, pemberian dos penggalak kedua diperluaskan kepada individu sihat berumur 50-59 tahun jika mereka memilih berbuat demikian untuk perlindungan daripada risiko penyakit yang teruk.

3. Secara keseluruhan kedudukan baki stok vaksin COVID-19 pada 1 Julai 2022 adalah sebanyak 11,896,829 dos (termasuk vaksin yang didermakan dari negara luar) yang akan luput antara Julai 2022 sehingga September 2023. Antara usaha yang telah dibuat oleh kerajaan untuk menghabiskan stok adalah dengan menggalakkan pengambilan dos penggalak seperti langkah-langkah berikut:

- (i) Pelaksanaan sistem tempahan janji temu melalui aplikasi MySejahtera. Individu yang layak akan menerima pautan janji temu (*booking link*) bagi menempah sesi penerimaan dos penggalak mengikut ketetapan individu tersebut di Pusat Pemberian Vaksin (PPV) yang disenaraikan;
- (ii) Menawarkan perkhidmatan vaksinasi dos penggalak secara *walk-in* kepada semua penduduk dewasa berumur 18 tahun ke atas di semua PPV seluruh negara bermula 29 Januari 2022;
- (iii) Melaksanakan pemberian dos penggalak secara opportunistik bagi individu yang sedang dalam rawatan di Hospital Kerajaan atau di Hospital swasta yang telah beroperasi sebagai PPV;
- (iv) Memberikan janji temu semula kepada individu yang tidak dapat hadir bagi mendapatkan dos penggalak atas sebab-sebab tertentu;
- (v) Bagi meningkatkan pengambilan dos penggalak di kalangan penerima dos lengkap vaksin Sinovac, KKM juga turut

menawarkan pemberian dos penggalak secara *homologous* kepada golongan ini;

- (vi) Melaksanakan program jangkau luar (*outreach*) di kawasan yang sukar dicapai seperti kawasan pedalaman, Orang Asli dan pulau-pulau;
- (vii) Meningkatkan hebahan melalui media sosial dan media arus perdana serta di kawasan setempat; dan
- (viii) Mewujudkan Jawatankuasa Strategi Komunikasi *PICK-Booster* khusus untuk memperkukuhkan penyampaian mesej berkaitan dos penggalak kepada orang awam. Susulan itu, pelbagai program seperti slot media / radio, ceramah dan webinar telah dilaksanakan. Pelaporan AEFI berkala juga turut dikeluarkan oleh Bahagian Regulatori Farmasi Negara (NPRA) bagi memberi maklumat sebenar berkenaan AEFI. Selain itu, mesej berkenaan dos penggalak juga telah dihasilkan seperti infografik, FAQ dan video berkaitan pengambilan dos penggalak dalam pelbagai bahasa yang telah dimuat naik di laman web KKM dan media sosial KKM.

4. Selain itu, Malaysia juga turut memberi sumbangan kepada negara lain yang memerlukan seperti kepada Bangladesh sebanyak 559,200 dos vaksin Astra Zeneca, Myanmar sebanyak 500,000 dos vaksin Astra Zeneca dan Laos sebanyak 500,000 dos vaksin Covilo telah disumbangkan.

Sekian, terima kasih.

PEMBERITAHUAN PERTANYAAN LISAN DEWAN RAKYAT

MESYUARAT KEDUA, PENGGAL KELIMA,

PARLIMEN KEEMPAT BELAS 2022

PERTANYAAN : LISAN

**DARIPADA : DATO' SRI HAJAH ROHANI BINTI HAJI ABDUL
KARIM [BATANG LUPAR]**

TARIKH : 19.07.2022 (SELASA)

SOALAN

Dato' Sri Hajah Rohani binti Haji Abdul Karim [Batang Lupar] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan bagaimana memastikan tidak berlaku aktiviti penyelewengan dan ketirisan rentas sempadan bagi minyak masak bersubsidi polibag 1kg.

JAWAPAN:

Tuan Yang di-Pertua,

Kerajaan menzahirkan komitmen tinggi dalam usaha membendung sebarang penyelewangan atau kepincangan berhubung barangan keperluan bersubsidi negara terutama minyak masak. Justeru, Kementerian telah mengambil tindakan-tindakan seperti berikut:

- i. Mengarahkan pemeriksaan dan pengauditan di setiap peringkat rangkaian pengedaran minyak masak melalui aktiviti semakan *Pre-Delivery Plan*;
- ii. Menjalankan pemeriksaan pematuhan permit ke atas peniaga-peniaga kecil dan pengusaha restoran;
- iii. Membuat risikan ke atas pengilang, pembungkus, pemborong dan peruncit dengan sasaran terpilih yang disyaki menyeleweng minyak masak bersubsidi termasuk risikan ke negara jiran seperti Thailand;
- iv. Menetapkan had pembelian minyak masak polibeg sebanyak 3 paket untuk memastikan lebih ramai pengguna isi rumah dapat menikmati subsidi yang diberikan oleh Kerajaan;
- v. Mempertingkatkan kerjasama dengan agensi-agensi penguatkuasaan lain seperti Angkatan Tentera Malaysia (ATM), Polis Diraja Malaysia (PDRM), Jabatan Kastam Diraja Malaysia (JKDM) dan Eastern Sabah Security Command (ESSCOM); dan

- vi. Mengadakan publisiti yang meluas melalui media arus perdana dan media sosial bagi mempertingkatkan kesedaran serta mewujudkan kegerunan di kalangan peniaga.

Tuan Yang di-Pertua,

Bermula 23 Jun 2022 Penguat Kuasa KPDNHEP telah melaksanakan Pemeriksaan Ops ATM melibatkan barang kawalan seperti ayam, telur dan minyak masak secara harian di setiap peringkat rantai pembekalan dan pengedaran. Tujuannya adalah untuk memastikan keberadaan bekalan adalah stabil dan tiada isu berkaitan kegiatan sorok barang kawalan dan keperluan harian di pasaran selaras dengan Kempen Anti Sorok yang dilancarkan pada awal tahun ini. Ops ATM ini juga bertujuan memastikan harga yang dijual bermula 1 Julai 2022 tidak terlalu tinggi sehingga menyebabkan kegusaran kepada masyarakat dan bagi mengekang peniaga yang tidak beretika daripada mengambil keuntungan secara tidak munasabah.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI HAJAH ROHANI
BINTI HAJI ABDUL KARIM [BATANG LUPAR]**

TARIKH : 19 JULAI 2022 (SELASA)

SOALAN

DATO' SRI HAJAH ROHANI BINTI HAJI ABDUL KARIM [BATANG LUPAR] minta **MENTERI KESIHATAN** menyatakan usaha yang diambil oleh Kementerian untuk menangani masalah kesihatan mental yang melibatkan kes jenayah seperti tindakan ganas yang menyebabkan kecederaan atau kematian.

JAWAPAN

Tuan Yang di-Pertua,

1. Kementerian Kesihatan telah menyediakan perkhidmatan yang komprehensif termasuklah pencegahan, saringan, rawatan dan rehabilitasi pesakit yang mengalami masalah kesihatan mental.
2. Perkhidmatan pencegahan, saringan dan rawatan ringan dilakukan di peringkat fasiliti kesihatan primer di 1,161 klinik kesihatan dan lokaliti masing-masing. Kerjasama bersama-sama pelbagai badan bukan kerajaan (NGO) bagi meningkatkan kesedaran, aktiviti advokasi dan promosi bagi meningkatkan literasi kesihatan mental masyarakat telah banyak dilakukan. Selaras dengan usaha untuk memantapkan perkhidmatan kesihatan mental di negara ini, KKM juga akan menubuhkan Pusat Kecemerlangan Kesihatan Mental Kebangsaan (*National Centre of Excellence for Mental Health-NCEMH*) di mana penubuhan pusat ini berperanan sebagai peneraju dan penyelarass bagi program kesihatan

mental yang dijalankan oleh agensi kerajaan, swasta dan Badan Bukan Kerajaan (NGO).

3. Perkhidmatan rawatan sekunder dan rehabilitasi bagi pesakit-pesakit yang telah dikenal pasti menghidap penyakit mental telah disediakan di 56 hospital berpakar dan empat institusi mental di seluruh Malaysia dengan sokongan sebanyak 35 buah Pusat Kesihatan Mental Masyarakat (MENTARI) di peringkat komuniti. Rawatan susulan (*follow up*) dan *defaulter tracing* telah dilakukan oleh pasukan kesihatan mental di komuniti dalam mengenal pasti pesakit-pesakit yang tidak hadir mendapatkan rawatan termasuklah bagi memberikan rawatan suntikan di rumah bagi kes-kes *defaulter* bagi kepentingan masyarakat amnya.

4. Selain daripada rawatan *follow up* dan *defaulter tracing*, program rehabilitasi pesakit mental di hospital psikiatri dan MENTARI di komuniti adalah merangkumi pendidikan pesakit bersama keluarga melalui pelbagai *engagement* dan *family link program*, pesakit boleh mendapatkan rawatan awal tanpa perlu surat rujukan, sokongan psikososial dan sokongan pekerjaan turut disediakan.

5. Masyarakat diseru agak bersifat prihatin terhadap penduduk di persekitaran dan boleh menasihatkan sesiapa yang mungkin mengalami simptom kemurungan, bercakap seorang diri, kerisauan melampau dan sebagainya agar tampil segera mendapatkan rawatan di mana-mana fasiliti kesihatan yang terdekat. Ahli keluarga masing-masing dinasihatkan untuk membawa ahli keluarga yang disyaki menghidap masalah mental mendapatkan rawatan segera ke mana-mana fasiliti terdekat.

6. Bagi kes-kes kesihatan mental yang belum didiagnosis / belum dikenal pasti tetapi telah terlibat dengan keganasan atau kes jenayah, kerajaan telah menyediakan peraturan-peraturan dan undang-undang yang berkuatkuasa di bawah **Kanun Prosedur Jenayah (Akta 593)** dan **Akta Kesihatan Mental 2001** untuk dipatuhi. Perkara ini adalah di bawah bidang kuasa **Polis Diraja Malaysia (PDRM), Pejabat Pendakwa Raya dan Mahkamah.**

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK HAJI AHMAD JAZLAN BIN YAAKUB
[MACHANG]**

TARIKH : 20 JULAI 2022 (RABU)

SOALAN

DATUK HAJI AHMAD JAZLAN BIN YAAKUB [MACHANG] minta **MENTERI KANAN PENDIDIKAN** menyatakan apakah pelan dan jaminan Kementerian bagi memastikan setiap pelajar akan kekal bermotivasi dalam menuntut ilmu susulan keputusan kerajaan untuk memansuhkan Pentaksiran Tingkatan Tiga (PT3) dan adakah Sijil Pelajaran Malaysia (SPM) sahaja mencukupi untuk menjadi penanda aras kemahiran seseorang pelajar.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa melaksanakan penambahbaikan kepada sistem pentaksiran dan penilaian murid seiring dengan keperluan semasa. Dalam Sistem Pentaksiran Pendidikan Kebangsaan, murid ditaksir melalui Pentaksiran Berasaskan Sekolah (PBS) dan Peperiksaan Pusat.

Berikutan pemansuhan Ujian Pencapaian Sekolah Rendah (UPSR) mulai tahun 2021 dan Pentaksiran Tingkatan Tiga (PT3) mulai tahun 2022, KPM memberi tumpuan kepada pemerkasaan PBS, melibatkan komponen Pentaksiran Bilik Darjah (PBD), Pentaksiran Aktiviti Jasmani, Sukan dan Kokurikulum (PAJSK) serta Pentaksiran Psikometrik (PPsi).

Untuk makluman Ahli Yang Berhormat, PBS telah diperkenalkan lebih 10 tahun yang lalu, iaitu mulai tahun 2011 di peringkat sekolah rendah dan tahun 2012 di peringkat sekolah menengah. Pentaksiran ini bertujuan untuk menilai aspek intelek, emosi, rohani, jasmani dan sosial selaras dengan Falsafah Pendidikan Kebangsaan.

Dalam konteks PBD, guru memantau perkembangan, kemajuan dan penguasaan setiap murid dalam proses pembelajaran mereka termasuk kemahiran asas membaca, menulis dan mengira (3M). Dengan ini, guru boleh merancang dan mengubah suai kaedah Pengajaran dan Pembelajaran (PdP) bagi membantu setiap murid meningkatkan tahap penguasaan pembelajaran mereka. Pelaksanaan PBD secara berterusan dapat mempersiapkan murid dengan pengetahuan, kemahiran dan nilai sebagai asas yang kukuh untuk mengikuti pembelajaran di peringkat seterusnya.

Antara pendekatan dalam pengukuhan PBD bagi murid Tahun 4 hingga Tingkatan 3 mulai tahun 2022 adalah dengan menambah baik pengurusan ujian akhir sesi akademik melalui penyediaan soalan yang setara standardnya oleh KPM. Soalan tersebut disediakan oleh guru yang berkepakaran dalam pembinaan item dan disimpan dalam sistem bank soalan yang dibangunkan oleh KPM.

Untuk tujuan pelaksanaan ujian akhir sesi akademik, pihak sekolah akan menjana set soalan daripada sistem tersebut dan ditadbir di sekolah seperti mana ujian akhir tahun sebelum ini. Panduan penskoran juga akan disediakan untuk kemudahan guru.

Penambahbaikan kepada ujian akhir sesi akademik ini adalah bagi membolehkan guru dan ibu bapa bersama-sama membantu membangunkan potensi murid bermula daripada peringkat sekolah rendah. Dalam mencapai hasrat ini, pelaporan ujian akhir sesi akademik akan digunakan untuk membolehkan intervensi awal dilakukan bagi mengoptimumkan potensi murid. Pelaporan ini bukan untuk tujuan perbandingan pencapaian antara murid atau sekolah.

Untuk makluman Ahli Yang Berhormat, kejayaan dan kemenjadian murid haruslah dilihat secara holistik dan bukan semata-mata berdasarkan prestasi dalam bidang akademik sahaja. Justeru, pentaksiran melalui PAJSK dan PPSi juga diperkukuh bagi menilai perkembangan murid dalam aspek sukan, kokurikulum, nilai murni, minat dan kecenderungan serta pembentukan sahsiah.

KPM juga akan menambah baik dan memantapkan kaedah pelaporan PBD. Melalui kaedah ini, pencapaian murid dilaporkan secara menyeluruh sebanyak dua kali setahun iaitu pada pertengahan sesi akademik dan akhir sesi akademik dengan menggunakan deskriptor tahap penguasaan yang komprehensif dan jelas. Pelaporan ini juga menilai tahap usaha murid dalam pembelajaran. Di samping itu, guru kelas dan guru mata pelajaran akan memberi ulasan dan cadangan intervensi bagi mengoptimumkan potensi murid.

Selain daripada pelaporan PBD, laporan akhir sesi akademik akan turut disertakan dengan pelaporan PAJSK dan PPSi. Secara keseluruhan, penambahbaikan pelaporan PBS dapat memberi gambaran mengenai kemenjadian murid secara menyeluruh, komprehensif dan bermakna. Pemerkasaan PBS merupakan antara pendekatan KPM untuk beralih daripada pembelajaran berorientasi peperiksaan kepada pembelajaran yang lebih menyeronokkan untuk murid.

Selain itu, KPM juga mempergiatkan program latihan untuk pentadbir dan guru bagi meningkatkan kemahiran serta memantapkan pelaksanaan pentaksiran berterusan di sekolah. Guru juga akan terus dilatih untuk meningkatkan inovasi dan kreativiti dalam PdP, termasuk penggunaan teknologi digital.

Untuk makluman Ahli Yang Berhormat, peperiksaan Sijil Pelajaran Malaysia (SPM) adalah peperiksaan kebangsaan yang utama dan ditadbir secara berpusat pada akhir pendidikan peringkat menengah bagi tujuan pensijilan. Berdasarkan Kurikulum Standard Sekolah Menengah (KSSM), calon SPM perlu menduduki Ujian Lisan Bahasa Melayu dan Ujian Lisan Bahasa Inggeris. Bagi ujian Lisan Bahasa Inggeris, pentaksiran ini dijaikarkan dengan *Common European Framework of Reference for Languages* (CEFR), iaitu piawaian antarabangsa yang menunjukkan tahap

penguasaan bahasa. Pencapaian calon dilaporkan melalui gred SPM dan tahap CEFR.

Selain itu, Ujian Amali Sains (UAS) bagi mata pelajaran Fizik, Kimia, Biologi dan Sains Tambahan turut dilaksanakan dalam peperiksaan SPM. Pelaksanaan semula UAS secara peperiksaan pusat ini merupakan satu usaha KPM untuk mengukur penguasaan kemahiran proses sains dan kemahiran manipulatif murid aliran sains.

Untuk maklumat Ahli Yang Berhormat, bagi tujuan penandaarasan dan penjaminan kualiti pada peringkat antarabangsa, KPM turut melibatkan khidmat pakar pentaksiran dari luar negara iaitu *Cambridge Assessment English* (CAE), *Cambridge Assessment International Education* (CAIE), dan *Pearson*, United Kingdom dalam pengendalian peperiksaan SPM.

Dalam hal ini, sijil SPM yang merekodkan pencapaian akademik murid boleh digunakan untuk menyambung pengajian, memohon biasiswa dan menceburi bidang pekerjaan. Sijil SPM juga diiktiraf oleh badan pentaksiran antarabangsa bagi tujuan melanjutkan pengajian di luar negara.

Secara keseluruhan, KPM yakin pemerkasaan PBS melalui pelbagai pendekatan berupaya meningkatkan minat murid untuk terus belajar walaupun PT3 telah dimansuhkan. SPM akan terus kekal sebagai peperiksaan utama kebangsaan pada penghujung pendidikan menengah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN KHALID BIN ABD SAMAD
[SHAH ALAM]
TARIKH : 20 JULAI 2022 (RABU)

SOALAN

Tuan Khalid Bin Abd Samad [Shah Alam] minta **MENTERI KEWANGAN** menyatakan tanggungan Kerajaan terhadap hutang 1MDB dan langkah-langkah yang diambil untuk merampas harta golongan yang mengaut untung atas skandal ini.

JAWAPAN

Tuan Yang di-Pertua,

Setakat 30 Jun 2022, dengan andaian kadar tukaran wang asing USD1.00 bersamaan dengan RM4.50, baki komitmen hutang 1Malaysia Development Bhd (1MDB) adalah sebanyak RM32.08 bilion seperti berikut:

Bil.	Hutang	Prinsipal (RM Juta)	Faedah (RM Juta)	Jumlah (RM Juta)
1.	Sukuk IMTN terbitan 1MDB [P:RM5b, i:5.75%, M: 27 Mei 2039]	5,000	4,888	9,888
2.	Bon terbitan 1MDB Global Investment Limited (1MDG GIL) [P:USD3b, i:4.4%, M: 9 Mac 2023]	13,500	594	14,094

3.	Bon terbitan 1MDB Energy (Langat) Limited (1MELL) [P:USD1.75b, i:5.75%, M: 18 Okt 2022]	7,875	226	8,101
		26,375	5,708	32,083

Nota: P - Prinsipal, i - Faedah, M - Tahun Matang

Berikutan daripada masalah kewangan yang dihadapi sebelum ini, Kerajaan dari April 2017 hingga Mei 2022 juga telah menyalurkan bantuan kewangan dalam bentuk pinjaman/pendahuluan sebanyak **RM10.85 bilion** melalui Kementerian Kewangan (MOF) dan syarikat Menteri Kewangan Diperbadankan (MKD) bagi tujuan bayaran komitmen dan faedah hutang 1MDB. Pecahan penyaluran bantuan kewangan ini adalah seperti berikut:

Tahun	Jumlah Bantuan Kewangan (RM)
2017	6,465,472,974
2018	1,654,579,375
2019	914,070,262
2020	507,000,000
2021	459,280,000
2022 (sehingga Mei)	852,390,000
	10,852,792,611

Selain daripada bantuan kewangan langsung daripada Kerajaan tersebut, faedah hutang 1MDB juga dibiayai dengan menggunakan dana pemulihan aset 1MDB yang disimpan di dalam satu Akaun Amanah di bawah MOF yang diberi nama Akaun Amanah Mendapatkan Kembali Aset (*Aset Recovery*). Setakat 30 Jun 2022, jumlah dana pemulihan aset 1MDB yang telah berjaya didapatkan kembali adalah sebanyak **RM19.28 bilion** daripada beberapa mata wang asing termasuk dolar AS, dolar Singapura dan dolar Australia. Dana ini telah dan akan digunakan bagi tujuan pembayaran hutang 1MDB di mana setakat 30 Jun 2022, sebanyak

RM10.84 bilion telah digunakan untuk tujuan pelunasan hutang 1MDB. Pada masa ini, dana ini masih berbaki sebanyak **RM8.83 bilion** (termasuk hibah dan untung/rugi tukaran asing).

Tuan Yang di-Pertua,

Proses untuk mendapatkan semula dana 1MDB sedang berjalan dan ia merupakan suatu proses yang rumit dan panjang yang boleh memakan masa bertahun lamanya. Ini kerana ia bukan sahaja melibatkan kerjasama di antara beberapa agensi tempatan dengan agensi asing daripada pelbagai negara, malahan ia turut melibatkan proses perundangan di mahkamah dan proses rundingan penyelesaian.

Namun begitu, Kerajaan tetap komited dalam meneruskan usaha untuk mendapatkan semula semua dana berkaitan 1MDB yang telah diseleweng sama ada melalui tindakan undang-undang mahupun rundingan penyelesaian dengan matlamat utama untuk memaksimumkan pulangan bagi melunaskan hutang 1MDB dan mengurangkan beban kewangan Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : DATUK ROBERT LAWSON CHUAT
(BETONG)**

TARIKH : 20 JULAI 2022 (RABU)

SOALAN

DATUK ROBERT LAWSON CHUAT (BETONG) minta **MENTERI
PERTANIAN DAN INDUSTRI MAKANAN** menyatakan apakah inisiatif-
inisiatif Kementerian untuk menentukan stok ayam di peringkat ladang
adalah mencukupi untuk keperluan rakyat Malaysia.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) melalui Jabatan Perkhidmatan Veterinar (DVS) sentiasa memantau dan mengadakan sesi libat urus dengan semua pihak berkepentingan dalam rantai pengeluaran bekalan ayam termasuk di peringkat ladang bagi memastikan bekalan dan kelangsungan pengeluaran ayam negara berada pada tahap yang stabil dan mencukupi.

Melalui sesi libat urus yang diadakan, penternak dan pengusaha ladang-ladang penternakan ayam juga telah menyatakan komitmen untuk bersama-sama memperkukuh sekuriti makanan negara melalui tahap pengoperasian ladang pada tahap yang optimum demi menjamin bekalan ayam yang berterusan.

Kerajaan juga telah menubuhkan Jawatankuasa Teknikal Menangani Isu Sekuriti Bekalan Makanan Negara bagi memantau status bekalan komoditi utama makanan negara serta mengenal pasti isu dan mencari jalan penyelesaian jangka pendek, sederhana dan panjang terhadap isu sekuriti makanan negara. Antara langkah proaktif jangka pendek yang dilaksanakan bagi memastikan bekalan ayam kekal terjamin, termasuk:

- (i) menghentikan eksport ayam sebanyak 3.6 juta ekor (*commercial broiler*) sebulan bermula 1 Jun 2022 bagi menstabilkan bekalan ayam di pasaran tempatan. Sekatan pengeksportan bersifat sementara sehingga harga dan pengeluaran ayam kembali stabil.
- (ii) membatalkan kelulusan kuota import (*Approved Permit – AP*) barangan makanan dari luar negara termasuk bagi ayam bulat dan keratan ayam
- (iii) pelaksanaan stokpail ayam untuk menangani kekurangan bekalan ayam di pasaran menerusi Lembaga Pertubuhan Peladang (LPP) yang akan melibatkan Pertubuhan Peladang secara gabungan;

- (iv) mempermudah proses pembayaran tuntutan subsidi harga ayam dengan membenarkan bayaran pendahuluan tuntutan khususnya penternak kecil dan sederhana;
- (v) memudah cara prosedur import (IP) Jabatan Perkhidmatan Kuarantin dan Pemeriksaan Malaysia (MAQIS) ke atas empat (4) komoditi merangkumi soya, gandum, jagung dan makanan ternakan berasaskan haiwan dan tumbuhan melalui penangguhan fi permit serta mewujudkan *priority lane* bagi proses kemasukan pantas sehingga bekalan ayam kembali stabil.
- (vi) mempercepatkan proses keperluan lesen pengimportan dibawah DVS melalui kelulusan secara interim bermula 1 Julai 2022 dengan proses kelulusan dalam masa tujuh (7) hari bekerja berbanding dengan 30 hingga 90 hari yang akan memberi manfaat kepada 380 syarikat pengimport bahan makanan ternakan;
- (vii) memberikan pengecualian khas bagi pengambilan pekerja asing dalam industri penternakan ayam mengikut keperluan bagi membolehkan aktiviti penternakan ayam beroperasi pada tahap optimum sekaligus menjamin kesinambungan pengeluaran;
- (viii) mengkaji mekanisme mengurangkan kos minyak sawit mentah (*crude palm oil*) kepada syarikat-syarikat pengilangan makanan ternakan (*feedmill operators*) yang dikenali pasti bagi mengurangkan kos makanan ternakan; dan
- (ix) penambahan abattoir dan loji pemprosesan luar negara bagi meningkatkan dan mempelbagaikan sumber import bekalan ayam.

Untuk makluman Ahli Yang Berhormat jua, Kerajaan telah memperuntukkan subsidi sebanyak RM369.5 juta bagi melanjutkan tempoh pemberian subsidi bermula 1 Julai 2022 hingga 31 Ogos 2022. Manakala jumlah subsidi yang diperuntukkan bagi tempoh 5 Februari 2022 hingga 30 Jun 2022 adalah sebanyak RM730 juta. Ini menjadikan jumlah subsidi yang diluluskan sejak 5 Februari 2022 adalah sebanyak RM1.1

bilion. Setakat 15 Julai 2022, sebanyak 7,680 permohonan subsidi telah diluluskan berjumlah RM632.6 juta.

Kerajaan melaksanakan langkah intervensi melalui pemberian subsidi kepada penternak ini bagi meringankan beban penternak yang berhadapan dengan kenaikan kos pengeluaran ayam. Langkah intervensi ini diharap dapat menstabilkan kembali bekalan sekaligus memastikan Keluarga Malaysia dapat membeli ayam dan telur dengan harga yang berpatutan dan tidak terbeban dengan cabaran kos sara hidup.

Kerajaan turut bersetuju dengan pelaksanaan Dana Pembiayaan Agromakanan Keluarga Malaysia (DPAKM) di bawah Agrobank yang melibatkan peruntukan sebanyak RM800 juta bagi menjamin kesinambungan aktiviti pengeluaran makanan. Program DPAKM ini menawarkan kemudahan pembiayaan yang khusus sebanyak RM300 juta bagi ternakan ayam. Had maksimum pembiayaan ditetapkan sehingga RM5 juta dengan tempoh pembiayaan sehingga 8.5 tahun termasuk 6 bulan moratorium ditawarkan kepada semua golongan sasar.

Bagi jangka panjang pula inisiatif yang diambil meliputi penanaman jagung bijian dalam negara bagi mengurangkan kebergantungan kepada sumber import, menjalankan kajian untuk menghasilkan bahan mentah gantian dari sumber tempatan dan bekerjasama dengan Kerajaan Negeri bagi meningkatkan keluasan tanah untuk aktiviti pertanian di bawah Lesen Pendudukan Sementara.

Pada masa yang sama, bagi memastikan isu sekuriti makanan negara sentiasa diberi perhatian, Kementerian turut memastikan isu-isu tersebut dibincang dan dibawa kepada pertimbangan Jemaah Menteri menerusi platform seperti Mesyuarat Jawatankuasa Kabinet Mengenai Dasar Sekuriti Makanan Negara (FSCC), Mesyuarat Jawatankuasa Teknikal Menangani Isu Sekuriti Bekalan Makanan Negara dan Mesyuarat Jawatankuasa Pasukan Jihad Tangani Inflasi. Kerajaan akan terus memainkan peranan efektif dengan kerjasama semua pihak bagi menjamin kemampuan memperoleh bekalan makanan yang mencukupi dan selamat pada harga berpatutan secara berterusan oleh Keluarga Malaysia. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN SIM CHEE KEONG
[BUKIT MERTA JAM]**

TARIKH : 20 JULAI 2022 (RABU)

SOALAN

TUAN SIM CHEE KEONG [BUKIT MERTA JAM] minta **MENTERI KANAN PENDIDIKAN** menyatakan sama ada wakil rakyat ataupun penderma lain perlu mendapatkan kebenaran ataupun memaklumkan kepada Pejabat/Jabatan/Kementerian Pendidikan sekiranya mereka ingin membuat sumbangan kepada sekolah jika menerima permohonan daripada pihak sekolah itu sendiri.

JAWAPAN

Tuan Yang di-Pertua,

Kementerian Pendidikan Malaysia (KPM) mengalu-alukan sumbangan dan kerjasama pihak luar dalam melaksanakan program dan aktiviti pendidikan di sekolah.

Untuk makluman Ahli Yang Berhormat, Dasar Sekolah Milik Masyarakat yang diperkenalkan pada 1984 menetapkan semua pihak sama ada dalam kalangan sektor swasta atau sektor bukan swasta termasuklah wakil rakyat dialu-alukan untuk turut bersama-sama menyumbang kepada pembangunan pendidikan negara.

Dalam konteks ini, pihak sekolah juga boleh memohon sumbangan daripada pihak luar bagi tujuan mengumpul dana daripada pihak individu dalam komuniti atau masyarakat bagi membiayai program pendidikan di sekolah KPM. Perkara ini telah dijelaskan melalui Garis Panduan Penjanaan Dana Masyarakat atau *Crowdfunding* sebagaimana yang dinyatakan dalam Surat Pekeliling Ikhtisas Kementerian Pendidikan Malaysia Bilangan 3 Tahun 2018: Panduan Penyaluran dan Penerimaan Sumbangan daripada Sektor Swasta dan Sektor Bukan Swasta kepada Sekolah Kerajaan dan Sekolah Bantuan Kerajaan Kementerian Pendidikan Malaysia. Surat pekeliling ikhtisas (SPI) tersebut telah dikeluarkan sebagai rujukan kepada pihak pemberi sumbangan dan pihak sekolah sebagai penerima sumbangan. SPI tersebut juga menjelaskan tentang prosedur, tatacara dan syarat pemberian sumbangan.

Sebarang permohonan dan pemberian sumbangan adalah tertakluk kepada SPI tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN HAJI YUSUF BIN ABD WAHAB
[TANJONG MANIS]
TARIKH : 20 JULAI 2022 (RABU)

SOALAN

TUAN HAJI YUSUF BIN ABD WAHAB [TANJONG MANIS] minta **MENTERI KEWANGAN** menyatakan berapa jumlah penerima BKM yang layak dan sudah berdaftar di Parlimen Tanjong Manis. Apakah langkah-langkah Kementerian untuk memastikan supaya tidak berlaku keciciran dalam senarai penerima bantuan BKM tersebut.

JAWAPAN

Tuan Yang di-Pertua,

Untuk makluman Yang Berhormat, Kerajaan amat mengambil berat terhadap semua golongan dan lapisan masyarakat dengan memastikan bantuan tunai langsung yang disediakan pasca-pandemik turut disalurkan kepada golongan B40. Oleh itu, pada tahun 2022, Kerajaan telah menyediakan **Bantuan Keluarga Malaysia (atau BKM) berjumlah 8 bilion ringgit** untuk mereka yang layak bagi meringankan kos sara hidup dan beban kewangan semasa.

Bagi penerima BKM Parlimen Tanjong Manis, terdapat **3,592 penerima yang melibatkan peruntukan sebanyak 3.1 juta ringgit**. Maklumat penerima BKM ini akan direkodkan dan digunakan semula bagi program lain yang dirancang Kerajaan tertakluk kepada syarat kelayakan di samping tempoh permohonan baharu serta rayuan yang dibuka dari semasa ke semasa. Bagi tahun 2022, permohonan dan rayuan BKM telah dibuka pada Januari 2022 dan Jun 2022 bagi memastikan **tiada keciciran penerima**.

Kerajaan sentiasa komited memastikan semua bantuan Kerajaan adalah berkesan dan menepati kumpulan sasaran yang ditetapkan terutamanya golongan yang memerlukan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 20 JULAI 2022 (RABU)

SOALAN

TUAN AHMAD BIN HASSAN [PAPAR] minta **MENTERI KANAN PENDIDIKAN** menyatakan berapa jumlah tanah di Sabah yang telah dipindah milik kepada Pesuruhjaya Tanah Persekutuan namun pembinaan baru sekolah masih belum/tidak dibina sekian lama. Nyatakan sebab-sebabnya dan adakah Kementerian bercadang untuk menyerahkan semula tanah tersebut kepada Kerajaan Sabah.

JAWAPAN

Tuan Yang di-Pertua,

Kementerian Pendidikan Malaysia (KPM) komited untuk memastikan projek pembangunan dilaksanakan di setiap tapak sekolah yang telah ditukar hak milik kepada Pesuruhjaya Tanah Persekutuan (PTP) mengikut keperluan.

Untuk makluman Ahli Yang Berhormat, sehingga 19 Julai 2022, sebanyak 582 tapak sekolah di negeri Sabah telah dipindah milik kepada Pesuruhjaya Tanah Persekutuan (PTP). Daripada jumlah tersebut, sebanyak 302 tapak telah dilaksanakan projek pembangunan meliputi 201 projek menaik taraf dan membangunkan semula bangunan daif di sekolah dan baki 101 projek bukan daif iaitu pembinaan baharu dan tambahan bangunan sekolah. Manakala, bagi 280 tapak yang belum dilaksanakan projek pembangunan, KPM mempunyai perancangan berdasarkan kepada analisis dan keperluan semasa. Dalam hal ini, setiap pelaksanaan adalah tertakluk kepada kelulusan agensi pusat dan kedudukan kewangan semasa. Sehubungan itu, KPM tidak bercadang untuk menyerahkan tanah pendidikan milik PTP kepada Kerajaan Negeri. Bagi tanah yang akan tamat tempoh pajakan 99 tahun, KPM akan memohon pelanjutan bagi memastikan perancangan pembangunan di tapak pendidikan tidak terjejas.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN
DARIPADA : TAN SRI HAJI IDRIS BIN JUSOH
(BESUT)
TARIKH : 20 JULAI 2022 (RABU)

SOALAN

TAN SRI HAJI IDRIS BIN JUSOH (BESUT) minta **MENTERI PERTANIAN DAN INDUSTRI MAKANAN** menyatakan langkah Kementerian dalam memperkenalkan mekanisme strategik kepada pengusaha ladang ternakan dan sayuran, khasnya dalam membendung manipulasi harga barang mentah oleh pihak yang tidak bertanggungjawab yang akan memberi kesan kepada harga akhir produk makanan.

JAWAPAN

Tuan Yang di-Pertua,

Untuk makluman Ahli Yang Berhormat, usaha untuk membendung manipulasi harga barang mentah oleh pihak yang tidak bertanggungjawab merupakan usaha kolektif di antara beberapa kementerian, termasuklah Kementerian Pertanian dan Industri Makanan (MAFI) yang bertanggungjawab untuk memastikan keperluan makanan rakyat dapat dipenuhi. Bagi mengurangkan risiko manipulasi dalam pasaran, Kementerian sedang melaksanakan beberapa mekanisme strategik antaranya :

1. **Melaksanakan Program Khidmat Pemasaran MAFI** atau lebih dikenali sebagai Program Ladang Kontrak yang menyediakan sokongan *forward agreement* dan harga lantai kepada pengeluar. Program ini bertujuan memberi jaminan pasaran dengan harga yang munasabah kepada pengeluar pertanian. Sekurang-kurangnya 50,000 tan metrik hasil pengeluaran akan dipasarkan melalui kerjasama strategik dengan usahawan-usahawan pemasar, pasaraya, pengeksport serta pemproses produk agromakanan. Pada tahun 2022 disasarkan sebanyak 956 *forward agreement* akan ditandatangani dengan jangkaan bekalan hasil pengeluaran sebanyak 7,500 tan metrik yang bernilai RM15 juta;
2. **Melaksanakan Program Jualan Terus Dari Ladang Keluarga Malaysia (JTDL KM)** di mana pengguna ditawarkan penjimatan harga di antara lima (5) hingga 10 peratus bagi komoditi sayur, buah, ikan terpilih serta ayam dan telur. Program ini sedang dilaksanakan bermula bulan Jun 2022 sehingga Disember 2022 dengan sasaran sebanyak 1,500 program akan dilaksanakan di seluruh negara. Dianggarkan seramai 2,900 orang usahawan dan 868,000 orang pengunjung akan mendapat faedah daripada pelaksanaan program ini. Bermula 1 Jun sehingga 10 Julai 2022, program JTDLKM telah dilaksanakan di 362 lokasi di mana

sebanyak 587 tan metrik sayur, buah, ayam, ikan dan pelbagai produk agromakanan yang bernilai RM 4.88 juta telah dipasarkan;

3. **Menggalakkan transformasi usahawan mikro, kecil dan sederhana ke arah pendigitalan** agar dapat memanfaatkan peluang mempelbagaikan perniagaan dalam ekonomi digital. Justeru, platform *e-commerce* Agrobazaar Online telah dinaiktaraf bagi memenuhi keperluan 6,198 pekedai aktif untuk mencapai sasaran nilai jualan sekurang-kurangnya RM2 juta pada tahun 2022. Pada masa yang sama, kerjasama strategik dengan platform e-dagang swasta turut diperhebatkan bagi meluaskan jaringan pasaran serta memberi penjimatan kepada pengguna; dan
4. **MAFI turut mengambil pendekatan kerjasama strategik dengan usahawan sektor peruncitan** melalui program-program seperti pembangunan outlet Agrobazaar Kedai Rakyat, Pasar Tani dan Karavan tani di mana usahawan-usahawan ini menyediakan outlet pemasaran untuk meningkatkan akses pembekalan terus dari pengeluar. Strategi ini bertujuan untuk mengurangkan kebarangkalian berlakunya manipulasi harga dalam rantai pembekalan sehingga merugikan pengeluar dan pengguna. Sehingga 30 Jun 2022, terdapat 1,291 outlet pemasaran runcit bimbingan Kementerian yang aktif di seluruh negara. Disasarkan sekurang-kurangnya sejumlah 875 outlet pemasaran runcit akan dinaiktaraf serta dibangunkan sepanjang Rancangan Malaysia Ke-12.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT MESYUARAT KEDUA PENGGAL KELIMA
PARLIMEN KEEMPAT BELAS (2022)**

PERTANYAAN : LISAN

DARIPADA : TUAN GOBIND SINGH DEO [PUCHONG]

TARIKH : 20 JULAI 2022 (RABU)

SOALAN

Tuan Gobind Singh Deo [Puchong] minta **MENTERI KOMUNIKASI DAN MULTIMEDIA** menyatakan status perangkaan Akta Majlis Media Malaysia. Adakah Kementerian masih berhasrat untuk menubuhkan Majlis Media Malaysia.

JAWAPAN

Tuan Yang Dipertua,

Kementerian ini telah menubuhkan satu *task force* untuk meneliti secara terperinci draf Rang Undang-Undang (RUU) Majlis Media Malaysia (MMM) yang telah dikemukakan oleh Jawatankuasa Pro-Tem Majlis Media Malaysia dalam usaha memuktamadkan beberapa perkara dasar yang berkaitan.

Setelah mengadakan beberapa siri perbincangan, *task force* telah mengenal pasti terdapat beberapa perkara dasar yang melibatkan bidang kuasa Kementerian-Kementerian lain. Sehubungan itu, Kementerian ini akan mengadakan sesi libat urus bersama pihak-pihak berkepentingan bagi mendapatkan maklum balas lanjut berhubung cadangan RUU tersebut sebelum ianya dapat dimuktamadkan.

Pertimbangan lebih mendalam mengenai perkara ini adalah penting demi memastikan sekiranya Majlis Media Malaysia direalisasikan kelak akan saling melengkapi undang-undang sedia ada. Di samping itu, impak pelaksanaannya juga perlu mengambil kira aspek kedaulatan, keselamatan dan keharmonian negara terpelihara bersesuaian dengan senario masa kini.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN NIK MOHAMAD ABDUH BIN NIK
ABDUL AZIZ [BACHOK]**

TARIKH : 20 JULAI 2022 (RABU)

SOALAN

TUAN NIK MOHAMAD ABDUH BIN NIK ABDUL AZIZ [BACHOK] minta **MENTERI KANAN PENDIDIKAN** menyatakan perancangan untuk mewujudkan sekolah berasrama penuh (SBP) di Bachok bagi melahirkan modal insan yang berkualiti.

JAWAPAN

Tuan Yang di-Pertua,

Untuk makluman Ahli Yang Berhormat, sehingga kini, terdapat lima Sekolah Berasrama Penuh (SBP) yang sedang beroperasi di negeri Kelantan iaitu :

- i. Sekolah Menengah Sains Tengku Muhammad Faris Petra, Kota Bharu;
- ii. Sekolah Menengah Sains Machang;
- iii. Sekolah Menengah Sains Pasir Puteh;
- iv. Sekolah Menengah Sains Jeli; dan
- v. Sekolah Menengah Sains Gua Musang.

Untuk makluman Ahli Yang Berhormat juga, terdapat satu lagi SBP yang sedang dalam proses pembinaan iaitu SBP Integrasi Tanah Merah di Tanah Merah, Kelantan. Berdasarkan kepada rekod KPM, enrolmen murid di SBP seluruh negeri Kelantan masih belum mencapai kapasiti yang optimum dan SBP sedia ada mampu menampung permintaan murid di negeri tersebut. Oleh yang demikian, buat masa ini, Kementerian Pendidikan Malaysia (KPM) tidak mempunyai perancangan untuk membina SBP baharu di Bachok, Kelantan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

DARIPADA : TUAN CHA KEE CHIN (RASAH)

TARIKH : 20 JULAI 2022 (RABU)

SOALAN

TUAN CHA KEE CHIN (RASAH) minta **MENTERI PERTANIAN DAN INDUSTRI MAKANAN** menyatakan berapa jumlah subsidi yang telah disalurkan kepada para penternak ayam sejak subsidi ayam diberikan mulai awal tahun 2022 dan bagaimana mekanisme penyaluran subsidi ini dilakukan. Selepas pengumuman Kementerian bahawa harga siling ayam pada RM9.40 sekilo, berapakah subsidi yang akan disalurkan oleh Kementerian setiap bulan.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan telah meluluskan pemberian subsidi ayam dan telur bermula dari 5 Februari 2022 sehingga 30 Jun 2022 dengan peruntukan sebanyak RM730 juta. Kadar pemberian subsidi untuk ayam pedaging ialah RM0.60 per kilogram untuk tempoh 5 Februari 2022 hingga 30 Mac 2022. Kerajaan bersetuju untuk meningkatkan kadar subsidi kepada RM1.40 per kilogram bermula 1 April sehingga 30 Jun 2022. Manakala bagi penternak ayam telur pula, kadar pemberian subsidi ialah RM0.05 sebiji bermula 5 Februari hingga 30 Jun 2022 bagi telur gred A, B dan C.

Kerajaan juga bersetuju untuk melanjutkan tempoh pemberian subsidi dalam tempoh yang sama iaitu RM1.20 sekilogram kepada penternak ayam pedaging dan RM0.03 sebiji bagi telur gred A, B, dan C. kepada penternak ayam penelur.

Kementerian Pertanian dan Industri Makanan (MAFI) melalui Jabatan Perkhidmatan Veterinar (DVS) telah memproses permohonan subsidi sejak 28 Februari 2022. Sehingga 15 Julai 2022, sebanyak 7,680 permohonan telah diluluskan berjumlah RM632.6 juta.

Pada 29 Jun 2022, Kerajaan bersetuju untuk melanjutkan tempoh pemberian subsidi yang berakhir pada 30 Jun 2022 sehingga 31 Ogos 2022. Bermula 1 Julai 2022, harga subsidi yang diluluskan ialah RM1.20 per kilogram bagi ayam pedaging dan RM0.03 sebiji bagi telur. Jumlah peruntukan tambahan disediakan sebanyak RM369.5 juta dan menjadikan jumlah keseluruhan subsidi untuk penternak ayam sebanyak RM1.1 bilion.

Bagi mendapatkan subsidi ini, Jabatan Perkhidmatan Veterinar (DVS) telah menyediakan tatacara permohonan seperti mekanisma berikut:

- (i) penternak ayam pedaging dan penelur perlu mengemukakan permohonan secara online kepada Jabatan Perkhidmatan

Veterinar (DVS) melalui laman sesawang www.unggasdvs.my;

- (ii) semakan dan verifikasi ke atas permohonan tersebut akan dibuat di peringkat DVS Negeri, manakala kelulusan permohonan akan ditentukan di peringkat ibupejabat menerusi Jawatankuasa Kelulusan Subsidi Ayam dan Telur; dan
- (iii) bagi permohonan yang diluluskan, pembayaran subsidi akan dilaksanakan oleh Agrobank sebagai bank pembayar kepada akaun pemohon dalam tempoh tiga (3) hari bekerja.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN LARRY SOON @ LARRY SNG WEI SHIEN [JULAU]

TARIKH : 20 JULAI 2022 (RABU)

SOALAN

TUAN LARRY SOON @ LARRY SNG WEI SHIEN [JULAU] minta **MENTERI KANAN PENDIDIKAN** menyatakan :-

- (a) berapa jumlah sekolah yang dikategorikan sebagai sekolah daif di negeri Sarawak. Nyatakan juga secara terperinci jumlah sekolah daif di dalam kawasan Parlimen Julau; dan
- (b) langkah proaktif Kementerian dalam menangani isu sekolah-sekolah daif di negeri Sarawak khususnya dalam menambah baik fasiliti dan kemudahan asas.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam memastikan fasiliti bangunan dan kemudahan sekolah dalam keadaan baik agar menjamin keselamatan dan keselesaan warga sekolah.

KPM telah mengenal pasti sebanyak 351 buah sekolah yang mempunyai bangunan daif di negeri Sarawak berdasarkan analisis Skor Gred Impak. Daripada jumlah tersebut, sebanyak 107 sekolah berskala 7 yang merupakan bangunan sekolah yang tidak selamat dengan pengesahan daripada Jabatan Kerja Raya (JKR) dan 244 sekolah berskala 6 yang mempunyai bangunan yang tidak selamat dengan pengesahan daripada pihak teknikal pejabat pendidikan daerah (PPD) atau jabatan pendidikan negeri (JPN). Khusus di Parlimen Julau, jumlah sekolah yang mempunyai bangunan daif adalah 10 buah sekolah melibatkan 6 sekolah berskala 7 iaitu SK Assun, SK Udin, SK Ng Ensiring, SK Nanga Kara, SMK Julau dan SMK Pakan. Manakala 4 sekolah berskala 6 adalah SK Balong, SK Penghulu Andin, SK Sg Paoh dan SJKC Chung Hien.

Untuk makluman Ahli Yang Berhormat, KPM telah melaksanakan projek gantian bagi bangunan daif di SK Sg Paoh dan SK Udin menerusi peruntukan projek RM1 Billion. Ketika ini projek SK Sg Paoh adalah dalam fasa pembinaan manakala projek SK Udin berada pada status prabina.

Selain itu, KPM telah mengemukakan permohonan pembinaan gantian bangunan daif di SMK Julau dan SMK Pakan dalam RMKe-12 *Rolling Plan* 3 (RP3) Tahun 2023 untuk pertimbangan dan kelulusan agensi pusat. Bagi SK Penghulu Andin, pihak KPM sedang mendapatkan kelulusan pengesahan tidak selamat dan syor daripada pihak Jabatan Kerja Raya.

Manakala bagi SK Asun, SK Nanga Kara, SK Balong, SJKC Chung Hien dan SK Ng Ensiring, pihak KPM sedang dalam proses untuk menyelesaikan isu berkaitan pemilikan tapak sekolah terlebih dahulu sebelum memohon pembinaan gantian dalam Rancangan Malaysia Lima

Tahun.

Untuk makluman Ahli Yang Berhormat, KPM sentiasa proaktif dan memberi keutamaan dalam usaha menangani sekolah yang mempunyai bangunan daif di negeri Sarawak. Bagi bangunan-bangunan daif pada skala 6 dan skala 7, KPM akan mengemukakan cadangan menaik taraf atau membina bangunan gantian kepada pihak agensi pusat untuk dipertimbangkan dalam Rancangan Malaysia Ke-12. Walau bagaimanapun, kelulusan dan pelaksanaan projek ini adalah tertakluk kepada keutamaan dan kedudukan kewangan semasa kerajaan.

Selain itu, KPM dan JKR Sarawak turut melaksanakan projek baik pulih bangunan daif di sekolah-sekolah negeri Sarawak melalui projek *Industrial Building System* (IBS) dan menggunakan peruntukan di bawah projek RM1 Bilion.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN YUSUF BIN ABD. WAHAB
(TANJONG MANIS)**

TARIKH : 20 JULAI 2022 (RABU)

SOALAN

TUAN YUSUF BIN ABD. WAHAB (TANJONG MANIS) minta **MENTERI PERTANIAN DAN INDUSTRI MAKANAN** bilakah pihak Kementerian akan membaik pulih ban-ban pertanian yang mendap serta ada yang pecah dibadai ombak monsun terutama di Kampung Tekajong, Kampung Bruit, Kampung Paloh dan Kampung Sebako. Masalah ban-ban pecah dan pintu air yang rosak menyukarkan aktiviti pertanian dijalankan oleh golongan petani dan pekebun.

JAWAPAN

Tuan Yang di-Pertua,

Untuk makluman Ahli Yang Berhormat, pihak Kementerian Pertanian dan Industri Makanan (MAFI) sentiasa mengambil kira pelbagai permasalahan yang dihadapi oleh golongan petani termasuklah berkaitan kerosakan infrastruktur pengairan dan saliran pertanian di dalam perancangan kerja dan program kementerian.

Berikutan itu, MAFI melalui Bahagian Pengairan dan Saliran Pertanian dan Jabatan Pengairan dan Saliran (JPS) Negeri Sarawak telah mengemukakan permohonan butiran projek baharu di bawah *Rolling Plan* ke-3 tahun 2023, RMKe-12 kepada Unit Perancangan Ekonomi (EPU), yang mana permohonan ini menjurus kepada skop membaikpulih dan menaiktaraf infrastruktur sedia ada, yang merangkumi baikpulih pelbagai komponen/struktur sedia ada serta pembinaan komponen/struktur baru termasuk ban dan jambatan di kawasan Kampung Tekajong, Kampung Bruit, Kampung Paloh dan Kampung Sebako bagi menambahbaik keupayaan skim tersebut serta sekaligus dapat mempertingkatkan keberhasilan tanaman.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : TUAN AKMAL NASRULLAH BIN MOHD.
NASIR (JOHOR BAHRU)**

TARIKH : 20 JULAI 2022 (RABU)

SOALAN

minta **MENTERI PERTANIAN DAN INDUSTRI MAKANAN** menyatakan inisiatif yang diambil Kementerian dalam menangani kerenah birokrasi proses tuntutan subsidi penternak bagi Skim Kawalan Harga Keluarga Malaysia (SKHKM).

JAWAPAN

Tuan Yang di-Pertua,

Untuk makluman Ahli Yang Berhormat, demi menjaga kepentingan Keluarga Malaysia, Kerajaan telah meluluskan pemberian subsidi ayam dan telur kepada penternak bagi menampung kenaikan kos input pengeluaran dengan jumlah keseluruhan subsidi bermula dari 5 Februari 2022 sehingga 31 Ogos 2022 adalah sebanyak RM1.1 bilion. Kementerian Pertanian dan Industri Makanan (MAFI) melalui Jabatan Perkhidmatan Veterinar (DVS) sedang memproses permohonan subsidi sejak 28 Februari 2022.

Bagi memudahkan proses tuntutan subsidi penternak, pelbagai inisiatif telah dilaksanakan seperti berikut:

- (i) mempermudah prosedur permohonan subsidi dengan mengurangkan tiga (3) peringkat semakan dokumen di daerah, negeri dan ibu pejabat DVS) kepada satu (1) peringkat sahaja iaitu di negeri sebelum kelulusan pembayaran dilaksanakan di peringkat ibu pejabat DVS;
- (ii) melaksanakan pembayaran subsidi yang diluluskan dalam tempoh tiga (3) hari bekerja melalui Agrobank;
- (iii) mengurangkan dokumen permohonan daripada 13 dokumen kepada satu (1) dokumen sahaja iaitu ringkasan invois dalam bentuk penyata jualan;
- (iv) membenarkan bayaran pendahuluan tuntutan khususnya penternak kecil dan sederhana;
- (v) melaksanakan permohonan secara atas talian melalui Google Forms di laman web www.unggasdvs.my;
- (vi) menggerakkan lebih ramai pegawai di peringkat negeri untuk menyegerakan proses permohonan;

- (vii) mengeluarkan Garis Panduan Permohonan Subsidi yang juga boleh diakses melalui laman web DVS iaitu www.dvs.gov.my bagi membolehkan penternak merujuk syarat-syarat permohonan; dan
- (viii) mengadakan libat urus bersama penternak ayam untuk menerangkan tatacara dan syarat permohonan supaya permohonan yang dikemukakan lengkap dan teratur. Sehingga 15 Julai 2022, sebanyak 11 sesi libat urus telah diadakan secara atas talian dengan penternak dan persatuan penternak di seluruh negara.

Setakat 15 Julai 2022, sebanyak 7,680 permohonan subsidi telah diluluskan berjumlah RM632.6 juta. MAFI akan terus komited untuk mempermudah prosedur permohonan bagi mempercepatkan pembayaran subsidi kepada penternak ayam bagi merancakkan aktiviti pengeluaran ke arah meningkatkan jaminan bekalan makanan negara.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

DARIPADA : PUAN WONG SHU QI [KLUANG]

TARIKH : 20 JULAI 2022 (RABU)

SOALAN

Puan Wong Shu Qi [Kluang] minta **MENTERI KOMUNIKASI DAN MULTIMEDIA** menyatakan senarai lokasi utama seperti universiti, pelabuhan, taman industri serta lokasi pelancongan yang telah lengkap dengan kelajuan internet 100Mbps.

JAWAPAN

Tuan Yang Dipertua,

Kementerian melalui Suruhanjaya Komunikasi dan Multimedia Malaysia (SKMM) sentiasa cakna dan prihatin akan kualiti perkhidmatan internet jalur lebar di Malaysia. Sasaran Pelan Jalinan Digital Negara (JENDELA) Fasa 1 (2020-2022) adalah menyediakan 7.5 juta premis dengan capaian gentian optik manakala peratusan liputan 4G di kawasan berpenduduk di seluruh negara adalah pada 96.9% dengan purata kelajuan muat turun mudah alih 35Mbps. Pencapaian JENDELA setakat suku pertama 2022 seperti berikut:

- (i) Sebanyak 7.027 juta premis tersedia dengan capaian gentian optik, berbanding 4.957 juta sebelum pelaksanaan JENDELA;
- (ii) Purata kelajuan muat turun mudah alih telah meningkat kepada 40.13Mbps, melebihi sasaran yang ditetapkan iaitu 35Mbps; dan

- (iii) Peratusan liputan 4G di kawasan berpenduduk di seluruh negara telah meningkat kepada 95.7% pada suku pertama 2022 berbanding 91.8% sebelum pelaksanaan JENDELA.

Melalui JENDELA Fasa 2 (2023-2025) pula, Kerajaan akan terus meningkatkan usaha bagi memberikan akses gentian optik kepada 9 juta premis di seluruh negara, meningkatkan kadar kelajuan purata jalur lebar mudah alih kepada 100Mbps melalui pelaksanaan 5G, dan meluaskan liputan jalur lebar kepada 100% kawasan berpenduduk di seluruh negara.

Pelaksanaan rangkaian 5G telah dimulakan pada tahun 2021 yang melibatkan kawasan sekitar Putrajaya, Cyberjaya dan Kuala Lumpur di mana perkhidmatan jalur lebar 5G telah mencapai kelajuan purata melebihi 600Mbps.

Untuk makluman Ahli Yang Berhormat, kesemua 20 universiti awam di Malaysia juga telah lengkap dengan kemudahan internet berkelajuan 100Mbps. Di samping itu, di bawah Program Industry4WRD Jalur Lebar Berkelajuan Tinggi (*High Speed Broad Band- HSBB*) bagi memperkukuhkan kesambungan digital di kawasan perindustrian dalam mengadaptasi teknologi Industri 4.0, sebanyak 37 taman industri di seluruh Malaysia telah dinaik taraf perkhidmatan jalur lebar berkelajuan tinggi dengan kelajuan internet maksimum sehingga 1Gbps.

Kesemua sasaran yang telah ditetapkan ini akan membolehkan rakyat menikmati jalur lebar berkelajuan tinggi di seluruh negara termasuklah di kawasan universiti, pelabuhan, taman industri serta lokasi pelancongan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

DARIPADA : PUAN NOR AZRINA BINTI SURIP (MERBOK)

TARIKH : 20 JULAI 2022 (RABU)

SOALAN

PUAN NOR AZRINA BINTI SURIP (MERBOK) minta **MENTERI PERTANIAN DAN INDUSTRI MAKANAN** menyatakan status penyusutan tanah sawah seluruh negara serta kesannya terhadap Tahap Sara Diri (SSL) dan apakah usaha dalam memastikan bekalan makanan ruji negara terjamin.

JAWAPAN

Tuan Yang di-Pertua,

Untuk makluman Ahli Yang Berhormat, setiap tahun Kementerian Pertanian dan Industri Makanan (MAFI) melalui Jabatan Pertanian akan mengenalpasti kawasan sawah yang aktif (parsel) berdasarkan Rangka Lot Padi (RLP) bagi membolehkan data pengeluaran padi yang tepat dihasilkan. Berdasarkan Rangka Lot Padi yang direkodkan pada tahun 2016, luas pasel yang dikenalpasti adalah sebanyak 286,579 hektar. Keluasan ini menyusut sebanyak 1.7% berbanding 1,623 hektar pada tahun 2021. Penyusutan ini adalah disebabkan oleh penukaran tanah sawah kepada kawasan struktur kekal seperti pembinaan rumah dan bangunan serta penanaman tanaman selain padi.

Kementerian menyedari implikasi penyusutan luas pasel padi terhadap Kadar Sara Diri (SSL) beras negara. SSL beras yang direkodkan pada tahun 2016 adalah sebanyak 70.3% manakala pada tahun 2020

adalah sebanyak 63.0%. Negara terpaksa mengimport beras dari luar negara untuk menampung keperluan penduduk.

Dalam memastikan bekalan beras negara terus terjamin, MAFI telah mengambil inisiatif berikut untuk meningkatkan pengeluaran hasil padi dan beras. Pendekatan yang diambil adalah seperti berikut:-

- (i) **Program SMART Sawah Berskala Besar (SMART SBB).** Program SMART SBB merupakan hala tuju baharu MAFI dalam menyatukan tanah sawah secara pertanian kontrak atau sewaan bagi mengoptimumkan penggunaan tanah serta meningkatkan kecekapan aktiviti penanaman dan pengeluaran hasil lepas tuai. Pelaksanaan program ini melalui kerjasama antara Kerajaan dan swasta menjadikan pengurusan tanaman padi akan lebih efisien seterusnya meningkatkan hasil dan pendapatan petani;
- (ii) **Melaksanakan program *Site-Specific Nutrient Management* (SSNM).** SSNM ialah pembajaan yang diformulasikan mengikut kadar keperluan sebenar tanaman padi dan profil kesuburan tanah secara lokasi spesifik. Program ini merupakan antara fokus utama pembaharuan MAFI memandangkan 40% daripada faktor yang menyumbang kepada pengeluaran hasil padi adalah melalui pengurusan nutrien (pembajaan);
- (iii) **Menggalakkan program mekanisasi dan automasi agromakanan.** Bagi meningkatkan hasil, pengusaha padi digalakkan menggunakan jentera, mekanisasi dan automasi moden bagi meningkatkan kecekapan pengeluaran dan proses kerja disepanjang rantai nilai. Selain itu, petani digalakkan menggunakan teknologi berasaskan *Internet of things* (IoT) bagi meningkatkan hasil padi dan pendapatan petani;
- (iv) **Mempergiat aktiviti penyelidikan, pembangunan, pengkomersialan dan inovasi (R&D&C&I).** Ini bagi menjamin kemampuan pengeluaran beras negara dengan menghasilkan varieti benih padi yang dapat meningkatkan hasil pengeluaran padi serta rintang terhadap penyakit dan perubahan iklim. Di samping itu, Kementerian terus berusaha untuk memperkukuh

dan menambah baik infrastruktur, kemudahan dan fasiliti di kawasan tanaman padi juga akan dilaksanakan, terutamanya pembangunan pusat aktiviti lepas tuai; dan

- (v) **Membangunkan sistem pangkalan data bersepadu meliputi sistem padi dan beras sedia ada.** Sistem ini merangkumi data-data seperti tanah pemilik/pengusaha sawah, keluasan usaha dan profil tanah, maklumat pengairan dan infrastruktur serta maklumat penanaman dan pengeluaran padi. Melalui sistem yang akan dibangunkan kelak, pengurusan padi dan beras negara akan dapat diperkemaskan, bantuan input pertanian adalah lebih bersasar serta isu ketirisan dapat diatasi.

Melalui usaha dan pendekatan ini, produktiviti padi dapat ditingkatkan seterusnya SSL juga akan turut meningkat. Bekalan makanan dan sekuriti makanan akan lebih terjamin pada masa akan datang. Hal ini dapat memastikan kecukupan bekalan dan sekuriti makanan terjamin sekaligus mengurangkan kebergantungan terhadap beras import.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN MA'MUN BIN SULAIMAN
[KALABAKAN]**

TARIKH : 20 JULAI 2022 (RABU)

SOALAN

TUAN MA'MUN BIN SULAIMAN [KALABAKAN] minta **MENTERI KANAN PENDIDIKAN** menyatakan tahap pelaksanaan dan pencapaian ke atas pemulihan ataupun penggantian bangunan sekolah berstatus daif dan usang di Sabah. Apakah status cadangan pembinaan sekolah baru SMK Kalabakan yang sudah dikenal pasti berada dalam skala 6 tahap kerosakan sekolah kepada sekolah yang baru.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam menyediakan infrastruktur pendidikan yang selamat dan kondusif untuk kegunaan murid dan warga sekolah di seluruh negara termasuk di negeri Sabah.

Untuk makluman Ahli Yang Berhormat, sejak tahun 2016 hingga 2022, sebanyak 282 projek menaik taraf dan membangunkan semula bangunan daif di sekolah seluruh negeri Sabah telah diluluskan dengan kos keseluruhan sebanyak RM1.924 bilion. Sehingga 6 Julai 2022, sebanyak 186 projek telah siap sepenuhnya, 32 projek dalam peringkat pembinaan dan 64 projek di peringkat prabina.

Merujuk kepada status bangunan daif di SMK Kalabakan, tapak tanah sekolah sedia ada masih belum berstatus hakmilik Pesuruhjaya Tanah Persekutuan (PTP). Sehubungan itu, proses pemutihan tapak sekolah sedang dilaksanakan sebelum sebarang permohonan penggantian bangunan SMK Kalabakan dikemukakan untuk pertimbangan dan kelulusan agensi pusat.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATO' SRI ABDUL AZEEZ BIN ABDUL
RAHIM [BALING]**

TARIKH : 20 JULAI 2022 (RABU)

SOALAN

**Dato' Sri Abdul Azeez bin Abdul Rahim [Baling] minta MENTERI
KOMUNIKASI DAN MULTIMEDIA menyatakan:-**

- (a) jumlah kes yang disiasat di bawah Akta Komunikasi dan Multimedia Malaysia 1998 [Akta 588] dari tahun 2020 hingga 2022; dan
- (b) adakah bilangan pegawai penguatkuasa Suruhanjaya Komunikasi dan Multimedia Malaysia (SKMM) tidak mencukupi untuk mengendalikan kes-kes di bawah Akta Komunikasi dan Multimedia Malaysia 1998 [Akta 588].

JAWAPAN

Tuan Yang di-Pertua,

Antara tahun 2020 sehingga Jun 2022, sebanyak 692 kertas siasatan telah dibuka oleh SKMM bagi pelbagai kesalahan di bawah Akta Komunikasi dan Multimedia 1998 [Akta 588] serta undang-undang subsidiari yang berkaitan. Dalam tempoh tersebut, pihak SKMM juga telah mendakwa 87 kes di Mahkamah, manakala 367 kes yang lain dikenakan kompaun.

Sehingga kini, terdapat 203 orang pegawai diberi kuasa di SKMM bertempat di ibu pejabat dan pejabat-pejabat negeri yang bertanggungjawab dalam melaksanakan aktiviti-aktiviti penguatkuasaan serta mengawal selia industri komunikasi dan multimedia dalam bidang teknikal, ekonomi, pengguna, sosial juga pematuhan kepada Akta 588 termasuk peruntukan-peruntukan perundangan subsidiari yang berkaitan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN LIM GUAN ENG [BAGAN]
TARIKH : 20 JULAI 2022 (RABU)

SOALAN

TUAN LIM GUAN ENG [BAGAN] minta **MENTERI KEWANGAN** menyatakan dasar Kerajaan untuk menstabilkan nilai mata wang ringgit yang merosot dan tentang penubuhan Dana Penstabilan Harga, Stok Penimbal Kebangsaan dengan dana benih sebanyak RM5 bilion untuk menangani kenaikan harga barangan perlu yang dijangka kian serius hujung tahun ini dan tahun depan dengan keadaan perang Rusia - Ukraine yang berlarutan.

JAWAPAN

Tuan Yang di-Pertua,

Prestasi ringgit harus dilihat secara menyeluruh dan bukan hanya dibandingkan dengan matawang dolar Amerika Syarikat (AS) yang meningkat berbanding dengan kebanyakan matawang dunia. Nilai ringgit yang menurun sebanyak 5.9% berbanding dolar AS sejak awal tahun 2022 adalah sejajar dengan pergerakan kebanyakan mata wang serantau dan negara maju yang turut menguncup antara -3.8% hingga -15.4% (setakat 8 Julai 2022).

Kekukuhan dolar AS secara keseluruhannya didorong oleh polisi kenaikan kadar faedah secara agresif oleh pihak Rizab Persekutuan atau Bank Pusat AS, sentimen penghindaran risiko global berikutan konflik di Ukraine dan jangkaan pertumbuhan yang sederhana di China. Namun demikian, jika dibandingkan dengan sebahagian matawang negara lain, ringgit di dapati meningkat sebanyak +10.2% berbanding yen Jepun, +5.5% berbanding paun Britain, +4.8% berbanding euro, +2.9% berbanding won Korea Selatan dan +1.5% berbanding baht Thailand pada 2022. Secara keseluruhannya, pergerakan turun naik bagi nilai pertukaran ringgit pada tahun ini kekal stabil iaitu sebanyak 4.1% berbanding purata serantau sebanyak 6.1% dan purata 3 tahun (4.6%).

Dalam keadaan pasaran kewangan global yang tidak menentu, kadar pertukaran ringgit yang fleksibel akan terus memainkan peranan yang penting sebagai penyerap kejutan luaran tanpa menjejaskan aktiviti ekonomi domestik. Untuk menangani kemeruapan (volatiliti) pasaran tukaran asing, Kerajaan menerusi BNM akan terus menguruskan risiko-risiko dari perkembangan domestik and luaran, dan bersedia untuk menggunakan instrumen dasar operasinya bagi memastikan keadaan yang teratur dalam pasaran pertukaran asing, termasuk operasi campur tangan di pasaran untuk mengelakkan turun naik yang ketara dalam kadar pertukaran ringgit.

Kementerian Kewangan telah mengeluarkan Pekeliling Perbendaharaan 3.1 pada 14 Julai 2022 mengenai langkah penjimatan

yang antara lain langkah kawalan perbelanjaan diperkenalkan terhadap lawatan luar negara, barangan import serta sebarang pelaburan yang melibatkan aliran wang ke luar negara perlu mendapat kelulusan Kementerian Kewangan terlebih dahulu.

Tuan Yang di-Pertua,

Seterusnya, bagi menjawab pertanyaan berkaitan Dana Penstabilan Harga dan Stok Penimbal Kebangsaan, Kementerian Pertanian dan Industri Makanan (MAFI) tidak mempunyai Dana tersebut buat masa ini. Namun demikian, Kerajaan komited untuk memastikan kelangsungan bekalan makanan asas kepada rakyat pada harga yang berpatutan.

Bagi menangani isu kenaikan harga ayam dan telur ayam, MAFI menyediakan Program Pemberian Subsidi Ayam Pedaging dan Ayam Penelur dengan peruntukan sebanyak RM730 juta daripada Februari hingga Jun 2022 dan RM370 juta bagi Julai dan Ogos 2022. Di samping itu, Kerajaan juga telah menyalurkan bantuan tunai tambahan kepada penerima Bantuan Keluarga Malaysia bernilai RM630 juta pada hujung Jun 2022 di samping memudahkan pengimportan makanan tanpa AP.

Pertubuhan Peladang Kebangsaan (NAFAS) juga telah diberi tanggungjawab untuk mewujudkan stokpail ayam menggunakan fasiliti sedia ada. Pembelian stok dibuat dengan kuantiti 100 metrik tan ayam sejuk beku diimport daripada Thailand. Manakala, Lembaga Kemajuan Ikan Malaysia (LKIM) pula sedang giat mendapatkan stok ikan sebanyak 1,000 metrik tan dan stok tersebut akan disimpan di fasiliti sedia ada.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

TARIKH : 20 JULAI 2022 (RABU)

SOALAN

DATO' HAJI AHMAD NAZLAN BIN IDRIS [JERANTUT] minta **MENTERI KANAN PENDIDIKAN** menyatakan pandangan mengenai cadangan mewujudkan perjawatan warden khas di sekolah atau asrama bagi membendung kegiatan buli yang semakin menjadi-jadi dan membimbangkan agar sekolah menjadi tempat yang selamat untuk pelajar menuntut ilmu dan membina modal insan yang cemerlang.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa prihatin terhadap aspek keselamatan dan kesejahteraan murid di asrama, termasuk menyediakan Warden Asrama. Buat masa ini, Warden Asrama dilantik dalam kalangan guru berdasarkan konsep *in loco parentis* (peranan ibu bapa) di asrama untuk menjaga hal berkaitan kebajikan, keselamatan, pelajaran dan disiplin murid.

Terkini, KPM telah menambah baik portfolio warden asrama di 1,874 buah sekolah berasrama bawah KPM. Berkuatkuasa 1 Ogos 2022, bilangan warden asrama akan ditambah seramai 3,813 orang, iaitu melibatkan peningkatan sebanyak 63 peratus daripada 6,055 orang kepada 9,868 orang. Selain daripada itu, kadar Elaun Warden Asrama (EWA) dinaikkan sebanyak 25 peratus. Kadar baharu EWA adalah seperti berikut:

- i. RM350 sebulan bagi Ketua Warden Asrama; dan
- ii. RM300 sebulan bagi Warden Asrama.

Kali terakhir kadar EWA disemak adalah pada tahun 1997.

Penambahbaikan portfolio Warden Asrama membolehkan pengawasan dan penyeliaan asrama dilaksanakan dengan lebih teratur dan berkesan. Usaha ini juga akan dapat meningkatkan pemantauan murid di asrama dan memberi keyakinan kepada ibu bapa serta masyarakat terhadap aspek keselamatan murid di asrama.

Berkenaan cadangan mewujudkan perjawatan Warden Khas, cadangan ini perlu mendapat pertimbangan Agensi Pusat memandangkan ia melibatkan pertambahan bilangan jawatan serta implikasi kewangan yang tinggi kepada kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

DARIPADA : TUAN AHMAD TARMIZI BIN SULAIMAN (SIK)

TARIKH : 20 JULAI 2022 (RABU)

SOALAN

TUAN AHMAD TARMIZI BIN SULAIMAN (SIK) minta **MENTERI PERTANIAN DAN INDUSTRI MAKANAN** menyatakan langkah jangka pendek dan jangka panjang Kerajaan bagi meningkatkan tahap sara diri (SSL) beras negara sehingga mencapai ke tahap 100% bagi mengukuhkan keselamatan makanan negara yang lebih terjamin pada masa hadapan

JAWAPAN

Tuan Yang di-Pertua,

Untuk makluman Yang Berhormat, Kementerian Pertanian dan Industri Makanan (MAFI) sentiasa berusaha untuk memastikan kecukupan bekalan makanan negara. Dalam Dasar Agromakanan Negara 2.0 (DAN 2.0), kerajaan menyasarkan tahap sara diri adalah sebanyak 80% menjelang tahun 2030. Usaha berterusan telah dilaksanakan oleh MAFI bagi meningkatkan penghasilan padi untuk keperluan penduduk di samping dapat mengurangkan kebergantungan beras import.

Ini adalah penting bagi memperkukuhkan sekuriti bekalan makanan dan meningkatkan tahap sara diri beras dalam negara, lebih-lebih lagi dalam keadaan negara berhadapan cabaran semasa berikutan penularan pandemik COVID-19, dasar-dasar perlindungan (*protectionist policies*) yang diamalkan oleh beberapa buah negara serta konflik geopolitik dunia

seperti krisis Rusia-Ukraine telah memberi kesan terhadap rantai bekalan makanan dunia dan Malaysia tidak terkecuali dari menerima tempiasnya.

Pada masa yang sama, pertambahan populasi, produktiviti dan inovasi pertanian yang rendah, amalan pertanian yang tidak mampan, manipulasi orang tengah dalam rantai pemasaran, kekurangan pelaburan swasta, serangan penyakit dan perosak, tahap penggunaan teknologi dan pertanian pintar yang rendah dan kekurangan penglibatan golongan muda turut menjadi cabaran dalam sektor ini.

Dalam hal ini, antara pendekatan yang diambil oleh MAFI untuk meningkatkan tahap SSL negara adalah seperti berikut:

- (i). **Melaksanakan program SMART Sawah Berskala Besar (SMART SBB).** Program Smart SBB merupakan hala tuju baharu MAFI dalam menyatukan tanah sawah secara pertanian kontrak atau sewaan antara pihak Kerajaan dan swasta melalui satu sistem pengurusan bagi mengoptimumkan penggunaan tanah serta meningkatkan kecekapan aktiviti penanaman dan pengeluaran hasil lepas tuai. Pelaksanaan program SMART SBB telah terbukti dengan peningkatan hasil padi sehingga hampir empat kali ganda di Sekinchan, Selangor daripada 2.5 tan metrik per hektar kepada 10 tan metrik per hektar. Di samping menjimatkan kos penanaman, program ini dapat meningkatkan pengeluaran hasil padi dan pendapatan petani, menjadikan industri padi dan beras negara lebih kompetitif dan berdaya saing.
- (ii). **Melaksanakan program *Site-Specific Nutrient Management* (SSNM).** SSNM ialah pembajaan yang diformulasikan mengikut kadar keperluan sebenar tanaman padi dan profil kesuburan tanah secara lokasi spesifik. Program ini merupakan antara fokus utama pembaharuan MAFI memandangkan 40% daripada faktor yang menyumbang pengeluaran hasil padi adalah melalui pengurusan nutrien (pembajaan);

- (iii). **Menggalakkan program mekanisasi dan automasi agromakanan.** Bagi meningkatkan hasil, pengusaha padi digalakkan menggunakan jentera, mekanisasi dan automasi moden bagi meningkatkan kecekapan pengeluaran dan proses kerja di sepanjang rantai nilai. Selain itu, petani digalakkan menggunakan teknologi berasaskan *Internet of things* (IoT) bagi meningkatkan hasil padi dan pendapatan petani dan;
- (iv). **Mempergiat aktiviti penyelidikan, pembangunan, pengkomersialan dan inovasi (R&D&C&I).** Ini bagi menjamin kemampanan pengeluaran beras negara dengan menghasilkan varieti benih yang dapat meningkatkan hasil pengeluaran padi serta rintang terhadap penyakit dan perubahan iklim. Disamping itu, Kementerian terus berusaha untuk memperkukuh dan menambah baik infrastruktur, kemudahan dan fasiliti di kawasan tanaman padi juga akan dilaksanakan, terutamanya pembangunan pusat aktiviti lepas tuai.

Melalui usaha dan pendekatan ini, produktiviti padi dapat ditingkatkan seterusnya SSL juga akan turut meningkat. Bekalan makanan dan sekuriti makanan akan lebih terjamin pada masa akan datang. Hal ini dapat memastikan kecukupan bekalan dan sekuriti makanan terjamin sekaligus mengurangkan kebergantungan terhadap beras import.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN RUSNAH BINTI ALUAI
[TANGGA BATU]**

TARIKH : 20 JULAI 2022 (RABU)

SOALAN

PUAN RUSNAH BINTI ALUAI [TANGGA BATU] minta **MENTERI KANAN PENDIDIKAN** menyatakan apakah strategi Menteri untuk mengubah tanggapan masyarakat terhadap bidang Pendidikan dan Latihan Teknikal dan Vokasional (TVET) dikatakan pendidikan kelas kedua yang menyebabkan ramai anak muda kurang berkeyakinan untuk menceburi bidang ini.

JAWAPAN

Tuan Yang di-Pertua,

Kementerian Pendidikan Malaysia (KPM) telah melaksanakan Transformasi Pendidikan Vokasional (TPV) bagi tujuan menjadikan pendidikan vokasional sebagai salah satu pilihan bidang pengajian selain daripada aliran perdana bermula tahun 2012. TPV telah mengubah landskap pendidikan dan latihan teknikal vokasional (TVET) dalam menghasilkan graduan TVET KPM yang berkualiti serta mempunyai kebolehpasaran (marketability), kebolehkerjaan (workability) dan kebolehgajian (employability) yang tinggi untuk memenuhi keperluan revolusi perindustrian. Antara program yang disediakan termasuk program Diploma Vokasional Malaysia (DVM), Sijil Vokasional Malaysia (SVM), Sijil Kemahiran Malaysia (SKM) dan sijil profesional di Kolej Vokasional KPM.

Dalam usaha untuk meningkatkan kefahaman dan penerimaan masyarakat berhubung TVET, KPM melaksanakan aktiviti jerayawara dan hebahan di seluruh negara, menggiatkan program kesedaran dan jangkauan serta kempen bersama pelbagai pihak untuk mempromosikan TVET sebagai pilihan utama. Antara langkah yang telah dilaksanakan adalah seperti berikut:

- i. mempromosi kejayaan lepasan TVET KPM dalam bidang pekerjaan atau menjadi usahawan berpendapatan tinggi melalui pelbagai platform media sosial seperti *Facebook*, *Instagram*, *twitter* dan *YouTube* serta media cetak dan elektronik;
- ii. menguar-uarkan laluan artikulasi pengajian murid lepasan Diploma Vokasional Malaysia ke peringkat Ijazah Sarjana Muda Teknologi yang dilaksanakan oleh *Malaysian Technical University Network* (MTUN) dan lain-lain institusi pengajian tinggi;
- iii. menyediakan program pengajian yang menepati keperluan industri melalui pelaksanaan *industry-led curriculum* yang mana murid juga memperoleh pengalaman industri melalui pelaksanaan *On-The-Job Training* (OJT) dan program perantisan dalam tempoh pengajian;

- iv. menggalakkan tenaga pengajar dan murid TVET KPM berdaftar dengan *Malaysian Board of Technologists* (MBOT) bagi menaik taraf mereka sebagai juruteknik bertauliah dalam bidang masing-masing;
- v. mempromosikan kemenangan dan kejayaan murid TVET KPM dalam pertandingan kemahiran dan inovasi peringkat kebangsaan dan antarabangsa;
- vi. meningkatkan kerjasama strategik antara KPM dan industri, institusi pendidikan serta badan profesional berfokuskan kepada pemindahan teknologi, kepakaran dan latihan kemahiran. Kerjasama strategik ini dimeterai melalui *Note of Understanding* (NoU) dan *Memorandum of Understanding* (MoU). Antara pihak yang terlibat ialah *Association of Chartered Certified Accountants* (ACCA), Universiti Kuala Lumpur (UniKL), Johor Petroleum Rapid Development (JPDC), *Federation of Malaysian Manufacturers* (FMM), *Malaysia Digital Economy Corporation* (MDEC), McDonald's dan Shell Berhad; dan
- vii. melaksanakan kerjasama dengan industri secara berfokus bagi meningkatkan kebolehpasaran graduan TVET KPM serta mempromosikan bidang industri kepada masyarakat.

KPM yakin usaha yang telah dilaksanakan dapat memberi persepsi yang positif dalam kalangan masyarakat dan seterusnya memartabatkan pendidikan TVET.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' DR. MOHD KHAIRUDDIN BIN AMAN
RAZALI [KUALA NERUS]**

TARIKH : 20 JULAI 2022 (RABU)

SOALAN

DATO' DR. MOHD KHAIRUDDIN BIN AMAN RAZALI [KUALA NERUS] minta **MENTERI KANAN PENDIDIKAN** menyatakan status permohonan menaik taraf satu blok bangunan sekolah kayu yang amat uzur kepada blok bangunan empat tingkat dan infrastruktur lain di Sekolah Kebangsaan Duyong, Kuala Terengganu.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa komited dalam usaha menyediakan prasarana dan kemudahan infrastruktur pendidikan kepada semua murid di seluruh negara.

Untuk makluman Ahli Yang Berhormat, berdasarkan rekod KPM serta analisis Skor Gred Impak, blok bangunan kayu di sekolah ini berada di skala 2 serta dalam keadaan baik dan masih lagi selamat untuk diduduki. KPM juga telah mengadakan tinjauan susulan di sekolah tersebut pada 4 Julai 2022 dan mendapati bangunan sedia ada masih selamat untuk digunakan. Sehubungan itu, pada masa ini tiada keperluan mendesak untuk menaik taraf blok bangunan kayu tersebut kepada blok bangunan empat tingkat.

Walau bagaimanapun, sejak tahun 2019 hingga tahun 2022, KPM telah memperuntukkan sebanyak RM112,455.00 bagi kerja-kerja penyelenggaraan di SK Duyong termasuk di blok bangunan kayu tersebut.

KPM sentiasa mengenal pasti keperluan prasarana dan kemudahan infrastruktur pendidikan dari semasa ke semasa mengikut kesesuaian dan keperluan setempat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : PUAN TERESA KOK SUH SIM
[SEPUTEH]
TARIKH : 20 JULAI 2022 (RABU)

SOALAN

PUAN TERESA KOK SUH SIM [SEPUTEH] minta **MENTERI KEWANGAN** menyatakan sama ada Bank Negara telah mengeluarkan arahan kepada bank tempatan untuk melewatkan dan malah menolak permohonan pembukaan akaun bank oleh persatuan-persatuan baru. Apakah saluran bagi persatuan yang menghadapi masalah pembukaan akaun bank untuk membuat aduan.

JAWAPAN

Tuan Yang di-Pertua,

Bank Negara Malaysia (BNM) tidak pernah mengeluarkan arahan kepada bank-bank tempatan untuk melewati mahupun menolak permohonan akaun bank oleh persatuan-persatuan baru.

Secara amnya, proses meluluskan pembukaan akaun simpanan dan akaun semasa akan melibatkan proses usaha wajar pelanggan (*customer due diligence*) bagi memastikan akaun tersebut tidak digunakan untuk tujuan pengubahan wang haram. Institusi kewangan dikehendaki untuk mengenal pasti dan mengesahkan identiti pelanggan dengan menggunakan dokumen dan sumber yang sah. Prosedur ini selari dengan ketetapan yang dibuat oleh badan penetap piawaian antarabangsa, *Financial Action Task Force* (FATF) yang diguna pakai di peringkat antarabangsa. Pembuka akaun dinasihatkan untuk menyediakan segala dokumen dan maklumat yang diminta oleh institusi kewangan bagi memudahkan proses pembukaan akaun.

Mana-mana pihak termasuklah persatuan yang menghadapi masalah berhubung dengan pembukaan akaun bank dinasihatkan untuk merujuk perkara ini kepada Unit Aduan bank berkaitan bagi mendapat penjelasan dan pertimbangan lanjut. Jika masih menghadapi masalah membuka akaun, mereka boleh mengemukakan aduan kepada BNMTELELINK di talian 1-300-88-5465 atau melalui borang Web: bnm.my/LINK.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN ABDUL LATIFF BIN ABDUL RAHMAN
[KUALA KRAI]**

TARIKH : 20 JULAI 2022 (RABU)

SOALAN

TUAN ABDUL LATIFF BIN ABDUL RAHMAN [KUALA KRAI] minta **MENTERI KANAN PENDIDIKAN** menyatakan apakah perancangan dan tindakan Kementerian selepas pembatalan peperiksaan UPSR dan PT3 dan adakah Kementerian bercadang untuk menggantikan kedua-dua peperiksaan ini dalam masa terdekat.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa melaksanakan penambahbaikan kepada sistem pentaksiran dan penilaian murid seiring dengan keperluan semasa. Dalam Sistem Pentaksiran Pendidikan Kebangsaan, murid ditaksir melalui Pentaksiran Berasaskan Sekolah (PBS) dan Peperiksaan Pusat.

Berikutan pemansuhan Ujian Pencapaian Sekolah Rendah (UPSR) mulai tahun 2021 dan Pentaksiran Tingkatan Tiga (PT3) mulai tahun 2022, KPM memberi tumpuan kepada pemeraksanaan PBS, melibatkan komponen Pentaksiran Bilik Darjah (PBD), Pentaksiran Aktiviti Jasmani, Sukan dan Kokurikulum (PAJSK) serta Pentaksiran Psikometrik (PPsi).

Untuk makluman Ahli Yang Berhormat, PBS telah diperkenalkan lebih 10 tahun yang lalu, iaitu mulai tahun 2011 di peringkat sekolah rendah dan

tahun 2012 di peringkat sekolah menengah. Pentaksiran ini bertujuan untuk menilai aspek intelek, emosi, rohani, jasmani dan sosial selaras dengan Falsafah Pendidikan Kebangsaan.

Dalam konteks PBD, guru memantau perkembangan, kemajuan dan penguasaan setiap murid dalam proses pembelajaran mereka termasuk kemahiran asas membaca, menulis dan mengira (3M). Dengan ini, guru boleh merancang dan mengubah suai kaedah Pengajaran dan Pembelajaran (PdP) bagi membantu setiap murid meningkatkan tahap penguasaan pembelajaran mereka. Pelaksanaan PBD secara berterusan dapat mempersiapkan murid dengan pengetahuan, kemahiran dan nilai sebagai asas yang kukuh untuk mengikuti pembelajaran di peringkat seterusnya.

Antara pendekatan dalam pengukuhan PBD bagi murid Tahun 4 hingga Tingkatan 3 mulai tahun 2022 adalah dengan menambah baik pengurusan ujian akhir sesi akademik melalui penyediaan soalan yang setara standardnya oleh KPM. Soalan tersebut disediakan oleh guru yang berkepakaran dalam pembinaan item dan disimpan dalam sistem bank soalan yang dibangunkan oleh KPM.

Untuk tujuan pelaksanaan ujian akhir sesi akademik, pihak sekolah akan menjana set soalan daripada sistem tersebut dan ditadbir di sekolah seperti mana ujian akhir tahun sebelum ini. Panduan penskoran juga akan disediakan untuk kemudahan guru.

Penambahbaikan kepada ujian akhir sesi akademik ini adalah bagi membolehkan guru dan ibu bapa bersama-sama membantu membangunkan potensi murid bermula daripada peringkat sekolah rendah. Dalam mencapai hasrat ini, pelaporan ujian akhir sesi akademik akan digunakan untuk membolehkan intervensi awal dilakukan bagi mengoptimumkan potensi murid. Pelaporan ini bukan untuk tujuan perbandingan pencapaian antara murid atau sekolah.

Untuk makluman Ahli Yang Berhormat, kejayaan dan kemenjadian murid haruslah dilihat secara holistik dan bukan semata-mata berdasarkan prestasi dalam bidang akademik sahaja. Justeru, pentaksiran melalui

PAJSK dan PPSi juga diperkukuh bagi menilai perkembangan murid dalam aspek sukan, kokurikulum, nilai murni, minat dan kecenderungan serta pembentukan sahsiah.

KPM juga akan menambah baik dan memantapkan kaedah pelaporan PBD. Melalui kaedah ini, pencapaian murid dilaporkan secara menyeluruh sebanyak dua kali setahun iaitu pada pertengahan sesi akademik dan akhir sesi akademik dengan menggunakan deskriptor tahap penguasaan yang komprehensif dan jelas. Pelaporan ini juga menilai tahap usaha murid dalam pembelajaran. Di samping itu, guru kelas dan guru mata pelajaran akan memberi ulasan dan cadangan intervensi bagi mengoptimumkan potensi murid.

Selain daripada pelaporan PBD, laporan akhir sesi akademik akan turut disertakan dengan pelaporan PAJSK dan PPSi. Secara keseluruhan, penambahbaikan pelaporan PBS dapat memberi gambaran mengenai kemenjadian murid secara menyeluruh, komprehensif dan bermakna. Pemerkasaan PBS merupakan antara pendekatan KPM untuk beralih daripada pembelajaran berorientasi peperiksaan kepada pembelajaran yang lebih menyeronokkan untuk murid.

Selain itu, KPM juga mempergiatkan program latihan untuk pentadbir dan guru bagi meningkatkan kemahiran serta memantapkan pelaksanaan pentaksiran berterusan di sekolah. Guru juga akan terus dilatih untuk meningkatkan inovasi dan kreativiti dalam pengajaran dan pembelajaran termasuk penggunaan teknologi digital.

KPM yakin bahawa pentaksiran yang bersifat holistik dan berterusan melalui PBS merupakan pendekatan terbaik bagi mengoptimumkan potensi murid secara menyeluruh dan bersepadu. Oleh itu, KPM tidak bercadang untuk mewujudkan peperiksaan baharu bagi menggantikan UPSR dan PT3.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : PUAN NURUL IZZAH BINTI ANWAR
[PERMATANG PAUH]
TARIKH : 20 JULAI 2022 (RABU)

SOALAN

PUAN NURUL IZZAH BINTI ANWAR [PERMATANG PAUH] minta **MENTERI KEWANGAN** menyatakan sejauh mana langkah yang telah diambil oleh Kerajaan untuk menyusun semula struktur subsidi bahan api, bagi menggantikan sistem subsidi pukal dengan sistem subsidi bersasar, susulan kenaikan harga minyak mentah global yang menyebabkan jumlah subsidi Kerajaan yang lebih tinggi.

JAWAPAN

Tuan Yang di-Pertua,

Kementerian Kewangan (MOF) sedang melaksanakan proses memperinci kaedah pelaksanaan subsidi secara bersasar bagi produk petroleum. Beberapa siri libat urus bersama-sama pelbagai pihak telah diadakan antaranya termasuklah agensi Kerajaan, syarikat petroleum dan lain-lain bagi memperinci kaedah-kaedah dikenal pasti sebelum dapat menentukan pilihan kaedah terbaik bagi pelaksanaan subsidi bagi produk petrol dan diesel secara bersasar.

Pelaksanaan subsidi bersasar adalah penting memandangkan subsidi secara pukal bersifat tidak adil kerana sebilangan kecil golongan berpendapatan tinggi mendapat lebih manfaat daripada subsidi pukal berbanding sebahagian besar golongan berpendapatan rendah.

Sebagai contoh, golongan T20 merupakan antara penerima manfaat yang terbesar bagi subsidi RON95. Untuk tahun 2022, golongan T20 bakal memanfaatkan subsidi RON95 sebanyak RM8 bilion berbanding dengan B40 sebanyak RM6 bilion. Dengan itu, terdapat keperluan membangunkan subsidi dengan lebih bersasar agar ketirisan tersebut dapat diagihkan semula untuk manfaat golongan rentan atau digunakan untuk memajukan pembangunan negara.

Berhubung pembangunan mekanisme subsidi bersasar, Kerajaan masih di peringkat awal pengujian mekanisme pemberian subsidi petrol secara bersasar. Pengujian tersebut akan disusuli dengan pengujian yang lebih meluas dari segi beberapa kaedah lain dan juga bagi menguji kebolehlaksanaan mekanisme tersebut bukan sahaja di kawasan bandar tetapi juga di kawasan luar bandar. Pembangunan dan pengujian sistem subsidi bersasar dijangka memerlukan tempoh di antara 3 hingga 6 bulan sebelum betul-betul bersedia untuk dilaksanakan di seluruh negara.

Dalam pelaksanaan subsidi bersasar, Kerajaan akan merancang pelaksanaan secara berfasa bagi memastikan ianya tidak mengakibatkan inflasi secara mendadak atau menjejaskan momentum pertumbuhan ekonomi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATUK SERI DR. SHAMSUL ANUAR BIN
HAJI NASARAH [LENGGONG]
TARIKH : 20 JULAI 2022 (RABU)

SOALAN

DATUK SERI DR. SHAMSUL ANUAR BIN HAJI NASARAH [LENGGONG] minta **MENTERI KEWANGAN** menyatakan status terkini rancangan untuk melaksanakan mekanisme pembiayaan subsidi minyak masak melalui kutipan Levi Keuntungan Luar Biasa (*Windfall Profit Levy*) bagi menampung peningkatan kos subsidi minyak masak.

JAWAPAN

Tuan Yang di-Pertua,

Akta Levi Keuntungan Luar Biasa 1998 mengenakan levi atas pengeluaran kelapa sawit di atas nilai ambang. Dalam Bajet 2022, levi keuntungan luar biasa ini telah disemak semula dengan meningkatkan nilai ambang bagi Semenanjung Malaysia daripada 2,500 kepada 3,000 ringgit dan bagi Sabah dan Sarawak daripada 3,000 kepada 3,500 ringgit. Kadar levi Sabah dan Sarawak diselaraskan kepada 3 peratus seperti mana kadar levi di Semenanjung.

Bagi minyak sawit mentah (CPO), andaian Bajet 2022 adalah sekitar RM3,400 setan metrik tetapi purata harga sawit sebenar telah melebihi RM6,000 setan metrik semenjak harganya meningkat dengan mendadak pada bulan Mac yang lalu. Dengan itu, keperluan peruntukan Skim Penstabilan Harga Minyak Masak (COSS) meningkat dengan mendadak dan diunjurkan akan mencecah RM4 bilion pada tahun 2022. Walaupun pada kadar semasa, levi keuntungan luar biasa dijangka tidak akan menjana hasil yang mencukupi untuk menampung subsidi COSS sepenuhnya, Kerajaan terus komited untuk menampung subsidi ini bagi memastikan harga minyak masak paket dapat dikekalkan pada kadar RM2.50 sekilogram, berbanding harga pasaran sebenarnya yang telah melebihi RM8 sekilogram jika tanpa subsidi.

Kerajaan akan terus memantau perkembangan harga pasaran CPO dalam konteks keperluan mengkaji semula nilai ambang dan kadar levi keuntungan luar biasa dengan mengimbangi keperluan membiayai subsidi minyak masak dengan kepentingan memastikan daya saing industri sawit.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK HAJI HASANUDDIN BIN MOHD
YUNUS [HULU LANGAT]**

TARIKH : 20 JULAI 2022 (RABU)

SOALAN

DATUK HAJI HASANUDDIN BIN MOHD YUNUS [HULU LANGAT] minta **MENTERI KANAN PENDIDIKAN** menyatakan apakah Kementerian mempunyai perancangan untuk memperkenalkan sukatan-sukatan baru di Kolej Vokasional antaranya seperti biometrik, teknologi dron, Cloud Security atau lain-lain yang lebih mendapat permintaan dalam pasaran kerja.

JAWAPAN

Tuan Yang di-Pertua,

Kementerian Pendidikan Malaysia (KPM) komited dalam memastikan murid kolej vokasional (KV) mempunyai pengetahuan dan kompetensi yang relevan dengan keperluan industri semasa dan pekerjaan masa hadapan. Pada masa kini, kurikulum yang dibina bagi pendidikan dan latihan teknikal vokasional (TVET) KPM adalah berasaskan industri serta selari dengan revolusi perindustrian.

KPM sentiasa berusaha ke arah memastikan graduan KV relevan dengan pekerjaan masa hadapan. Antara pendekatan yang dilaksanakan adalah memastikan kandungan kurikulum bagi program diploma yang ditawarkan di KV diberi nilai tambah melalui sukatan-sukatan baharu. Sebagai contoh, dalam bidang pertanian, KPM telah melaksanakan pertanian pintar (*smart* yang mengadaptasi teknologi dron, teknologi perikanan beradas (artificial insemination) dan *internet of things* (IoT) bagi meningkatkan hasil serta produktiviti.

KPM juga telah melaksanakan program P-Tech IBM (*Pathways in Technology Early College High Schools*) mulai pada tahun 2020 dengan kerjasama *International Business Machines Corporation* (IBM) dan *Malaysia Digital Economy Corporation* (MDEC). IBM telah menerapkan elemen sekuriti siber dalam program P-Tech IBM untuk memberi kemahiran, latihan dan pengetahuan kepada murid bagi mendepani industri digitalisasi revolusi perindustrian. Murid akan mendapat sijil *Intensive P-Tech Training* IBM dan boleh memberikan nilai tambah untuk meningkatkan kebolehpasaran murid dalam 2ndustry digital.

Selain daripada itu, KPM juga telah menerapkan elemen *Arduino*, *Data Science Tools* dan *Blockchain Essentials* khususnya dalam program-program Teknologi Maklumat dan Komunikasi yang ditawarkan di KV.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI AHMAD JAZLAN BIN YAAKUB
[MACHANG]**

TARIKH : 20 JULAI 2022 (RABU)

SOALAN

Minta **MENTERI PENGAJIAN TINGGI** menyatakan apakah respon Kementerian mengenai dakwaan bidang Sains Tulen yang ditawarkan di pengajian tinggi kurang mendapat penghargaan dan sukar untuk mendapat pekerjaan di negara ini. Adakah sebarang statistik yang boleh membidas kenyataan tersebut dan membuktikan bahawa bidang Sains Tulen masih lagi relevan bagi para pelajar di Malaysia.

JAWAPAN

Tan Sri Yang di-Pertua,

Kementerian Pengajian Tinggi (KPT) sentiasa komited dalam memastikan bidang-bidang pengajian yang ditawarkan di IPT termasuklah bidang Sains Tulen mempunyai nilai kebolehpasaran yang tinggi bagi membantu para graduan memasuki sektor pekerjaan selepas menamatkan pengajian.

Berdasarkan Kajian Pengesanan Graduan yang dilaksanakan oleh KPT pada tahun 2021, jumlah keluaran graduan (warganegara) pada dalam bidang Sains adalah seramai 7,675 orang. Daripada jumlah tersebut, **majoriti graduan iaitu 52.8 peratus (4,049 orang) telah bekerja;** manakala baki 26.5 peratus (2,035 orang) sedang melanjutkan pengajian;

3.2 peratus (248 orang) sedang meningkatkan kemahiran; 3.1 peratus (239 orang) sedang menunggu penempatan pekerjaan; dan baki 14.4 peratus (1,104 orang) masih belum bekerja selepas enam (6) bulan menamatkan pengajian. Secara keseluruhannya, **kebolehpasaran graduan bidang Sains pada tahun 2021 adalah 85.6 peratus, meningkat 2.5 peratus berbanding 83.1 peratus pada tahun 2020.**

Dalam usaha kementerian untuk membantu menyelesaikan isu peningkatan kadar pengangguran graduan, pelbagai inisiatif telah dilaksanakan seperti program-program berbentuk kemahiran dan peningkatan kemahiran (Reskilling and Upskilling). Program-program ini boleh memberikan nilai tambah kepada graduan daripada aspek persijilan kompetensi, mempertingkatkan ketrampilan diri dan sahshiah, menawarkan graduan kepada pekerjaan yang bersesuaian dengan keperluan industri, memberi peluang kepada graduan untuk berkecimpung di dalam bidang keusahawan dan bidang ekonomi gig.

Selain itu, KPT juga turut menjalinkan kolaborasi strategik dengan agensi-agensi seperti KUSKOP, MIDA, TalentCorp dan PERKESO bagi melatih dan menempatkan graduan yang belum bekerja di industri.

Berdasarkan '*Critical Occupations List 2020/2021*' atau ringkasnya COL yang dikeluarkan oleh pihak TalentCorp pula, sebanyak 57 peratus iaitu 24 daripada 42 kerjaya yang disenaraikan kritikal dan sukar diisi, memerlukan graduan dalam bidang Sains, Matematik dan Teknologi. Oleh itu, bidang pengajian Sains ini secara keseluruhannya dilihat masih lagi relevan untuk ditawarkan di IPT dan para graduan bidang berkenaan juga masih lagi diperlukan oleh pihak industri untuk mengisi kerjaya tertentu yang memerlukan kemahiran khusus dalam bidang Sains.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN SABRI BIN AZIT [JERAJ]

TARIKH : 20 JULAI 2022 (RABU)

SOALAN

TUAN SABRI BIN AZIT [JERAJ] minta **MENTERI KANAN PENDIDIKAN** menyatakan punca guru bersara awal hingga melebihi 10,000 orang pada setiap tahun dan apakah tindakan Kementerian bagi menangani isu ini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memantau keperluan dan pengisian jawatan Pegawai Perkhidmatan Pendidikan (PPP) di sekolah bawah KPM. Untuk makluman Ahli Yang Berhormat, jumlah 10,000 orang guru yang bersara awal setiap tahun yang dinyatakan adalah tidak tepat. Berdasarkan rekod KPM, jumlah guru yang bersara awal pada tahun 2021 adalah seramai 4,389 orang. Ini merupakan 1.06 peratus daripada jumlah keseluruhan pengisian guru pada 1 Januari 2021. Untuk makluman Ahli Yang Berhormat, purata peratusan guru yang bersara pilihan untuk tahun 2017 hingga 2021 adalah 0.99 peratus daripada jumlah keseluruhan pengisian guru pada 1 Januari tahun-tahun tersebut.

Dalam konteks pembangunan kerjaya, KPM menyediakan peluang pembangunan profesionalisme kepada guru bagi memastikan guru sentiasa bersedia serta bermotivasi dalam menjalankan tugas dan berusaha meningkatkan kualiti perkhidmatan masing-masing. Ini termasuk memberi pendedahan tentang deskripsi tugas guru akademik di sekolah serta latihan dan bimbingan yang berterusan kepada guru dalam mendukung pelaksanaan dasar pendidikan semasa, termasuk melengkapkan guru dengan kemahiran dalam aspek pendigitalan pendidikan bagi mendepani sistem pendidikan abad ke-21.

Di samping itu, KPM juga menyediakan latihan dalam meningkatkan kesejahteraan psikologi untuk memberikan kemahiran pengurusan emosi, kawalan diri dan amalan harian yang positif berdasarkan tahap kesejahteraan psikologi yang dinilai melalui Inventori Kesejahteraan Psikologi (IKPsi).

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN SANISVARA NETHAJI RAYER A/L
RAJAJI [JELUTONG]**

TARIKH : 20 JULAI 2022 (RABU)

SOALAN

Tuan Sanisvara Nethaji Rayer A/L Rajaji [Jelutong] minta **MENTERI KOMUNIKASI DAN MULTIMEDIA** menyatakan apakah sebab Suruhanjaya Komunikasi dan Multimedia Malaysia (SKMM) menyiasat bekas Senator Siti Aishah Binti Shaik Ismail berkaitan video TikTok berkenaan penghapusan subsidi.

JAWAPAN

Tuan Yang di-Pertua,

Siasatan yang dilakukan terhadap bekas Senator Siti Aishah binti Shaik Ismail adalah berdasarkan laporan dan aduan masyarakat awam yang diterima oleh Suruhanjaya Komunikasi dan Multimedia Malaysia (SKMM) berhubung ketidakpatuhan kandungan video TikTok tersebut berdasarkan peruntukan Seksyen 233 Akta 588.

Kes tersebut masih dalam siasatan SKMM. Setelah siasatan dilengkapkan, kertas siasatan akan dirujuk kepada Jabatan Peguam Negara untuk arahan selanjutnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD JOHNIE BIN ZAWAWI
[IGAN]**

TARIKH : 20 JULAI 2022 (RABU)

SOALAN

Minta **MENTERI PENGAJIAN TINGGI** menyatakan adakah pihak Kementerian mempunyai perancangan untuk menubuhkan sebuah kolej komuniti dalam bidang Pendidikan dan Latihan Teknikal dan Vokasional (TVET) di kawasan Parlimen Igan.

JAWAPAN

Tan Sri Yang di-Pertua,

Dalam menubuhkan sesebuah Universiti Awam, Politeknik atau Kolej Komuniti, pelbagai aspek akan diberi pertimbangan sewajarnya seperti pertumbuhan ekonomi, strategi pembangunan negara dan wilayah, keperluan guna tenaga serta faktor kewangan semasa. Secara khususnya, terdapat 13 institusi pendidikan tinggi di negeri Sarawak iaitu tiga (3) buah universiti awam (UA); tiga (3) buah Politeknik dan tujuh (7) buah Kolej Komuniti.

Institusi-institusi ini telah menawarkan program-program akademik yang berdaya saing dalam pelbagai bidang termasuk Pendidikan dan Latihan Teknikal dan Vokasional (TVET) di peringkat sijil dan diploma merangkumi bidang Fesyen dan Pakaian; Teknologi Maklumat; Sistem Komputer dan Rangkaian; Kulinari; Pengembaraan Pelancongan; Teknologi Elektrik; Penyenggaraan Industri; Teknologi Senibina; Kejuruteraan Awam; Kejuruteraan Mekanikal; Kejuruteraan Elektrik; Ukur Bahan; Akauntasi; Pengajian Perniagaan; serta Landskap dan Rekabentuk Dalaman.

Jemaah Menteri dalam mesyuaratnya pada 8 September 2004 telah bersetuju supaya Kolej-Kolej Komuniti dibangunkan mengikut keperluan, sepertimana Politeknik Mukah yang berhampiran dengan kawasan Parlimen Igan iaitu dalam lingkungan 40 km, dan terdapat juga Kolej Komuniti Cawangan Sibu dalam lingkungan 200 km daripada kawasan Parlimen Igan.

Dari masa kesemasa, bila ada keperluan, perkara ini akan dibawa ke Kementerian untuk dibincangkan dan diputuskan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN KARUPAIYA A/L MUTUSAMI
[PADANG SERAI]
TARIKH : 20 JULAI 2022 (RABU)

SOALAN

TUAN KARUPAIYA A/L MUTUSAMI [PADANG SERAI] minta **MENTERI KEWANGAN** menyatakan jumlah hutang terkini negara dan berapa jumlah bunga yang terpaksa dibayar oleh negara untuk hutang tersebut.

JAWAPAN

Tuan Yang di-Pertua,

Sehingga akhir-Jun 2022, hutang Kerajaan Persekutuan adalah berjumlah RM1,045 bilion atau 63.8% kepada KDNK.

Untuk makluman Tuan Yang di-Pertua, bayaran khidmat hutang Kerajaan Persekutuan bagi 2022 diperuntukkan sebanyak RM43.1 bilion atau 18.4% daripada anggaran jumlah hasil Kerajaan Persekutuan. Sehingga akhir-Jun 2022, sebanyak RM19.8 bilion telah dibelanjakan bagi tujuan pembayaran faedah ke atas hutang terkumpul Kerajaan Persekutuan.

Tuan Yang di-Pertua,

Kerajaan sentiasa komited dalam memastikan pembayaran faedah dilakukan mengikut jadual yang ditetapkan. Bayaran khidmat hutang ini diperuntuk sebagai item tanggungan T13 iaitu salah satu perbelanjaan tanggungan yang diberi keutamaan terlebih dahulu daripada item perbelanjaan yang lain, seperti yang termaktub di bawah Perkara 98(1)(b) Perlembagaan Persekutuan iaitu segala caj hutang adalah di bawah tanggungan Kerajaan Persekutuan.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI RICHARD RIOT ANAK JAEM
[SERIAN]**

TARIKH : 20 JULAI 2022 (RABU)

SOALAN

Dato' Sri Richard Riot anak Jaem [Serian] minta MENTERI KOMUNIKASI DAN MULTIMEDIA menyatakan apakah faedah-faedah yang bakal dinikmati dengan terlancarnya satelit MEASAT-3d baru-baru ini.

JAWAPAN

Tuan Yang di-Pertua,

Satelit MEASAT-3d yang telah lancarkan pada 22 Jun 2022 lalu merupakan satelit yang komprehensif dan menggunakan teknologi terkini yang berkemampuan untuk menyediakan perkhidmatan jalur lebar yang pantas dan menyokong aliran tinggi data dikenali sebagai *High Throughput Satellite* (HTS). HTS adalah antara perkhidmatan penting dalam penyediaan perkhidmatan jalur lebar tinggi terutamanya di kawasan pedalaman. Internet kelajuan tinggi akan ditambah baik daripada kelajuan muat turun 30 Mbps pada masa ini kepada 100 Mbps, yang membolehkan penstriman kandungan tinggi data seperti video 4K/8K.

Dengan pelancaran satelit MEASAT-3d yang baharu ini, Malaysia akan dapat memperkukuhkan lagi kedudukannya dalam era digital berteraskan kepada teknologi talian tetap, mudah alih dan satelit tanpa meminggirkan mana-mana kelompok rakyat di negara ini. Satelit MEASAT-3d berupaya meluaskan liputan internet jalur lebar berasaskan satelit, yang dapat mengisi kelompangan jalur lebar di lokasi yang tidak mempunyai liputan mudah alih 4G, 5G atau fiber di Malaysia sekali gus membolehkan rakyat menikmati kemudahan Internet dengan lebih baik.

Penyedia perkhidmatan telekomunikasi lain juga boleh menggunakan satelit ini untuk menawarkan perkhidmatan data, suara dan video kepada 3 hingga 5 peratus populasi yang belum lagi diliputi oleh sambungan fiber atau jalur lebar tanpa wayar.

Selaras dengan inisiatif Kerajaan melalui pelan Jalinan Digital Negara (JENDELA), MEASAT-3d dapat merapatkan jurang ketersambungan digital dan membentuk masa depan ketersambungan yang lebih baik, dengan mengembangkan liputan Internet berkelajuan tinggi di kawasan pedalaman yang tidak mempunyai sambungan. Keupayaan satelit MEASAT-3d dan sambungan internet jalur lebar berdasarkan satelit akan membantu Kerajaan mencapai matlamat pelan JENDELA yang bertujuan meningkatkan ketersambungan digital dan

mencapai sepenuhnya 100% liputan Internet di Malaysia menjelang penghujung tahun 2025.

Dalam jangka masa panjang, seluruh rakyat Malaysia mampu menikmati manfaat teknologi yang memerlukan sambungan berkelajuan tinggi, seperti Revolusi Industri 4.0 (IR4.0) dan teknologi *Internet of Things* (IoT), yang dapat meningkatkan mutu kehidupan. Dengan akses Internet yang stabil dan pantas, rakyat Malaysia boleh memperoleh pelbagai manfaat sosioekonomi seperti penyertaan dalam aktiviti e-dagang dan pembelajaran digital.

Ketersediaan liputan internet yang lebih meluas juga membantu dalam mencapai matlamat pelan MyDIGITAL, yang bertujuan mentransformasi Malaysia menjadi negara berpendapatan tinggi serta peneraju serantau dalam ekonomi digital, di mana keberhasilan MyDIGITAL akan menjadi penentu kejayaan pendigitalan Keluarga Malaysia seperti yang diharapkan menjelang tahun 2030.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN MUHAMMAD BAKHTIAR BIN WAN CHIK
[BALIK PULAU]**

TARIKH : 20 JULAI 2022 (RABU)

SOALAN

TUAN MUHAMMAD BAKHTIAR BIN WAN CHIK [BALIK PULAU]
minta **MENTERI PELANCONGAN, SENI DAN BUDAYA** menyatakan :-

- (a) apakah sasaran jumlah pelancong luar negara dan pendapatan pelancongan bagi 2023 berdasarkan analisis data dan trend serta kajian saintifik yang dijalankan; dan
- (b) apakah usaha jangka pendek dan jangka panjang dalam usaha mencapai sasaran tersebut.

JAWAPAN

Tuan Yang di-Pertua,

1. Setelah mengambil kira perkembangan semasa, Kementerian Pelancongan, Seni dan Budaya (MOTAC) baru-baru ini telah mengumumkan sasaran baharu ketibaan pelancong asing pada tahun 2022 sebanyak 4.5 juta orang, dengan jumlah pendapatan pelancongan sebanyak RM11.1 bilion. Sasaran ini akan disemak semula pada suku ketiga tahun ini, setelah terus meneliti dan mengambil kira situasi semasa global termasuk pembukaan sempadan negara-negara dan ekonomi global yang akan mempengaruhi corak pelancongan antarabangsa. Trend dan pencapaian tahun 2022 ini akan juga diambil kira dalam menetapkan sasaran untuk tahun hadapan, iaitu 2023.

2. Dalam usaha mencapai sasaran yang telah ditetapkan, MOTAC telah melancarkan Rangka Kerja Pemulihan Pelancongan 2.0 atau TRF 2.0 pada 21 Jun 2022. TRF 2.0 menggariskan rangka kerja atau inisiatif jangka pendek dan sederhana MOTAC untuk memperkukuhkan pemulihan dan mengembalikan daya saing global industri pelancongan menerusi strategi-strategi yang boleh meningkatkan kemampanan dan daya tahan industri dalam menghadapi ketidakpastian masa depan.

3. Antara strategi tersebut adalah:

- (i) menyokong pemulihan perniagaan pelancongan dan kebudayaan melalui bantuan fiskal dan bukan fiskal demi meringankan beban penggiat industri dan seterusnya membolehkan mereka beroperasi secara optimum. Antaranya adalah melalui bantuan kewangan, penebusan baucar, penyediaan geran padanan untuk membantu membaik pulih hotel bajet, geran sepadan untuk penganjuran program atau aktiviti berkaitan pelancongan, seni dan budaya serta tempoh kelonggaran hal-hal berkaitan fi lesen, kompaun dan syarat lesen kepada agensi-agensi pelancongan dan pemandu-pemandu pelancong;

SOALAN NO : 77

- (ii) meningkatkan kualiti kemudahan/infrastruktur pelancongan agar berada pada tahap yang optimum dan selamat untuk dikunjungi. Bagi tujuan ini, MOTAC telah memperuntukkan sebanyak RM85 juta pada tahun 2020 hingga 2022 bagi membiayai 365 projek penyelenggaraan kemudahan pelancongan termasuk pemuliharaan dan pemeliharaan tapak/bangunan warisan di seluruh Malaysia;
- (iii) memperkukuhkan kedudukan Malaysia sebagai destinasi utama penganjuran acara perniagaan di peringkat global seterusnya menyumbang kepada pertumbuhan ekonomi negara;
- (iv) meningkatkan promosi ke pasaran sasaran seperti Asia Tenggara, Eropah, America dan Oceania, Asia Pasifik, Asia Barat dan Asia Selatan bagi meningkatkan ekonomi pelawat dan jumlah ketibaan pelancong menerusi pelbagai program termasuklah webinar, penyertaan di pameran antarabangsa, kolaborasi dengan pihak kedutaan/pemain industri, penganjuran lawatan suaikenal (*Familirisation Trips*), misi jualan dan sebagainya; dan
- (v) menjalinkan kerjasama pemasaran strategik dengan *Expedia Group* dalam usaha mempromosikan pelancongan antarabangsa dan perkongsian data trend pelancongan untuk pasaran terpilih bagi memacu pelancong antarabangsa ke Malaysia. Ini merangkumi pasaran utama seperti Australia, United Kingdom dan Amerika Syarikat.

4. Usaha-usaha ini adalah selari dengan enam (6) teras strategik utama Dasar Pelancongan Negara 2020-2030 seperti berikut:

- (i) transformasi tadbir urus;
- (ii) mewujudkan zon pelaburan bagi projek pelancongan yang inklusif;
- (iii) mempergiatkan digitalisasi pelancongan;
- (iv) memperkayakan pengalaman dan kepuasan pelancong;
- (v) memperkukuhkan komitmen terhadap pelancongan lestari; dan

SOALAN NO : 77

(vi) meningkatkan kapasiti modal insan dalam semua subsektor pelancongan.

5. Strategi jangka masa panjang tertumpu kepada pelancongan lestari dan peningkatan pendapatan pelancongan, dengan mengutamakan kualiti berbanding kuantiti, dalam menarik pelancong yang berkualiti atau pelancong yang berbelanja tinggi ke negara ini.

6. Pada masa yang sama, komitmen terhadap pelancongan yang lestari dan bertanggungjawab akan mengukuhkan peranan pelancongan sebagai pemangkin perlindungan alam sekitar, pemeliharaan dan pemuliharaan budaya dan warisan tempatan, serta memastikan kekayaan dari pelancongan tersebar luas sehingga menjangkau masyarakat terpencil yang mampu menawarkan keunikan pengalaman kepada pelancong. Ciri-ciri ini berupaya menjadikan Malaysia sebagai destinasi ekopelancongan pilihan dunia, seiring dengan hasrat Kementerian ini. Usaha ini juga adalah selaras dengan komitmen Malaysia terhadap Agenda 2030 dan 17 Matlamat Pembangunan Lestari (*Sustainable Development Goals*) di bawah Pertubuhan Bangsa-Bangsa Bersatu (*United Nations*).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN HAJAH FUZIAH BINTI SALLEH
[KUANTAN]**

TARIKH : 20 JULAI 2022 (RABU)

SOALAN

PUAN HAJAH FUZIAH BINTI SALLEH [KUANTAN] minta **MENTERI KANAN PENDIDIKAN** menyatakan :-

- (a) prosedur permohonan Ahli Parlimen masuk ke sekolah sama ada perlu kelulusan bertulis dari Ketua Pengarah Pendidikan Malaysia atau memadai mendapat kelulusan dari Pengarah Jabatan Pendidikan Negeri ; dan
- (b) bilakah pekeliling arahan perkara ini dikeluarkan untuk rujukan Ahli Parlimen.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberi perhatian kepada aspek pengurusan sekolah, termasuk akses ke premis sekolah. Dalam hal ini, KPM mempunyai prosedur operasi standard bagi kehadiran orang kenamaan atau individu tertentu ke sekolah dan penggunaan premis atau kemudahan sekolah oleh pihak luar.

KPM telah mengeluarkan Surat Pekeliling Ikhtisas Bilangan 3/2008: Mengundang Orang-orang Kenamaan ke Upacara Sekolah dan Penggunaan Premis Sekolah oleh Pihak Luar bertarikh 31 Mac 2008. Berdasarkan surat pekeliling ikhtisas ini, semua urusan pihak luar termasuk orang kenamaan memasuki sekolah perlu mendapat kebenaran daripada KPM melalui Pengarah Pendidikan Negeri. Perkara ini juga telah diperingatkan melalui satu surat peringatan bertarikh 11 November 2019. Surat pekeliling ini boleh dimuat turun melalui laman sesawang rasmi KPM melalui pautan www.moe.gov.my.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN LARRY SOON @ LARRY SNG WEI SHIEN [JULAU]

TARIKH : 20 JULAI 2022 (RABU)

SOALAN

Tuan Larry Soon @ Larry Sng Wei Shien [Julau] minta **MENTERI KOMUNIKASI DAN MULTIMEDIA** menyatakan apakah tahap kapasiti kelajuan capaian Internet terkini di dalam negara di bawah inisiatif JENDELA dan perancangan Kementerian untuk meningkatkan lagi capaian kelajuan Internet menjadi lebih stabil serta mudah akses buat semua pengguna khususnya di kawasan pedalaman.

JAWAPAN

Tuan Yang Dipertua,

Pencapaian Pelan Jalinan Digital Negara (JENDELA) Fasa 1 setakat suku pertama 2022 seperti berikut:

- (i) Sebanyak 7.027 juta premis tersedia dengan capaian gentian optik, berbanding 4.957 juta sebelum pelaksanaan JENDELA;
- (ii) Purata kelajuan muat turun mudah alih telah meningkat kepada 40.13 Mbps, melebihi sasaran yang ditetapkan iaitu 35 Mbps; dan
- (iii) Peratusan liputan 4G di kawasan berpenduduk di seluruh negara telah meningkat kepada 95.7% pada suku pertama 2022 berbanding 91.8% sebelum pelaksanaan JENDELA.

Melalui JENDELA Fasa 2 (2023-2025) pula, Kerajaan akan terus meningkatkan usaha bagi memberikan akses gentian optik kepada 9 juta premis di seluruh negara, meningkatkan kadar kelajuan purata jalur lebar mudah alih kepada 100Mbps melalui pelaksanaan 5G, dan meluaskan liputan jalur lebar kepada 100% kawasan berpenduduk di seluruh negara.

Bagi membolehkan ketersediaan dan kebolehcapaian liputan rangkaian 4G di Malaysia berada pada tahap memberangsangkan selain daripada pembinaan menara-menara telekomunikasi dan satelit, Kerajaan juga turut melaksanakan penyediaan infrastruktur jalur lebar menggunakan kaedah *Point of Presence* (PoP) hab gentian optik yang merupakan salah satu alternatif dalam memastikan jaringan dan liputan infrastruktur jalur lebar dapat diperluaskan ke kawasan sekitar sekolah dan berpenduduk dengan lebih baik.

Pelaksanaan ini akan menjadikan lokasi berhampiran sekolah luar bandar sebagai hub untuk menyediakan infrastruktur jalur lebar gentian optik untuk kegunaan sekolah, kawasan perindustrian, premis-premis kerajaan berhampiran dan masyarakat sekelilingnya. Secara keseluruhannya, Fasa 1 bagi projek PoP ini akan melibatkan 630 lokasi berhampiran sekolah dan Fasa 2 pula akan melibatkan 3693 lokasi berhampiran sekolah di kawasan luar bandar di seluruh negara. Manakala jumlah PoP secara keseluruhan di Sarawak adalah sebanyak 741 dan daripada jumlah tersebut pula sebanyak 1 kawasan berhampiran sekolah luar bandar di Parlimen Julau akan terlibat dengan pelaksanaan PoP Fasa 1 manakala bagi Fasa 2 pula sebanyak 26.

Sekian, terima kasih.

**PEMBERITAHUAN PERTANYAAN LISAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN CHAN FOONG HIN
[KOTA KINABALU]**

TARIKH : 20 JULAI 2022 (RABU)

SOALAN

Tuan Chan Foong Hin [Kota Kinabalu] minta **MENTERI KOMUNIKASI DAN MULTIMEDIA** menyatakan apakah tindakan Kementerian dalam mengurangkan kelewatan perkhidmatan kenderaan ambulans dan bomba seperti yang berlaku di Kota Kinabalu pada awal Mei tahun ini yang kelihatan kes kelewatan ambulans hospital selama 1 jam selepas panggilan dibuat melalui MERS 999.

JAWAPAN

Tuan Yang di-Pertua,

Sistem *Malaysian Emergency Response Services* (MERS) 999 melaksanakan pengurusan panggilan kecemasan berdasarkan *Malaysian Communications and Multimedia Commission Direction No. 1 of 2010* yang menetapkan supaya Pusat Panggilan Kecemasan 999 mematuhi piawaian seperti berikut:

- (i) 90% panggilan kecemasan hendaklah dijawab dalam tempoh tidak melebihi 10 saat; dan
- (ii) 100% panggilan kecemasan hendaklah dijawab dalam tempoh tidak melebihi 20 saat.

Selain itu, pengurusan panggilan kecemasan di bawah Sistem MERS 999 adalah selari dengan *European Emergency Number Association* (EENA) dan mengikut juga Prosedur Operasi Standard (*Standard Operating Procedure* - SOP) Pengurusan Panggilan Kecemasan yang ditetapkan.

Setelah menerima panggilan kecemasan daripada orang awam, Sistem MERS 999 akan mendapatkan empat maklumat kecemasan yang asas iaitu nama, nombor telefon, alamat dan jenis kecemasan dan seterusnya menghantar kad panggilan kepada Agensi Kecemasan berkaitan samada pihak Polis Diraja Malaysia (PDRM), Jabatan Bomba dan Penyelamat Malaysia (JBPM), Kementerian Kesihatan Malaysia (KKM), Anggota Pertahanan Awam Malaysia (JPAM) atau Agensi Penguatkuasaan Maritim Malaysia (APMM) yang paling hampir dengan tempat kejadian kecemasan untuk tindakan segera.

Merujuk kejadian yang dinyatakan, semakin mendapati panggilan tersebut telah dikendalikan mengikut SOP Pusat Panggilan Kecemasan 999 yang ditetapkan dan telah dipanjangkan kepada hospital yang berdekatan untuk tindakan lanjut.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGAM]**

TARIKH : 20 JULAI 2022 (RABU)

SOALAN

DR. MASZLEE BIN MALIK [SIMPANG RENGAM] minta **MENTERI KANAN PENDIDIKAN** menyatakan apakah usaha untuk mengurangkan beban pelaporan dan kerja-kerja pengisian data ke atas para guru yang sering dikatakan antara penyumbang besar kepada guru-guru bersara awal. Apakah pihak KPM ada membuat libat urus bersama dengan NUTP dan kesatuan-kesatuan guru yang lain untuk usaha mengurangkan beban guru di sekolah dan usaha mengelakkan lebih ramai guru bersara awal.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa mengambil langkah proaktif dalam usaha mencari penyelesaian terbaik meningkatkan kecekapan sistem pelaporan dan perekodan data di sekolah bawah KPM di seluruh negara.

Untuk Makluman Ahli Yang Berhormat, KPM telah melaksanakan penambahbaikan ke atas fungsi pengurusan di sekolah melalui pewujudan Modul Tadbir Urus Sekolah (MySG) yang diperkenalkan pada tahun 2021. MySG menjelaskan dengan lebih terperinci empat komponen pengurusan sekolah, iaitu Pengurusan dan Pentadbiran, Kurikulum, Hal Ehwal Murid dan Kokurikulum.

Selain itu, KPM melaksanakan pelbagai inisiatif yang merangkumi intervensi seperti berikut :

- i. memudahkan pengurusan fail dan dokumentasi;
- ii. pengurusan data dan sistem dalam talian;
- iii. penyeragaman borang dan proses pemantauan; dan
- iv. Sistem Rekod Kesihatan Murid secara dalam talian (e-RKM).

Untuk makluman Ahli Yang Berhormat, KPM turut melaksanakan Bengkel Kerja Berkaitan Beban Tugas Guru melibatkan wakil guru dari seluruh negara. Bengkel tersebut bertujuan untuk mendapatkan input secara lebih berfokus daripada guru berkaitan beban tugas mereka pada masa kini. Hasil daripada bengkel tersebut, KPM sedang meneliti beberapa inisiatif berkaitan sistem perekodan data secara bersepadu, modul jadual waktu serta pengurusan takwim aktiviti kurikulum dan kokurikulum secara berpusat.

KPM akan terus memperkasakan kecekapan sistem pelaporan dan perekodan data di sekolah bawah KPM di seluruh negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

DARIPADA : TUAN TAN KOK WAI (CHERAS)

TARIKH : 20 JULAI 2022 (RABU)

SOALAN

TUAN TAN KOK WAI (CHERAS) minta **MENTERI PEMBANGUNAN WANITA, KELUARGA DAN MASYARAKAT** menyatakan jumlah warga emas yang diabaikan oleh keluarga mereka di hospital awam dan hospital swasta setiap tahun untuk lima tahun yang lepas, mengikut kriteria jantina, sebab ditinggalkan, bagaimana dan di mana mereka kini ditempatkan. Apakah langkah yang diambil Kementerian untuk mengurangkan perbuatan tidak bertanggungjawab sebegini.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWK) sentiasa prihatin dan memandang serius berkaitan kes pengabaian warga emas oleh ahli keluarga ataupun yang tidak berwaris. Warga emas di negara ini merupakan kumpulan sasar yang sentiasa dibela nasib dan diangkat martabat mereka menerusi Dasar Warga Emas Negara. Matlamat unggul dasar ini adalah menjadikan warga emas sihat, aktif dan produktif serta dilindungi daripada sebarang aktiviti yang menjejaskan kesejahteraan mereka.

Tuan Yang di-Pertua,

Berdasarkan data Kementerian Kesihatan (KKM), pada tahun 2021 seramai 752 warga emas telah diabai dan ditinggalkan di hospital. Pegawai Kerja Sosial Perubatan di hospital berusaha mengesan waris mereka dan jika tidak berjaya, membantu menguruskan penempatan ke institusi kebajikan kerajaan atau swasta. Daripada jumlah tersebut, seramai 412 kes (55%) iaitu 231 warga emas lelaki dan 109 warga emas perempuan telah ditempatkan di institusi yang bersesuaian.

Data kumulatif KKM melaporkan sepanjang tempoh lima (5) tahun iaitu dari 2018 hingga Jun 2022, seramai 2,144 warga emas telah diabai dan ditinggalkan di hospital. Daripada jumlah tersebut, 914 (43%) kes terdiri daripada 656 warga emas lelaki dan 258 warga emas perempuan telah berjaya dikembalikan kepada keluarga atau waris. Bagi warga emas yang sebatang kara dan tidak dapat dikesan waris, seramai 1,230 orang yang terdiri daripada 650 warga emas lelaki dan 380 warga emas perempuan telah ditempatkan di institusi yang bersesuaian.

Menurut KKM, kebanyakan kes warga emas terabai sebenarnya mempunyai waris seperti suami, isteri, anak-anak atau adik beradik. Pegawai Kerja Sosial Perubatan terlebih dahulu akan mencuba sedaya upaya untuk mengesan waris-waris mereka melalui pengesanan alamat di kad pengenalan (sekiranya warga emas mempunyai kad pengenalan),

menelefon waris, membuat lawatan ke rumah atau mengesan waris melalui Jabatan Pendaftaran Negara. Walau bagaimanapun, kebanyakan waris yang dikesan enggan tampil untuk mengambil warga emas tersebut. Antara alasan yang diberikan adalah masalah keluarga, tiada penjaga dan ada juga yang mengatakan tidak mengenali warga emas yang dirujuk. Pihak hospital menghadapi kesukaran sekiranya warga emas itu tidak dapat memberikan maklumat yang tepat mengenai nombor kad pengenalan, nombor telefon waris atau kenalan serta alamat tempat tinggal. Kebanyakan kes juga adalah dalam kalangan kutu rayau dan gelandangan yang dirujuk oleh orang awam ke hospital untuk rawatan. Warga emas yang terlibat dalam kes penyalahgunaan dadah dan alkohol juga dirujuk ke hospital.

Tuan Yang di-Pertua,

Kerajaan menyedari keperluan perundangan bagi melindungi hak-hak asasi warga emas dan sedang berusaha mewujudkan satu Akta khusus untuk warga emas di Malaysia. Satu draf Rang Undang-Undang (RUU) Warga Emas telah disediakan dan kini sedang diteliti bagi tujuan kebajikan warga emas termasuk penyediaan hak, penjagaan, perlindungan, pemerkasaan dan sokongan yang merangkumi keluarga dan komuniti.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : TUAN WONG LING BIU (SARIKEI)

TARIKH : 20 JULAI 2022 (RABU)

SOALAN

Tuan Wong Ling Bui (Sarikei) minta **MENTERI PERTANIAN DAN INDUSTRI MAKANAN** menyatakan tentang pengumuman Perdana Menteri baru-baru ini mengenai dua badan Kerajaan iaitu Pertubuhan Peladang Kebangsaan (NAFAS) dan Angkatan Koperasi Kebangsaan Malaysia Bhd. (ANGKASA) akan menternak sejumlah 174 juta ekor ayam setahun. Kedua-dua badan Kerajaan ini juga akan menanam jagung. Berapa susidi yang diberi oleh Kementerian kepada kedua-dua badan Kerajaan ini.

JAWAPAN

Tuan Yang di-Pertua,

Untuk makluman Ahli Yang Berhormat, penglibatan Pertubuhan Peladang Kebangsaan (NAFAS) dan Angkatan Koperasi Kebangsaan Malaysia Bhd. (ANGKASA) dalam industri ayam dan penanaman jagung bijian dijangka mampu menstabilkan bekalan dan harga ayam di pasaran bagi kesejahteraan Keluarga Malaysia.

NAFAS dan ANGKASA akan terlibat dalam ekosistem industri ayam bermula daripada anak ayam, makanan ternakan, vaksin, reban, pusat pemprosesan, bilik sejuk beku, logistik, pusat pengedaran dan pemasaran sehingga bekalan sampai kepada pengguna. NAFAS menyasarkan untuk menguasai 20 peratus pasaran dengan pengeluaran

sebanyak 144 juta ekor ayam setahun, manakala ANGKASA pula menyasarkan pengeluaran sebanyak 30 juta ekor ayam setahun.

NAFAS dan ANGKASA juga akan lebih proaktif dalam industri penanaman jagung bijian, bagi mengurangkan kebergantungan negara terhadap import bahan mentah untuk makanan ayam. Bagi tujuan itu NAFAS dan ANGKASA telah mengenalpasti lokasi yang berpotensi bagi penanaman jagung bijian berskala besar di seluruh negara. Setiap hektar dijangka mampu mengeluarkan sebanyak 5 tan metrik jagung bijian. Usaha NAFAS dan ANGKASA yang berskala besar ini diyakini dapat mengurangkan kebergantungan import negara terhadap jagung bijian bagi kegunaan makanan ayam.

Penelitian bagi sebarang bantuan atau insentif untuk membantu pelaksanaan projek adalah tertakluk kepada kemampuan kewangan semasa kerajaan.

Untuk makluman Ahli Yang Berhormat, di bawah RMKe-12, Kementerian melalui Jabatan Pertanian telah menyediakan insentif di bawah Projek Pembangunan Tanaman Makanan Ternakan seperti berikut:-

- (i). RM 20,000/hektar dengan keluasan minimum 10 hektar bagi individu/kelompok;
- (ii). *Reimbursement* perladangan dengan kadar 40:60 dengan keluasan minimum 20 hektar bagi syarikat/koperasi; dan
- (iii). *Matching grant* dengan kadar 40:60 dengan maksimum bantuan RM 250,000/hektar bagi syarikat.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : PUAN MARIA CHIN BINTI ABDULLAH
[PETALING JAYA]**

TARIKH : 20 JULAI 2022 (RABU)

SOALAN

Puan Maria Chin binti Abdullah [Petaling Jaya] minta **MENTERI KOMUNIKASI DAN MULTIMEDIA** menyatakan apakah rangka kerja dan dasar perundangan dan infrastruktur telekomunikasi yang akan melancarkan penggunaan tanah dan aset yang lebih mampan, tidak akan memusnahkan mata pencarian (*livelihood*) dan menyebabkan perpindahan (*displacement*) orang ramai.

JAWAPAN

Tuan Yang di-Pertua,

Kerajaan telah mengiktiraf komunikasi sebagai utiliti awam melalui keputusan yang telah dibuat dalam Mesyuarat Jemaah Menteri pada 2 Jun 2021 di mana penyediaan infrastruktur komunikasi telah diwajibkan dalam setiap projek pembangunan di peringkat persekutuan, negeri dan juga Pihak Berkuasa Tempatan (PBT).

Bagi mengukuhkan pelaksanaan infrastruktur komunikasi, Suruhanjaya Komunikasi dan Multimedia Malaysia (SKMM) telah membangunkan Garis Panduan Perancangan Infrastruktur Komunikasi (GPP-I) untuk mewujudkan amalan perancangan yang seragam dan boleh dijadikan piawaian oleh semua Kerajaan Negeri dan PBT. Sehingga kini, kesemua negeri kecuali Sabah dan Sarawak bersetuju untuk mengunapakai GPP-I secara keseluruhannya atau menerapkan elemen-elemen GPP-I dalam garis panduan/piawaian perancangan di negeri masing-masing.

Pihak PBT perlu memastikan keperluan penyediaan infrastruktur komunikasi ditekankan semasa awal proses perancangan sesuatu pembangunan. Ini dapat memastikan penyediaan infrastruktur komunikasi ini tersedia untuk pihak penyedia perkhidmatan memberi perkhidmatan kepada orang awam. Semua usaha ini berisiko terbantut sekiranya kerajaan negeri gagal melaksanakan perubahan dasar yang bersesuaian dan mengurangkan kos untuk membina infrastruktur ini dengan pantas. Peranan infrastruktur telekomunikasi sebagai keperluan asas telah pun dizahirkan dalam Undang-undang Kecil Bangunan Seragam (UKBS) (Pindaan 2011).

Segala keperluan pemajuan penyediaan infrastruktur komunikasi mestilah selaras dengan peruntukan perundangan, garis panduan dan kod teknikal termasuk tetapi tidak terhad kepada yang berikut:

- (i) Akta Komunikasi dan Multimedia 1998 (AKM 1998), undang-undang subsidiari di bawah AKM 1998 dan mana-mana

SOALAN NO: 84

instrumen yang dikeluarkan di bawah AKM 1998 termasuk Arahan Menteri, Penentuan Menteri, Perisytiharan Menteri, Arahan Suruhanjaya dan Penentuan Suruhanjaya;

- (ii) Garis Panduan Pembinaan Menara dan Struktur Sistem Pemancar Telekomunikasi di Kawasan Pihak Berkuasa Tempatan, KPKT 2002 (Garis Panduan KPKT 2002);
- (iii) Garis Panduan Perancangan Laluan Kemudahan Utiliti, PLANMalaysia; dan
- (iv) Kod-kod teknik yang dikeluarkan di bawah Malaysian Technical Standards Forum (MTSFB) yang didaftarkan oleh SKMM.

Undang-undang Kecil 25 dan 27, UKBS 1984 secara umumnya merujuk kepada komunikasi sebagai sebahagian daripada perkhidmatan perlu, di mana pihak berkuasa hendaklah mengeluarkan kelayakan menduduki (atau boleh mengeluarkan kelayakan bagi kelayakan menduduki sebahagian) jika komunikasi dikehendaki sebagai perkhidmatan perlu dan telah disediakan.

Kementerian Komunikasi dan Multimedia juga telah menubuhkan Majlis Ekonomi Digital, Industri Kreatif dan Komunikasi (MEDIKK) yang dianggotai Exco Kerajaan Negeri yang memegang portfolio berkaitan ekonomi digital, industri kreatif dan komunikasi/penerangan bagi menyelesaikan masalah perundangan dan infrastruktur komunikasi di setiap negeri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN KHOO POAY TIONG
[KOTA MELAKA]
TARIKH : 20 JULAI 2022 (RABU)

SOALAN

TUAN KHOO POAY TIONG [KOTA MELAKA] minta **MENTERI KEWANGAN** menyatakan :-

- (a) jenis subsidi barang keperluan asas yang dibiayai oleh Kerajaan untuk meringankan kos sara hidup rakyat termasuklah jumlah untuk setiap jenis subsidi tersebut untuk tahun 2018-2022 (secara berasingan) ; dan
- (b) apakah hala tuju dan garis masa Kerajaan untuk merasionalisasikan subsidi-subsidi tersebut.

JAWAPAN

Tuan Yang di-Pertua,

Berdasarkan prestasi perbelanjaan sebenar bagi subsidi keperluan asas yang dibiayai oleh Kerajaan untuk meringankan kos sara hidup rakyat seperti Subsidi Program Skim Penstabilan Minyak Masak, Subsidi Program Tepung Gandum Am, Subsidi Gas Cecair, *Liquefied Petroleum Gas* (LPG), Diesel dan Petrol, dan lain-lain termasuk Bantuan Keluarga Malaysia adalah sejumlah RM30.5 bilion bagi tahun 2018, RM26.5 bilion bagi tahun 2019, RM23.3 bilion bagi tahun 2020, RM37.3 bilion bagi tahun 2021.

Untuk tahun 2022, bantuan dan subsidi diunjurkan mencecah RM77.7 bilion berbanding dengan peruntukan yang diluluskan di bawah Bajet 2022 sebanyak RM31 bilion. Peningkatan keperluan subsidi berbangkit ekoran langkah Kerajaan untuk bukan sahaja meneruskan subsidi tetapi meningkatkan perbelanjaan subsidi terutamanya berkaitan petrol, diesel, *Liquefied Petroleum Gas* (LPG) dan minyak masak. Di samping itu, Kerajaan juga memperkenalkan subsidi baharu yang tidak disediakan di dalam Bajet 2022, khususnya subsidi elektrik serta subsidi ayam dan telur.

Kerajaan komited untuk memastikan bekalan makanan asas yang mencukupi pada harga yang berpatutan. Untuk ayam dan telur, Kerajaan telah meluluskan peruntukan subsidi sebanyak RM730 juta untuk temoh bulan Februari hingga Jun 2022. Mulai Julai 2022, dalam usaha mengurangkan herotan pasaran, Kerajaan telah membenarkan kenaikan harga siling 50 sen se kg bagi ayam dan 2 sen bagi sebiji telur tetapi subsidi tetap diteruskan pada kadar RM1.40 se kg untuk ayam dan 3 sen bagi sebiji telur. Nilai subsidi untuk Julai dan Ogos dianggarkan RM370 juta dan di samping itu, Kerajaan juga telah memberi bantuan tunai tambahan bernilai RM630 juta kepada golongan penerima BKM. Dengan itu, jumlah subsidi serta bantuan tunai selepas Jun adalah RM1 bilion iaitu lebih daripada peruntukan RM730 juta yang disediakan sebelum Julai 2022.

Kerajaan akan terus meneliti dan menambahbaik subsidi yang disediakan ke arah :

- pertama, subsidi dan bantuan yang lebih bersasar iaitu ditumpukan kepada golongan yang memerlukan,
- kedua, mengurangkan ketirisan subsidi dan herotan pasaran, dan
- ketiga, mengelakkan kenaikan harga yang mendadak.

Kerajaan sedang mengkaji mekanisme pemberian subsidi petrol, diesel, LPG supaya dapat dilaksanakan dengan lebih bersasar dan menumpukan bantuan dan subsidi kepada golongan rentan dan mereka yang benar-benar memerlukan bantuan. Pelaksanaan subsidi secara bersasar dijangka dapat mengoptimumkan sumber kewangan Kerajaan dan penjimatan yang dicapai dapat diagihkan semula untuk program yang lebih berkesan menyumbang kepada kesejahteraan rakyat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATUK SERI SAIFUDDIN NASUTION BIN
ISMAIL [KULIM-BANDAR BHARU]
TARIKH : 20 JULAI 2022 (RABU)

SOALAN

DATUK SERI SAIFUDDIN NASUTION BIN ISMAIL [KULIM-BANDAR BHARU] minta **MENTERI KEWANGAN** menyatakan apakah dasar, strategi dan pendekatan yang unik atau berbeza dalam pembikinan Bajet 2023 berbanding bajet sebelumnya yang akan dibentang pada hujung tahun ini.

JAWAPAN

Tuan Yang di-Pertua,

Selaras dengan iltizam Kerajaan untuk mendokong ketelusan dalam tadbir urus penyediaan bajet, Kenyataan Pra-Bajet 2023 telah diterbitkan awal iaitu pada 3 Jun 2022 berbanding 31 Ogos pada tahun lalu. Di dalam kenyataan tersebut, Kerajaan telah berkongsi berhubung hala tuju serta fokus Bajet 2023, di samping menjelaskan berkenaan kedudukan ekonomi dan fiskal semasa negara.

Seiring dengan momentum pemulihan ekonomi pasca-COVID-19, Bajet 2023 akan terus menumpukan kepada **agenda kesejahteraan rakyat** terutamanya dalam aspek pendapatan dan perlindungan sosial. Usaha **pembaharuan ekonomi** juga akan diutamakan bagi memastikan pertumbuhan yang mampan serta meningkatkan daya saing perniagaan dan rantai nilai.

Memandangkan dunia sekarang sedang bergelut dengan cabaran ketidaktentuan geopolitik dan perubahan iklim yang serius, inisiatif berkaitan **kemampaman** turut diambil kira dalam Bajet 2023. Dengan tekanan inflasi yang kian meruncing terutamanya bagi harga komoditi dan makanan, maka cabaran ini juga memerlukan **pengurusan subsidi** yang lebih mampan di samping terus memperkukuh daya tahan negara terhadap kejutan masa hadapan serta melaksanakan konsolidasi fiskal Kerajaan. Agenda **keterangkuman** selaras dengan hasrat Wawasan Kemakmuran Bersama 2030 akan terus diberi penekanan bagi memastikan pengagihan kekayaan yang adil dan saksama.

Tema Bajet 2023 ialah **Memperkukuh Pemulihan, Memudah Cara Pembaharuan Ke Arah Kemampanan Daya Tahan Ekonomi dan Kesejahteraan Keluarga Malaysia**. Sepanjang proses penyediaan Bajet 2023, bagi mendapatkan input dan cadangan selaras dengan keutamaan yang telah dikenal pasti, Kerajaan komited untuk terus melaksanakan sesi libat urus dengan pelbagai pihak berkepentingan terutama pandangan serta maklum balas daripada orang awam.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN PANG HOK LIONG [LABIS]
TARIKH : 20 JULAI 2022 (RABU)

SOALAN

TUAN PANG HOK LIONG [LABIS] minta **MENTERI KEWANGAN** menyatakan sama ada Kementerian mempunyai rancangan untuk mengubal undang-undang untuk mengharamkan semua jenis judi *Online* memandangkan ramai remaja terlibat dalam kegiatan haram itu dan juga menjadi mangsanya.

JAWAPAN

Tuan Yang di-Pertua,

Terima kasih Yang Berhormat Tuan Pang Hok Liong [PH DAP Labis] di atas soalan yang telah dikemukakan.

Tuan Yang di-Pertua,

Untuk makluman Ahli-Ahli Yang Berhormat, Kementerian Kewangan hanya memantau semua aktiviti perjudian berlesen sahaja manakala aktiviti perjudian haram adalah di bawah bidang kuasa Kementerian Dalam Negeri (KDN) terutamanya pihak Polis Diraja Malaysia (PDRM) yang ditugaskan untuk melaksanakan tugas-tugas penyiasatan dan pencegahan seperti yang diperuntukkan dalam undang-undang.

Untuk makluman Ahli-Ahli Yang Berhormat juga, buat masa ini tiada sebarang akta khusus untuk mengawal selia aktiviti perjudian atas talian (*Online*) di negara ini. Namun demikian, Kementerian Kewangan cakna dan kini sedang dalam proses semakan untuk meminda akta-akta perjudian sedia ada iaitu Akta Rumah Perjudian Terbuka 1953, Akta Pertaruhan Wang Terkumpul 1967, Akta Loteri 1952 dan Akta Pertaruhan 1953.

Dengan adanya perundangan yang baharu ini kelak diharapkan Kerajaan akan dapat menguatkuasa dan mengawal selia aktiviti perjudian berlesen dan perjudian atas talian (*Online*) secara lebih menyeluruh.

Kerajaan sangat menggalakkan kerjasama dari semua pihak untuk menyalurkan sebarang maklumat berkenaan aktiviti perjudian haram terus kepada Polis Diraja Malaysia untuk diambil tindakan sewajarnya. Kerjasama dari setiap lapisan masyarakat untuk membanteras aktiviti perjudian haram diharap dapat membendung kegiatan perjudian haram secara lebih berkesan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGAM]**

TARIKH : 20 JULAI 2022

SOALAN:

DR. MASZLEE BIN MALIK [SIMPANG RENGAM] minta **MENTERI KANAN PENDIDIKAN** menyatakan apakah Kementerian masih lagi memberikan elaun bulanan kepada Sasterawan-sasterawan Negara dan apakah usaha Kementerian untuk mempromosikan mereka kepada anak-anak di sekolah rendah (termasuk SJKC, SJKT dan sekolah mubaligh), menengah (termasuk sekolah-sekolah swasta persendirian Cina) dan sekolah-sekolah swasta (persendirian dan antarabangsa).

JAWAPAN

Tuan Yang di-Pertua,

Kementerian Pendidikan Malaysia (KPM) melalui Dewan Bahasa dan Pustaka (DBP) masih meneruskan pemberian elaun bulanan kepada tujuh orang Sasterawan Negara yang masih hidup dengan kadar sebanyak RM5,000 sebulan.

KPM akan terus mempergiat usaha mempromosi Sasterawan Negara dan karya mereka melalui pelbagai program apresiasi dan pengembangan bahasa dan sastra. Pendekatan ini dilaksanakan di peringkat sekolah rendah, termasuk sekolah jenis kebangsaan Cina (SJKC), sekolah jenis kebangsaan Tamil (SJKT) dan sekolah mubaligh serta di peringkat sekolah menengah, termasuk sekolah persendirian Cina. Begitu juga penglibatan sekolah swasta dan sekolah antarabangsa.

Antara program yang dilaksanakan termasuklah acara tahunan Festival Bahasa dan Sastra untuk pelajar SJKC, SJKT dan sekolah persendirian Cina dalam pertandingan deklamasi puisi yang turut menampilkan karya Sasterawan Negara.

Untuk makluman Ahli Yang Berhormat, program lain yang turut diadakan ialah program ramah mesra pelajar bersama-sama Sasterawan Negara, program apresiasi dan penghayatan karya-karya Sasterawan Negara dan sesi diskusi bersama-sama Sasterawan Negara.

Buku-buku Sasterawan Negara juga turut diedarkan ke sekolah-sekolah melalui penyediaan dana oleh Kerajaan sebanyak RM500,000. Dana tersebut adalah untuk membeli buku Sasterawan Negara yang baharu yang menerima penganugerahan tersebut.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : PUAN YEO BEE YIN (BAKRI)

TARIKH : 20 JULAI 2022 (RABU)

SOALAN

PUAN YEO BEE YIN (BAKRI) minta **MENTERI TENAGA DAN SUMBER
ASLI** menyatakan status terkini rangkaian Akta Kecekapan dan
Konservasi Tenaga.

JAWAPAN

Tuan Yang di-Pertua,

Untuk makluman Ahli Yang Berhormat,

Penggubalan Rang Undang-Undang Kecekapan dan Konservasi Tenaga
(*Energy Efficiency and Conservation Act –EECA*) bertujuan untuk
mewujudkan satu kerangka perundangan kecekapan tenaga yang
komprehensif bagi mengawal selia, menguatkuasa, menyelaraskan dan
melaksanakan inisiatif kecekapan tenaga termasuk tenaga termal.

Proses penggubalan RUU Kecekapan dan Konservasi Tenaga kini telah
memasuki fasa akhir, di mana draf RUU tersebut sedang dalam proses
dimuktamadkan oleh Jabatan Peguam Negara (AGC) sebelum diangkat
kepada Jemaah Menteri untuk kelulusan pembentangan di Parlimen.
Pihak Kementerian menjangka bahawa RUU Kecekapan dan Konservasi
Tenaga tersebut dapat dibentangkan semasa Mesyuarat Ketiga, Penggal
Kelima, Parlimen Keempat Belas.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN SYED IBRAHIM BIN SYED NOH
[LEDANG]**

TARIKH : 20 JULAI 2022 (RABU)

SOALAN

TUAN SYED IBRAHIM BIN SYED NOH [LEDANG] minta **MENTERI KANAN PENDIDIKAN** menyatakan :-

- (a) peruntukan yang digunakan bagi projek pembangunan sekolah di bawah Rolling Plan Rancangan Malaysia Ke-12 (RMK-12) bagi sekolah dalam negeri Johor; dan
- (b) syarat yang diambil kira dalam menilai sekolah yang diberi keutamaan di bawah Rolling Plan RMK-12.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha dalam memastikan penyediaan kemudahan sekolah adalah mencukupi mengikut keperluan setempat.

Untuk makluman Ahli Yang Berhormat, KPM telah diluluskan sebanyak RM111.93 juta di bawah Rancangan Malaysia Ke-12 bagi tahun 2021 dan 2022 untuk melaksanakan 133 projek pembangunan sekolah di Negeri Johor. Daripada jumlah tersebut, 26 projek berada pada status prabina, 19 adalah dalam status pembinaan manakala 88 projek telah siap dibina.

Untuk memastikan setiap pembinaan sekolah baharu dilaksanakan dengan teratur, KPM mendapatkan input dan cadangan daripada jabatan pendidikan negeri (JPN). Seterusnya, KPM akan melaksanakan analisis keperluan secara terperinci termasuk menganalisis kesediaan tapak atau tanah. Selain itu, perkara lain yang diambil kira adalah bilangan dan kapasiti sekolah sedia ada yang berhampiran, kepadatan penduduk di kawasan sekitar, liputan kawasan tadahan penduduk (*catchment area*) serta perancangan pembangunan kawasan tersebut berdasarkan perbincangan bersama-sama pihak berkuasa tempatan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DR. MASZLEE BIN MALIK
[SIMPANG RENGAM]**

TARIKH : 20 JULAI 2022 (RABU)

SOALAN

DR. MASZLEE BIN MALIK [SIMPANG RENGAM] minta **MENTERI PELANCONGAN, SENI DAN BUDAYA** menyatakan usaha dan insentif Kementerian untuk memaju dan memperjuangkan tapak tamadun awal Tanah Melayu di Sungai Batu, Kedah.

JAWAPAN

Tuan Yang di-Pertua,

1. Tapak Arkeologi Sungai Batu telah diisytiharkan sebagai Tapak Warisan Kebangsaan di bawah peruntukan Akta Warisan Kebangsaan 2005 [Akta 645]. Pengisytiharan ini merupakan satu bentuk perlindungan di bawah instrumen perundangan negara di peringkat nasional.
2. Selain itu, pihak Kementerian Pelancongan, Seni dan Budaya (MOTAC) melalui agensinya Jabatan Warisan Negara (JWN) telah melaksanakan pelbagai usaha dan insentif bagi memastikan Tapak Arkeologi Sungai Batu berkembang dan terus maju agar dikenali di peringkat dunia.
3. Antara usaha dan insentif yang dilakukan adalah:
 - (i) menjalinkan kerjasama penyelidikan dan pembangunan dengan pihak Institusi Pengajian Tinggi. Sehingga kini, usaha penyelidikan dan pembangunan (R&D) diteruskan secara

SOALAN NO : 91

berterusan bagi melengkapkan data persejarahan Lembah Bujang khususnya di Sungai Batu agar ia terus berkembang maju dan terpelihara dengan kerjasama universiti tempatan terutama sekali dengan pihak Universiti Sains Malaysia (USM);

- (ii) mengadakan program promosi, kesedaran dan penyebaran ilmu. Antara program yang telah dijalankan termasuk penganjuran persidangan antarabangsa '*The International Conference on Bujang Valley and Early Civilisations in Southeast Asia*' pada tahun 2010; Seminar Kedah Tua *International Conference 2016* pada tahun 2016; penganjuran Festival Kedah Tua pada tahun 2019 dan 2021. Antara pengisian di dalam program Festival Kedah Tua adalah Wacana Kedah Tua, Dokumentasi Khas Kedah Tua, Bual Bicara Kedah Tua dan Pameran Maya 360° Tapak Sungai Batu, Kedah;
- (iii) melaksanakan usaha untuk mencalonkan Tapak Arkeologi Sungai Batu ke Peringkat UNESCO. Kementerian ini melalui JWN telah mengadakan perbincangan dengan pakar-pakar dari universiti tempatan sejak Mac 2018. Namun begitu, Tapak Arkeologi Lembah Bujang memerlukan kajian lanjut bagi memenuhi kriteria serta mempunyai *Outstanding Universal Value* (nilai keunggulan sejagat) seperti yang telah dinyatakan dalam *UNESCO Operational Guidelines*. Perkara ini masih lagi dalam tindakan pihak Jabatan Warisan Negara sebelum dossier pencalonan dapat disediakan; dan
- (iv) melaksanakan kerja-kerja pembangunan di Tapak Arkeologi Sungai Batu meliputi Kerja-kerja Naik Taraf Kemudahan Pelancongan Di Tapak Arkeologi Sungai Batu Dan Kerja-kerja Berkaitan.

4. Bagi tahun 2022, MOTAC telah merancang untuk melaksanakan program perintis Pemandu Pelancong Tapak Warisan. Lembah Bujang telah dipilih sebagai projek rintis untuk program ini. Objektif program ini antara lain adalah untuk mempelbagaikan kaedah individu melancong dan mempelbagaikan fungsi lesen Pemandu Pelancong. Ini secara tidak

SOALAN NO : 91

langsung dapat mempromosikan Tapak Arkeologi Sungai Batu dan seterusnya merancakkan sektor pelancongan negara.

5. Sementara itu, inisiatif bagi mempromosikan Tapak Arkeologi Sungai Batu terus dijalankan oleh MOTAC seperti mengadakan program lawatan produk dan perbincangan mengenai produk arkeo-pelancongan. Bengkel dan seminar kepada agensi pelancongan Wilayah Utara juga turut dianjurkan. Selain itu, kerjasama dengan Pusat Penyelidikan Arkeologi Global (PPAG), USM turut diperkukuhkan tidak terhad kepada usaha penyelidikan semata-mata, malah turut meliputi aspek mempromosikan pakej arkeo-pelancongan di Tapak Arkeologi Sungai Batu.

6. MOTAC turut bekerjasama rapat dengan Pihak Berkuasa Negeri (PBN) dan Pihak Berkuasa Tempatan (PBT) dalam mempertimbangkan permohonan bagi membangun dan menaik taraf tapak atau produk pelancongan di seluruh negeri Kedah termasuk Sungai Batu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : PUAN WONG SHU QI [KLUANG]
TARIKH : 20 JULAI 2022 (RABU)

SOALAN

PUAN WONG SHU QI [KLUANG] minta **MENTERI KEWANGAN** menyatakan status terkini projek *Integrated Cashless Payment System* (ICPS) bagi pengangkutan awam di Lembah Klang yang dilaksanakan melalui Transit Acquirer Sdn Bhd (TASB) serta kos yang telah dibelanja.

JAWAPAN

Tuan Yang di-Pertua,

Pada 16 Jun 2021, Kerajaan telah memutuskan supaya Transit Acquirer Sdn Bhd (TASB) diberikan hak eksklusif untuk membangun dan mengoperasikan projek *Integrated Common Payment System* (ICPS) di Lembah Klang. Selain itu, Kerajaan turut memutuskan supaya penyertaan ekuiti pihak swasta dalam TASB bagi pelaksanaan projek ICPS dipertimbang melalui kaedah *Request for Proposal* (RFP) yang dijalankan secara tender terbuka.

Pada masa ini, pihak Menteri Kewangan Diperbadankan (MKD) sedang memuktamadkan pelantikan syarikat swasta yang akan mengambil alih ekuiti TASB seterusnya melaksanakan pembangunan serta pengoperasian ICPS di Lembah Klang.

Bagi pembangunan ICPS di bawah RFP semasa, tiada sebarang kos yang dibelanjakan oleh Kerajaan. Untuk makluman, kos pembangunan, pengoperasian dan penyelenggaraan ICPS akan ditanggung sepenuhnya oleh TASB. Sebagai pulangan, TASB akan diberi hak mengutip surcaj ICPS.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : DATUK SERI DR. HAJI DZULKEFLY BIN
AHMAD (KUALA SELANGOR)**

TARIKH : 20 JULAI 2022 (RABU)

SOALAN

DATUK SERI DR. HAJI DZULKEFLY BIN AHMAD [KUALA SELANGOR] minta **MENTERI PERTANIAN DAN INDUSTRI MAKANAN** menyatakan apakah langkah-langkah baru yang akan diperkenalkan Kementerian bagi menjamin tidak akan berulang dilakukan oleh pihak Kementerian untuk mengurangkan kos bahan makanan buat industri ternakan negara.

JAWAPAN

Tuan Yang di-Pertua,

Untuk makluman Ahli Yang Berhormat, bagi mengurangkan kos bahan makanan ternakan, Kementerian Pertanian dan Industri Makanan (MAFI) telah mengambil langkah berikut:

- (a) Jangka pendek
 - (i) pemberian subsidi kepada penternak ayam pedaging dan penelur sebanyak RM1.1 bilion; dan
 - (ii) pemberian insentif makanan ternakan ruminan kepada penternak kecil ruminan yang berjumlah RM10 juta.

(b) Jangka sederhana

- (i) menjalinkan kerjasama dengan syarikat swasta, syarikat berkaitan Kerajaan (GLC), dan koperasi untuk melabur dalam pembangunan industri jagung bijian; dan
- (ii) mewujudkan ladang kontrak dengan usahawan jagung bijian dan syarikat pemprosesan jagung bijian.

(c) Jangka panjang

- (i) membangunkan Program Pembangunan Jagung Bijian Negara bagi mengurangkan kebergantungan kepada sumber jagung import sebanyak 30%;
- (ii) menyediakan Dana Pembiayaan Agromakanan Keluarga Malaysia (DPAKM) di bawah Agrobank bagi menjamin kesinambungan aktiviti pengeluaran makanan bernilai RM800 juta;
- (iii) bekerjasama dengan Kementerian Perusahaan Perladangan dan Komoditi (MPIC) untuk meningkatkan penggunaan PKC/PKE tempatan dalam rumusan makanan haiwan; dan
- (iv) menjalankan kajian bagi menghasilkan makanan ternakan tempatan berasaskan isirung sawit PKC/PKE; dedak beras; mil ikan dan mil ofal ikan; larva *Black Soldier Fly* (BSF); dan sisa hampas soya.

MAFI berharap pelbagai inisiatif yang sedang dan akan dilaksanakan dapat mengurangkan kos bahan makanan untuk industri ternakan negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN NGA KOR MING [TELUK INTAN]

TARIKH : 20 JULAI 2022 (RABU)

SOALAN

TUAN NGA KOR MING [TELUK INTAN] minta **MENTERI KANAN PENDIDIKAN** menyatakan secara terperinci apakah langkah-langkah segera yang akan diambil untuk mengatasi masalah kekurangan guru di SKJK(C) dan SKJK(T) ini dan sama ada Kementerian ada rancangan jadual waktu untuk memenuhi objektif tersebut.

JAWAPAN

Tuan Yang di-Pertua,

Kementerian Pendidikan Malaysia (KPM) telah mengumumkan Pengambilan Khas seramai 18,702 orang Pegawai Perkhidmatan Pendidikan (PPP) Gred DG41 secara *one-off* pada 20 Jun 2021 bagi mengatasi masalah kekurangan guru di sekolah KPM seluruh negara. Pengambilan khas tersebut adalah bagi mengisi kekosongan guru di sekolah bawah KPM termasuk di sekolah jenis kebangsaan Cina (SJKC) dan sekolah jenis kebangsaan Tamil (SJKT). Dalam hal ini, Suruhanjaya Perkhidmatan Pendidikan (SPP) selaku Pihak Berkuasa Melantik telah selesai melaksanakan pengambilan khas ini pada 27 Mei 2022. Urusan penempatan guru lantikan secara tetap dan *Contract of Service* (CoS) ke sekolah-sekolah juga telah dilaksanakan oleh KPM.

Bagi tahun 2022, SPP akan melaksanakan temuduga bagi graduan Program Ijazah Sarjana Muda Perguruan (PISMP) untuk mengisi kekosongan guru di Sekolah Kebangsaan, SJKC dan SJKT. Temuduga PISMP ini akan dijalankan pada 25 Julai hingga 4 Ogos 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

DARIPADA : PUAN NOR AZRINA BINTI SURIP (MERBOK)

TARIKH : 20 JULAI 2022 (RABU)

SOALAN

Puan Nor Azrina binti Surip (Merbok) minta **MENTERI PERTANIAN DAN INDUSTRI MAKANAN** menyatakan status polisi penanaman jagung bijian dan tempoh jangkaan 15 tahun kestabilan industri dari seluruh nilai rantai serta pendekatan jangkamasa pendek dan sederhana rantai makanan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pertanian dan Industri Makanan (MAFI) telah membangunkan Program Pembangunan Jagung Bijian Negara melalui Pelan Pembangunan Industri Jagung Bijian bagi tempoh lima belas (15) Tahun bermula tahun 2017-2032 dengan dengan matlamat mengurangkan 30% import jagung bijian negara. Fasa Pembangunan Jagung Bijian ini merangkumi 3 fasa dengan penglibatan pelbagai Jabatan, Agensi, Koperasi, Syarikat Berkaitan Kerajaan (GLC) dan Swasta, iaitu:

- (i). Fasa Rintis (2017 – 2022);
- (ii). Fasa Pengukuhan (2023 – 2027); dan
- (iii). Fasa Pengembangan (2028 – 2032).

Di bawah RMK-12, MAFI melalui Jabatan Pertanian (DOA) meneruskan kesinambungan Fasa Rintis jagung bijian di bawah Projek Pembangunan Makanan Ternakan yang peruntukan sebanyak RM 8.5 juta dengan menyasarkan kawasan penanaman seluas 280 hektar. Bagi tahun 2021, seluas 109.6 hektar telah dibangunkan dengan penglibatan seramai 50 orang peserta manakala baki 180 hektar lagi sedang dibangunkan pada tahun ini bagi melengkapkan Fasa Rintis ini. Program pembangunan ini menawarkan:

- (i). Insentif galakan dalam bentuk *in-kind* dan geran padanan bagi menarik lebih ramai usahawantani untuk menanam jagung bijian; dan
- (ii). Perkhidmatan jentera dan mekanisasi seperti *planter* dan *harvester* untuk kegunaan petani jagung bijian.

MAFI kini juga sedang menilai semula Pelan Pembangunan Industri Jagung Bijian melalui pelaksanaan kajian penilaian semula

berdasarkan pencapaian keluasan bertanam dalam Fasa Rintis. Hasil dapatan kajian, akan membantu MAFI untuk melihat isu-isu pelaksanaan serta merancang sasaran keluasan bertanam yang lebih praktikal dalam menggapai sasaran hasil pengeluaran yang ditetapkan. Pada Fasa Pengukuhan, MAFI akan memfokuskan model untuk diusahakan oleh syarikat swasta berskala besar yang mempunyai keupayaan kewangan, *landbank* serta teknikal dalam keseluruhan rantai bekalan memandangkan jagung bijian dilihat lebih ekonomik sekiranya ditanam di kawasan berskala besar (sekurang-kurangnya 10 hektar).

Strategi jangka sederhana MAFI bagi penanaman jagung bijian adalah seperti berikut:

- (i). Bekerjasama dengan syarikat swasta, GLC, koperasi dan sebagainya yang berminat melabur dalam pembangunan industri jagung bijian; dan
- (ii). Mewujudkan ladang kontrak dengan usahawan-usahawan jagung bijian dan syarikat-syarikat pemprosesan jagung bijian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN SYED SADDIQ BIN SYED ABDUL
RAHMAN [MUAR]
TARIKH : 20 JULAI 2022 (RABU)

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI KEWANGAN** menyatakan jumlah angka perbelanjaan projek Kerajaan Persekutuan yang melibatkan rundingan terus ataupun *direct negotiation* sejak bulan Mac tahun 2020 sehingga kini.

JAWAPAN

Tuan Yang di-Pertua,

Untuk makluman Yang Berhormat, pertimbangan pengecualian kaedah perolehan secara rundingan terus dibuat berdasarkan kriteria seperti melibatkan kesegeraan atas kepentingan awam, bagi maksud penyeragaman, satu punca bekalan/perkhidmatan (pembuat/pemegang francais), melibatkan keselamatan/strategik atau kontrak dengan syarikat pembuat Bumiputera sepertimana yang dinyatakan di bawah PP/PK 7.15: Garis Panduan Permohonan Perolehan Secara Rundingan Terus.

Namun, semua permohonan yang dikemukakan akan melalui satu proses penilaian dan penelitian yang menyeluruh daripada pelbagai aspek bagi memastikan kelulusan rundingan terus yang diberikan tetap melindungi kepentingan Kerajaan serta tidak menjejaskan kerancakan perkembangan ekonomi. Kerajaan juga melaksanakan *due diligence* yang sewajarnya bagi memastikan hanya projek yang benar-benar memenuhi kriteria tersebut boleh dipertimbangkan.

Kementerian Kewangan (MOF) mengambil maklum berhubung perkara yang dibangkitkan oleh YB Muar berhubung perbelanjaan projek Kerajaan Persekutuan yang melibatkan rundingan terus ataupun *direct negotiation*. Untuk makluman Yang Berhormat, MOF masih lagi dalam proses mengkaji semula paparan senarai pengecualian kaedah perolehan secara rundingan terus di Portal MyProcurement untuk tatapan umum.

Secara dasarnya, setiap perolehan Kerajaan yang bernilai melebihi RM500,000 hendaklah dilaksanakan secara tender terbuka selaras peraturan perolehan Kerajaan di bawah Pekeliling Perbendaharaan (PP)/Perolehan Kerajaan (PK) 2.1: Kaedah Perolehan Kerajaan. Pelaksanaan perolehan Kerajaan secara tender terbuka adalah selari dengan amalan peringkat antarabangsa. Peraturan perolehan Kerajaan dikeluarkan oleh Kementerian Kewangan juga telah memastikan Kementerian/Agensi mempunyai garis panduan yang jelas dalam melaksanakan urusan perolehan termasuk peringkat pembuat keputusan bagi satu-satu perolehan berdasarkan prinsip pelaksanaan perolehan Kerajaan secara tidak berpusat (*decentralise*).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KE EMPAT BELAS**

PERTANYAAN : LISAN

**DARIPADA : YB TUAN SU KEONG SIONG
[KAMPAR]**

TARIKH : 20 JULAI 2022 (RABU)

SOALAN

TUAN SU KEONG SIONG [KAMPAR] minta **MENTERI PERTANIAN DAN INDUSTRI MAKANAN** menyatakan jumlah keseluruhan peruntukan atau insentif yang telah disalurkan bagi membiayai Taman Kekal Pengeluaran Makanan (TKPM) di seluruh negara sejak ianya dilancarkan. Berapa jumlah pengeluaran tanaman daripada keseluruhan TKPM di Malaysia.

JAWAPAN

Tuan Yang di-Pertua,

Untuk makluman Ahli Yang Berhormat, Taman Kekal Pengeluaran Makanan (TKPM) merupakan sebahagian kawasan rizab yang diwartakan oleh Kerajaan Negeri bagi tujuan aktiviti-aktiviti berasaskan pertanian berasaskan tanaman, akuakultur dan ternakan. Ini merupakan inisiatif yang dilaksanakan oleh Kementerian dengan kerjasama Kerajaan Negeri untuk menggalakkan pelaburan sektor swasta dan penyertaan golongan sasar dalam bidang pengeluaran makanan.

Kerajaan Persekutuan dan Kerajaan Negeri telah menandatangani memorandum persefahaman bagi pembangunan TKPM yang menggariskan tanggungjawab Kerajaan Persekutuan dan Kerajaan Negeri. Kerajaan Persekutuan melalui Kementerian Pertanian dan Industri Makanan bertanggungjawab untuk menyediakan prasarana asas seperti jalan masuk, saliran utama, pengairan serta kemudahan bekalan air dan elektrik manakala Kerajaan Negeri bertanggungjawab untuk melantik peserta untuk mengusahakan tanah-tanah TKPM yang telah disediakan.

Jumlah peruntukan yang telah dibelanjakan untuk membangunkan TKPM di seluruh negara adalah seperti berikut:

1. Sebanyak RM390.2 juta telah diperuntukan untuk membangunkan TKPM sektor tanaman melibatkan penyediaan infrastruktur dan kemudahan asas;
2. Bagi sektor perikanan akuakultur atau dikenali sebagai TKPM Zon Industri Akuakultur (ZIA) pula, Kerajaan telah membelanjakan sejumlah RM146.75 juta; dan
3. Untuk TKPM sektor ternakan pula sebanyak RM142.8 juta telah dibelanjakan melibatkan penyediaan kemudahan infrastruktur asas seperti kandang, jalan ladang, pengairan dan saliran dan sebagainya.

Limpahan ekonomi dari inisiatif TKPM ini dapat dilihat dengan nilai pengeluaran yang berganda dalam pada masa yang sama dapat membantu petani dan penternak kecil meningkatkan pendapatan mereka. Sehingga 2021, TKPM tanaman telah mengeluarkan hasil bernilai RM640 juta. Manakala jumlah pengeluaran TKPM ZIA pada tahun 2021 sebanyak RM3.35 bilion. Sehingga bulan Mei 2022, TKPM ternakan telah mengeluarkan hasil bernilai RM619.4 juta.

Kerajaan sentiasa memantau prestasi peserta projek melalui sasaran output yang telah ditetapkan. Bagi peserta yang berdaya maju dan berprestasi tinggi, tawaran untuk pembaharuan sewaan akan diberikan setelah tamat tempoh sewaan asal. Manakala, sekiranya peserta gagal mematuhi syarat-syarat yang telah ditetapkan tindakan seperti amaran dan juga penamatan boleh diambil. Kerajaan memandang serius prestasi setiap peserta dan sekiranya peserta tidak memberikan komitmen atau tidak mencapai sasaran yang ditetapkan dan tindakan yang sewajarnya akan diambil.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN TAN KOK WAI [CHERAS]

TARIKH : 20 JULAI 2022 (RABU)

SOALAN

TUAN TAN KOK WAI [CHERAS] minta **MENTERI KANAN PENDIDIKAN** menyatakan sekiranya pendidikan politik akan diperkenalkan dalam silibus pendidikan sekolah untuk meningkatkan pengetahuan para pelajar sekolah rendah dan menengah mengenai politik tanah air dan antarabangsa.

JAWAPAN

Tuan Yang di-Pertua,

Kementerian Pendidikan Malaysia (KPM) telah melaksanakan pelbagai usaha bagi memupuk kesedaran tentang politik tanah air dan antarabangsa dalam kalangan murid sekolah.

Dalam konteks kurikulum, usaha KPM ini diterapkan melalui pelaksanaan kurikulum persekolahan, iaitu dalam mata pelajaran Sejarah. Bermula dari sekolah rendah, murid diajar mengenai Perlembagaan Persekutuan dan tanggungjawab rakyat kepada negara. Ini termasuk latar belakang pengetahuan asas sejarah negara melalui tema “Sejarah Awal Negara, Kedaulatan Negara dan Kemakmuran Negara Kita” untuk membentuk karakter murid sebagai warganegara yang bertanggungjawab dan cinta akan negara.

Selaras dengan kematangan usia dan tahap pengetahuan, murid sekolah menengah didedahkan secara lebih mendalam tentang politik melalui tema “Sejarah Kita dan Dunia, Warisan Bangsa, Kedatangan Kuasa Asing, Pembinaan Negara serta Malaysia dan Masa Hadapan”. Ini adalah bertujuan supaya murid memahami kepentingan peranan mereka sebagai warganegara yang bertanggungjawab untuk mengekalkan keharmonian dan kestabilan negara.

Bagi memupuk kesedaran politik melalui aktiviti kokurikulum pula, KPM menjalin kerjasama dengan Jabatan Penerangan Malaysia (JaPen), bagi melaksanakan pelbagai aktiviti patriotisme melalui Kelab Malaysiaku. KPM turut menyokong program yang dianjurkan oleh Jabatan Perpaduan Negara dan Integrasi Nasional (JPNIN) melalui Kelab Rukun Negara yang merangkumi pelbagai aktiviti berteraskan kepada pengukuhan pengetahuan, pemahaman, penghayatan dan pengamalan Rukun Negara.

KPM telah memperkenalkan konsep Sekolahku SEJAHTERA. Pendekatan ini bertujuan memupuk dan menerapkan nilai-nilai penting kehidupan dalam kalangan warga sekolah, termasuk murid. Nilai-nilai ini diterap dan dididik oleh guru secara langsung atau tidak langsung di dalam

aktiviti kurikulum dan kokurikulum. Ini bagi memastikan murid dapat benar-benar menghayatinya seterusnya menjadi sebahagian daripada amalan dalam kehidupan mereka sama ada di sekolah atau di luar sekolah.

Penerapan elemen jati diri, harmoni, rasional dan artikulasi akan dapat membentuk keperibadian murid serta melahirkan warganegara yang berupaya membuat keputusan yang berasaskan pengetahuan (informed citizen) demi mengekalkan sistem demokrasi negara.

KPM berpandangan pelaksanaan kandungan kurikulum dan aktiviti kokurikulum sedia ada membolehkan murid memperoleh pengetahuan, pemahaman serta penghayatan tentang pendidikan politik dan perlembagaan persekutuan. KPM yakin bahawa pengetahuan dan penghayatan tersebut boleh diaplikasikan dalam kehidupan harian serta dapat mempersiapkan murid untuk melaksanakan hak dan tanggungjawab mereka kepada negara.

Sekian, terima kasih.

RJM25

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

DARIPADA : DATO' SERI DR. WAN AZIZAH WAN ISMAIL [PANDAN]

TARIKH : 20 JULAI 2022 (RABU)

SOALAN

DATO' SERI DR. WAN AZIZAH WAN ISMAIL [PANDAN] minta **MENTERI PERTANIAN DAN INDUSTRI MAKANAN** menyatakan:-

- (a) apakah strategi jangka panjang yang mampan dan kukuh yang telah dan akan dilaksanakan oleh Kementerian; dan
- (b) apakah hasil terkini beberapa dasar yang telah dirangka sebelum ini untuk menyelesaikan masalah keselamatan makanan seperti NAP 2011-2020, DAN 2.0 serta DSMN 2021-2025.

JAWAPAN

Tuan Yang di-Pertua,

Untuk makluman Ahli Yang Berhormat, strategi jangka panjang yang telah dan akan dilaksanakan oleh Kementerian Pertanian dan Industri Makanan (MAFI) untuk menangani isu sekuriti makanan adalah digariskan dalam Dasar Agromakanan Negara 2021-2030 (DAN 2.0) dan Pelan Tindakan Dasar Sekuriti Makanan Negara 2021-2025 (DSMN 2021-2025). Antara strategi tersebut termasuk:

- (i) meningkatkan penggunaan teknologi moden dan pertanian pintar dalam sistem makanan melalui pemerkasaan aktiviti penyelidikan, pembangunan, pengkomersialan dan inovasi (R&D&C&I) serta penyediaan sumber dana dan agroteknologi yang bersesuaian;
- (ii) membangunkan modal insan dan tenaga kerja tempatan yang berkemahiran tinggi untuk menyokong keperluan industri pada masa hadapan;
- (iii) memperluas amalan pertanian mampan termasuk pengurusan sumber asli yang cekap serta pengurangan kehilangan dan pembaziran makanan;
- (iv) meningkatkan adaptasi pengeluaran makanan terhadap kesan perubahan iklim seperti bencana dengan pewujudan skim perlindungan yang bersesuaian;
- (v) memperkukuh tadbir urus sektor agromakanan termasuk kerjasama merentasi kementerian, kerajaan negeri, pemain industri dan pihak berkepentingan serta pengukuhan data berkaitan sekuriti makanan.

Pelaksanaan Dasar Agromakanan Negara 2011-2020 (DAN) telah tamat tempoh pada tahun 2020. Hasil pencapaian DAN adalah seperti berikut:

SOALAN NO : 99

- (i) Keluaran Dalam Negeri Kasar (KDNK) sektor agromakanan meningkat pada kadar pertumbuhan purata tahunan 3.9% bagi tempoh 2010 hingga 2020;
- (ii) nilai eksport makanan meningkat daripada RM18.1 bilion pada tahun 2010 kepada RM33.7 bilion pada tahun 2020 atau peningkatan sebanyak 86.2%;
- (iii) produktiviti pekerja dalam sektor agromakanan meningkat pada kadar pertumbuhan purata tahunan 5.0% bagi tempoh 2010 hingga 2020.

Melalui pelbagai strategi dan program yang telah dan akan dilaksanakan melalui DAN 2.0 dan DSMN 2021-2025, sektor agromakanan akan terus diperkasa dan diberikan tumpuan seterusnya menyumbang kepada pengukuhan sekuriti makanan negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN
RAKYAT MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN SIVAKUMAR VARATHARAJU NAIDU
[BATU GAJAH]**

TARIKH : 20 JULAI 2022 (RABU)

SOALAN

TUAN SIVAKUMAR VARATHARAJU NAIDU [BATU GAJAH] minta **MENTERI KANAN PENDIDIKAN** menyatakan jumlah pengambilan pelajar-pelajar berbangsa Cina dan India untuk memasuki program matrikulasi pada tahun 2020 dan 2021. Adakah Kementerian bercadang untuk menambahkan jumlah pengambilan pelajar-pelajar berbangsa Cina dan India memasuki program matrikulasi pada tahun ini.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan menetapkan dasar pengambilan pelajar ke Program Matrikulasi adalah tertakluk kepada kuota 90 peratus bagi pelajar bumiputera dan 10 peratus bagi pelajar bukan bumiputera. Bagi pengagihan kuota 10 peratus kepada pelajar bukan bumiputera, Kerajaan telah memutuskan bahawa peratusan pengambilan pelajar adalah mengikut nisbah 5.43 peratus untuk kaum Cina, 3.72 peratus untuk kaum India dan 0.85 peratus untuk lain-lain. Oleh demikian, tawaran kemasukan ke Program Matrikulasi adalah mengikut komposisi yang telah ditetapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : PUAN ALICE LAU KIONG YIENG (LANANG)

TARIKH : 20 JULAI 2022 (RABU)

SOALAN

Puan Alice Lau Kiong Yieng (Lanang) minta **MENTERI PERTANIAN DAN INDUSTRI MAKANAN** menyatakan usaha Kementerian dalam membendung kenaikan harga kos baja dan racun dalam pertanian serta apakah usaha Kementerian untuk membantu para petani dan pekebun-pekebun kecil susulan kenaikan harga baja dan racun.

JAWAPAN

Tuan Yang di-Pertua,

Untuk makluman Ahli Yang Berhormat, kenaikan harga input pertanian seperti baja dan racun yang berlaku berpunca daripada beberapa faktor seperti perubahan dasar negara pengeksport, kenaikan kos bahan mentah serta kenaikan kos logistik. Konflik geopolitik dunia seperti krisis Rusia-Ukraine juga telah memberi kesan terhadap rantai bekalan makanan dunia dan Malaysia tidak terkecuali dari menerima tempiasnya.

Kerajaan memandang serius perkara ini dan beberapa langkah telah diambil bagi membantu para petani, pekebun kecil serta peladang bagi mengurangkan beban kenaikan kos input pertanian seperti berikut:-

- i. Penyediaan Dana Pembiayaan Agromakanan Keluarga Malaysia (DPAKM) sebanyak RM100 juta bagi tempoh 8.5 tahun termasuk 6 bulan moratorium kepada pengusaha yang memohon di bawah Agrobank;
- ii. Pemberian Subsidi Padi sebanyak RM1.5 bilion merangkumi Skim Baja Padi Kerajaan Persekutuan (SBPKP), Skim Insentif Pengeluaran Padi (SIPP), Insentif Benih Padi Sah (IBPS) dan Skim Baja dan Racun Padi Bukit (SBRPB) serta tambahan peruntukan sebanyak RM62 juta bagi Skim Insentif Pengeluaran Padi (SIPP) yang memberi manfaat kepada 322,830 orang pesawah;
- iii. Peruntukan sebanyak RM200 juta di bawah Tabung Ekonomi Kumpulan Usahawan Niaga (TEKUN) dan Agrobank sebagai pinjaman pada kadar faedah sifar peratus dan moratorium bayaran balik pinjaman selama enam bulan bagi membantu 276,621 orang pengusaha tanaman sayur-sayuran serta buah-buahan;
- iv. Menggalakkan petani mengamalkan Pengurusan Perosak Bersepadu (*Integrated Pest Management*) bagi mengurangkan kebergantungan terhadap racun kimia melalui kawalan secara kultura, kawalan fizikal dan kawalan biologi;
- v. Meningkatkan amalan pertanian baik melalui program pensijilan myGAP dan myOrganik. Amalan pertanian baik merupakan suatu sistem pengurusan sumber di dalam pengeluaran pertanian secara lestari di mana penggunaan baja dan racun adalah mengikut kitaran dan keperluan tanaman;
- vi. Menggalakkan penggunaan teknologi-teknologi moden seperti fertigasi dan *control environment farming*. Fertigasi merupakan kaedah penanaman menggunakan air baja yang dibekalkan mengikut masa yang ditetapkan kepada tanaman bagi mengelakkan berlakunya pembaziran penggunaan baja manakala *control environment farming* merupakan satu sistem yang mengawal keperluan tanaman seperti cahaya, air, suhu dan

kelembapan supaya tanaman dapat tumbuh dengan lebih sihat dalam persekitaran yang dikawal.

- vii. Menggunakan benih-benih berkualiti dan varieti yang rentan penyakit dan perubahan iklim. Benih-benih berkualiti dan varieti yang rentan penyakit dan perubahan iklim akan dapat membantu tumbesaran tanaman tanpa terlalu bergantung kepada baja dan racun.
- viii. Penggunaan kaedah *soil profiling* yang membantu mengenalpasti kandungan nutrien yang tersedia di dalam tanah dan membolehkan penggunaan baja dilaksanakan secara efisien mengikut kuantiti yang diperlukan oleh tanaman sahaja.
- ix. Menggalakkan dan mempromosikan penggunaan input pertanian berasaskan mikroorganisma berfaedah *Effective Microorganism* seperti 'Plant Booster', '*Growth Enhancer*' dan 'Bokashi';
- x. Menggalakkan penggunaan bahan sisa tanaman seperti jerami padi untuk dijadikan baja kompos; dan
- xi. Menjalankan aktiviti pengembangan bagi mendidik petani untuk menggunakan baja dan racun mengikut keperluan dan sukatan yang tepat dengan teknik-teknik yang betul supaya penggunaan racun dan baja adalah berkesan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATO' NGEH KOO HAM [BERUAS]
TARIKH : 20 JULAI 2022 (RABU)

SOALAN

DATO' NGEH KOO HAM [BERUAS] minta **MENTERI KEWANGAN** menyatakan jenis-jenis cukai dan juga kadar-kadar cukai yang dikenakan ke atas kenderaan-kenderaan di Malaysia.

JAWAPAN

Tuan Yang di-Pertua,

Untuk makluman Ahli Yang Berhormat, secara umumnya kenderaan yang diimport adalah tertakluk kepada kenaan duti import, duti eksais dan cukai jualan, manakala kenderaan pemasangan tempatan hanya dikenakan duti eksais dan cukai jualan. Kadar duti dan cukai yang dikenakan adalah berbeza-beza mengikut jenis kenderaan dan kapasiti enjin. Duti import dikenakan pada kadar di antara 0% hingga 30%, duti eksais dikenakan pada kadar di antara 60% hingga 105%, manakala cukai jualan dikenakan pada kadar 10%.

Kadar duti import dan duti eksais yang dikenakan mengikut jenis kenderaan ini boleh dirujuk terus di bawah Perintah Duti Kastam 2022 dan Perintah Duti Eksais 2022 yang boleh diakses melalui Portal Rasmi Jabatan Kastam Diraja Malaysia di laman sesawang <http://www.customs.gov.my/> atau melalui Portal Perundangan Persekutuan Malaysia, Jabatan Peguam Negara di laman sesawang <https://lom.agc.gov.my/>.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN LIM GUAN ENG [BAGAN]
TARIKH : 20 JULAI 2022 (RABU)

SOALAN

TUAN LIM GUAN ENG [BAGAN] minta **MENTERI KEWANGAN** menyatakan apakah jenis dan nilai bantuan kewangan yang diberikan kepada golongan M40 dan SME untuk menghadapi kenaikan inflasi dan kos sara hidup yang melambung tinggi dalam tempoh tahun ini.

JAWAPAN

Tuan Yang di-Pertua,

Kerajaan peka kepada kenaikan harga komoditi dan kadar inflasi ekoran gangguan kepada rantai bekalan global dan konflik Ukraine-Rusia, yang telah mengakibatkan impak kenaikan harga barangan asas kepada kebanyakan negara di seluruh dunia, termasuk Malaysia. Dalam usaha membangun semula ekonomi rakyat dan memacu pemulihan negara, Bajet 2022 telah digarap bagi memastikan semua segmen masyarakat dan perniagaan dibantu. Justeru, tumpuan diberikan ke arah pemberian subsidi yang memanfaatkan semua termasuk M40, langkah insentif cukai bagi M40, janaan dan pengekalan pekerjaan serta membantu PKS terutamanya melalui program SemarakNiaga.

Di atas keprihatinan Kerajaan terhadap kebajikan dan kesejahteraan rakyat terutamanya dalam menangani kenaikan harga barangan keperluan asas, Kerajaan telah meneruskan bahkan meningkatkan bantuan dan subsidi kepada rakyat, bukan sahaja kepada golongan B40 tetapi juga kepada golongan M40 dan T20. Bagi mengurangkan impak kenaikan harga makanan asas kepada rakyat, Kerajaan telah melaksanakan langkah kawalan harga serta memperkenalkan subsidi bagi ayam dan telur yang memanfaatkan semua termasuklah M40. Kerajaan juga akan terus melaksanakan pemberian subsidi sedia ada terutamanya subsidi kepenggunaan yang meliputi subsidi barangan keperluan asas yang diunjurkan melibatkan implikasi kewangan Kerajaan sebanyak RM51 bilion bagi tahun 2022 yang merangkumi subsidi petrol RON95 sebanyak RM27 bilion. Berdasarkan survei perbelanjaan isirumah oleh DOSM, daripada jumlah keseluruhan perbelanjaan isi rumah ke atas RON95, peratus perbelanjaan penggunaan rakyat adalah 22% oleh golongan B40 dan 46% oleh golongan M40. Ini bermaksud bagi subsidi RON95 sahaja untuk tahun 2022, B40 bakal memanfaatkan subsidi bernilai RM6 bilion sementara golongan M40 bakal memanfaatkan RM13 bilion. Dengan itu, jelas bahawa golongan M40 tidak dipinggirkan oleh Kerajaan.

Kerajaan juga menyediakan pelbagai program peningkatan kemahiran dan latihan semula kepada golongan pekerja termasuk dalam kalangan M40 yang bertujuan untuk meningkatkan kebolehpasaran pekerja dalam mendepani landskap pekerjaan yang semakin kompetitif. Bagi membangun semula ekonomi rakyat, Kerajaan di bawah inisiatif Jamin Kerja Keluarga Malaysia atau JaminKerja akan menjamin penyediaan 600 ribu peluang pekerjaan dengan peruntukan berjumlah 4.8 bilion ringgit. Sehingga Jun 2022, lebih 150,000 rakyat telah mendapat manfaat dan pekerjaan melalui program ini. Kadar pengangguran negara telah turun dari puncaknya setinggi 5.3% pada Mei 2020 kepada 3.9% bulan Mei 2022 iaitu mencapai tahap guna tenaga penuh.

Dalam mengembalikan keupayaan perniagaan kepada para usahawan, Kerajaan sebagai pemudah cara telah memperluaskan akses pembiayaan, terutamanya untuk pengusaha Pengusaha Mikro, Kecil dan Sederhana (PMKS) dan sektor informal. Melalui Bajet 2022, pakej pembiayaan dengan nilai keseluruhan berjumlah 40 bilion ringgit telah disediakan di bawah Program Semarak Niaga Keluarga Malaysia atau SemarakNiaga. Skim pembiayaan ini merangkumi pinjaman langsung, jaminan pembiayaan dan suntikan ekuiti dengan sasaran untuk memanfaatkan setiap golongan usahawan tidak kira perusahaan mikro ataupun syarikat tersenarai awam.

Kerajaan memahami kesulitan yang dihadapi oleh PMKS terutamanya dalam konflik global yang melanda seluruh dunia. Justeru, Kerajaan telah menyediakan:

- i. Pembiayaan kredit mikro bernilai hampir 1.8 bilion ringgit yang disediakan melalui pelbagai agensi seperti TEKUN, Agrobank, BSN, Bank Rakyat dan Bank Negara Malaysia. Kerajaan melalui TEKUN Nasional juga membantu usahawan dari kalangan M40 dan SME yang memerlukan bantuan pembiayaan bagi kelangsungan perniagaan mereka tertakluk kepada syarat yang telah ditetapkan TEKUN Nasional. Usahawan yang memenuhi syarat kelayakan adalah layak untuk mendapatkan bantuan pembiayaan TEKUN Nasional daripada nilai minima RM1,000 sehingga maksimum RM100,000 dengan tempoh bayaran balik

sehingga 10 tahun. SME Corp. Malaysia menawarkan bantuan kewangan dalam bentuk geran bersamaan kepada PMKS melalui Program Peningkatan Enterpris Bumiputera (BEEP) dan Program *Business Accelerator* (BAP). Dana tahun 2022 bagi kedua-dua program ini telah komited sepenuhnya. Selain itu, **BSN dan Agrobank juga akan menawarkan pinjaman mikro sehingga 75 ribu ringgit** pada kadar 0 peratus untuk enam bulan pertama berserta kemudahan moratorium sehingga enam bulan;

- ii. Perluasan **program I-TEKAD**, iaitu sebuah program kewangan sosial yang menawarkan modal permulaan, kredit mikro dan latihan kemahiran kepada usahawan mikro dengan peruntukan sebanyak 20 juta ringgit;
- iii. Bagi membantu syarikat yang berdepan masalah gearing atau leveraj, kaedah pendanaan bernilai 2.1 bilion ringgit melalui pelaburan ekuiti dan *quasi-equity* akan diperkenalkan. Kaedah ini akan diterajui oleh SME Bank dengan kerjasama TERAJU dan BSN dengan dana bernilai 600 juta ringgit dan terbuka kepada semua terutamanya usahawan Bumiputera. Selain itu, BPMB juga akan menawarkan Skim RESET (atau *Rehabilitation and Support Through Equity*) dan BNM juga menyediakan Business Recapitalisation Fund bernilai 1 bilion ringgit untuk tujuan yang sama; dan
- iv. 14.2 bilion ringgit dana tersedia untuk PKS. Untuk ketersediaan dana yang berterusan, dana khas BNM terutamanya *Targeted Relief and Recovery Facility* telah ditingkatkan sebanyak 2 bilion ringgit dan menjadikan jumlah ketersediaan pelbagai dana PKS BNM pada masa ini sebanyak 11.2 bilion ringgit. Selain itu, institusi kewangan seperti SME Bank, PUNB, BPMB, AgroBank, MIDF dan MARA turut menyediakan dana untuk PKS.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : PUAN HANNAH YEOH TSEOW SUAN
(SEGAMBUT)**

TARIKH : 20 JULAI 2022 (RABU)

SOALAN

PUAN HANNAH YEOH TSEOW SUAN (SEGAMBUT) minta **MENTERI PEMBANGUNAN WANITA, KELUARGA DAN MASYARAKAT** menyatakan apakah langkah Kementerian untuk menyelaraskan pelaksanaan dasar gaji minimum RM1,500 sebulan bagi tenaga kerja di TASKA dan kelangsungan operasi TASKA yang terpaksa bergelut untuk mengekalkan bayaran yang berpatutan kepada ibu dan bapa.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) menyambut baik Ucapan Perdana Menteri, YAB Datuk Seri Ismail Sabri Yaakob pada 28 April 2022 sempena Hari Pekerja dengan pengumuman pelaksanaan kadar gaji minimum RM1,500.00. Penetapan gaji minimum ini adalah selaras dengan peruntukan di bawah peruntukan Akta Majlis Perundingan Gaji Negara 2011 yang menetapkan keperluan mengkaji gaji minimum setiap dua tahun.

TASKA yang berdaftar di bawah JKM adalah TASKA swasta yang berentitikan perniagaan berasaskan keuntungan dan memerlukan daya usaha kreatif di pihak pengusaha bagi memastikan perniagaan TASKA berkembang maju dan berdaya saing.

Bidang kuasa JKM adalah tertakluk kepada Akta TASKA 1984 iaitu untuk membuat pendaftaran, pemeriksaan dan penguatkuasaan ke atas TASKA dan perkara berkaitan dengannya demi menentukan kesejahteraan, keselamatan dan perkembangan menyeluruh kanak-kanak.

Bagi meringankan beban ibu bapa yang berpendapatan rendah dan menyediakan peluang kepada kanak-kanak untuk mendapat asuhan dan didikan awal yang lebih baik di TASKA, Kerajaan telah menyediakan Subsidi Yuran Pengasuhan kepada kanak-kanak yang layak. Bermula tahun 2016 hingga 2021 Kerajaan telah membelanjakan sebanyak RM18,427,680.00 yang memberi manfaat kepada 7,474 orang kanak-kanak.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : TUAN SIM CHEE KEONG [BUKIT
MERTAJAM]**

TARIKH : 20 JULAI 2022 (RABU)

SOALAN

TUAN SIM CHEE KEONG [BUKIT MERTAJAM] minta **MENTERI PERTANIAN DAN INDUSTRI MAKANAN** menyatakan faktor mengapa hanya 5% daripada subsidi ayam berjumlah RM730 juta yang dibayar kepada industri pada hujung Mei 2022 dan setakat 18 Jun 22 hanya 27% dibayar. Apakah kelemahan yang menyebabkan kelewatan subsidi disalurkan dan langkah-langkah penyelesaian.

JAWAPAN

Tuan Yang di-Pertua,

Untuk makluman Ahli Yang Berhormat jua, Kerajaan telah memperuntukkan subsidi sebanyak RM369.5 juta bagi melanjutkan tempoh pemberian subsidi bermula 1 Julai 2022 hingga 31 Ogos 2022. Manakala jumlah subsidi yang diperuntukkan bagi tempoh 5 Februari 2022 hingga 30 Jun 2022 adalah sebanyak RM730 juta. Ini menjadikan jumlah subsidi yang diluluskan sejak 5 Februari 2022 adalah sebanyak RM1.1 bilion. Setakat 15 Julai 2022, sebanyak 7,680 permohonan subsidi telah diluluskan berjumlah RM632.6 juta.

Kerajaan melaksanakan langkah intervensi melalui pemberian subsidi kepada penternak ini bagi meringankan beban penternak yang berhadapan dengan kenaikan kos pengeluaran ayam. Langkah intervensi ini diharap dapat menstabilkan kembali bekalan sekaligus memastikan Keluarga Malaysia dapat membeli ayam dan telur dengan harga yang berpatutan dan tidak terbeban dengan cabaran kos sara hidup.

Kementerian Pertanian dan Industri Makanan (MAFI) melalui Jabatan Perkhidmatan Veterinar (DVS) sedang memproses permohonan subsidi sejak 28 Februari 2022. Bagi memudahkan proses tuntutan subsidi penternak, pelbagai inisiatif penambahbaikan dilaksanakan seperti berikut:

- (i) mempermudah prosedur permohonan subsidi dengan mengurangkan tiga (3) peringkat semakan dokumen di daerah, negeri dan ibu pejabat DVS) kepada satu (1) peringkat sahaja iaitu di negeri sebelum kelulusan pembayaran dilaksanakan di peringkat ibu pejabat DVS;
- (ii) melaksanakan pembayaran subsidi yang diluluskan dalam tempoh tiga (3) hari bekerja melalui Agrobank;
- (iii) mengurangkan dokumen permohonan daripada 13 dokumen kepada satu (1) dokumen sahaja iaitu ringkasan invois dalam bentuk penyata jualan;

- (iv) membenarkan bayaran pendahuluan tuntutan khususnya penternak kecil dan sederhana;
- (v) melaksanakan permohonan secara atas talian melalui Google Forms di laman web www.unggasdvs.my;
- (vi) menggerakkan lebih ramai pegawai di peringkat negeri untuk menyegerakan proses permohonan;
- (vii) mengeluarkan Garis Panduan Permohonan Subsidi yang juga boleh diakses melalui laman web DVS iaitu www.dvs.gov.my bagi membolehkan penternak merujuk syarat-syarat permohonan; dan
- (viii) mengadakan libat urus bersama penternak ayam untuk menerangkan tatacara dan syarat permohonan supaya permohonan yang dikemukakan lengkap dan teratur. Sehingga 15 Julai 2022, sebanyak 11 sesi libat urus telah diadakan secara atas talian dengan penternak dan persatuan penternak di seluruh negara.

MAFI akan terus komited untuk mempermudah prosedur permohonan bagi mempercepatkan pembayaran subsidi kepada penternak ayam bagi merencanakan aktiviti pengeluaran ke arah meningkatkan jaminan bekalan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 20 JULAI 2022 (RABU)

SOALAN

DATIN PADUKA DR. TAN YEE KEW [WANGSA MAJU] minta **MENTERI
PENGAJIAN TINGGI** menyatakan sama ada Kementerian sedar bahawa
masih terdapat ramai pelajar di Institut Pengajian Tinggi (IPT) yang masih
tidak mempunyai komputer dan apakah rancangan untuk membantu
mereka.

JAWAPAN

Tan Sri Yang di-Pertua,

Kementerian Pengajian Tinggi (KPT) sentiasa cakna dan peka bahawa terdapat pelajar-pelajar di Institut Pengajian Tinggi (IPT) yang memerlukan peranti supaya proses pengajaran dan pembelajaran (PdP) secara dalam talian dapat dilaksanakan dengan lebih berkesan.

Dalam konteks ini, pelbagai bantuan kerajaan berkaitan peranti telah dan akan dihulurkan kepada pelajar yang memerlukan. Terkini, KPT amat menyambut baik inisiatif PerantiSiswa Keluarga Malaysia yang diterajui oleh Kementerian Komunikasi dan Multimedia Malaysia (K-KOMM) di bawah Bajet Belanjawan 2022, dengan kerjasama Kementerian Kewangan (MOF) dan Kementerian Pengajian Tinggi (KPT). Inisiatif ini bertujuan menyediakan peranti iaitu Tablet kepada mahasiswa IPT yang berada dalam kelompok B40 bagi memastikan proses pembelajaran mereka terpelihara melalui peruntukan sebanyak RM450 juta. Peranti-peranti tersebut masih dalam proses perolehan yang diuruskan oleh K-KOMM dan bilangan penerima manfaat adalah bergantung kepada terma-terma perolehan di bawah kendalian K-KOMM.

Kementerian sekali lagi mengucapkan setinggi-tinggi penghargaan buat K-KOMM dan MOF atas usaha dan keprihatinan yang ditunjukkan dalam membantu pelajar B40 IPT. Semoga usaha ini, sedikit sebanyak dapat membantu pelajar bagi memastikan kelangsungan proses PdP secara dalam talian berjalan lancar dan tidak terjejas.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN
DARIPADA : TUAN PRABAKARAN A/L M
PARAMESWARAN [BATU]
TARIKH : 20 JULAI 2022 (RABU)

SOALAN

TUAN PRABAKARAN A/L M PARAMESWARAN [BATU] minta
MENTERI PENGAJIAN TINGGI menyatakan bila Kerajaan akan
mansuhkan AUKU.

JAWAPAN

Tan Sri Yang di-Pertua,

Kementerian Pengajian Tinggi (KPT) sentiasa terbuka dalam memastikan AUKU kekal relevan dengan keperluan semasa. Justeru, pelbagai sesi libat urus dengan semua pemegang taruh dan pihak berkepentingan termasuk pelajar bagi menyesuaikan Akta ini telah dipergiatkan sejak dari tahun 2021. Antaranya adalah sesi libat urus bersama Majlis Perwakilan Pelajar Kebangsaan (MPPK), Majlis Presiden Persatuan Akademik (MPPA) dan Pengurusan Tertinggi universiti awam (UA) secara berkala.

Terkini, pada bulan Februari 2022, Kementerian telah mengadakan beberapa sesi libat urus bersama Timbalan Naib Canselor (Hal Ehwal Pelajar), Penasihat Undang-Undang universiti awam dan Bendahari universiti awam. Sesi libat urus juga telah diadakan bersama MPPK pada bulan Mac 2022 bagi mengenal pasti kaedah terbaik memperkasa pelajar terutamanya dalam hal pengurusan aktiviti pelajar dan pengurusan kewangan.

Susulan itu, gerak kerja dalam membangunkan mekanisme umum berbentuk garis panduan telah dilaksanakan oleh pihak pengurusan UA yang melibatkan pengurusan kewangan pelajar, pengurusan aktiviti pelajar dan penglibatan pelajar dalam aktiviti di dalam dan di luar kampus. Garis panduan ini sedang dalam fasa pemurnian di peringkat Kementerian.

KPT sentiasa terbuka dengan sebarang cadangan penambahbaikan AUKU dan akan mempergiat sesi libat urus dengan semua pemegang taruh berkaitan bagi memastikan penambahbaikan yang dilaksanakan adalah bersifat komprehensif dan merangkumi semua pihak berkepentingan.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA, PARLIMEN KEEMPAT
BELAS TAHUN 2022**

PERTANYAAN : LISAN

**DARIPADA : DATUK SERI PANGLIMA BUNG MOKTAR
BIN**

RADIN (KINABATANGAN)

TARIKH : 20 JULAI 2022 (RABU)

SOALAN

**DATUK SERI PANGLIMA BUNG MOKTAR BIN RADEN
(KINABATANGAN)** minta **MENTERI PERTANIAN DAN
INDUSTRI MAKANAN** menyatakan apakah pelan tindakan yang
sedang dan akan dilaksanakan oleh Kementerian dalam
menghadapi krisis makanan global. Sejauh manakah peperangan di
antara Ukraine dan Rusia memberikan kesan terhadap krisis
makanan di Malaysia.

JAWAPAN

Tuan Yang di-Pertua,

Untuk makluman Ahli Yang Berhormat, konflik geopolitik dunia
Rusia-Ukraine telah memberi kesan terhadap rantai bekalan
makanan dunia dan Malaysia tidak terkecuali dari menerima
tempiasnya.

Pada tahun 2021, 12% baja (bernilai RM660 juta) dan 1% minyak
dan lemak sayuran/haiwan (bernilai RM112 juta) diimport dari Rusia.
Selain itu, Malaysia mengimport 3.6% lemak dan minyak
sayuran/haiwan (bernilai RM399.1 juta), 0.9% bijirin termasuk gandum

dan jagung (bernilai RM78.8 juta) serta 0.9% makanan haiwan ternakan (bernilai 67.9 juta) dari Ukraine. Aktiviti pengeksporan bahan makanan dari Ukraine ke Malaysia masih dapat diteruskan menggunakan pelabuhan negara-negara lain di Eropah. Oleh itu, bekalan makanan import masih terjamin.

Namun, Malaysia masih mengambil pendekatan proaktif dalam memastikan sekuriti bekalan makanan negara terjamin. MAFI telah menetapkan pelbagai pelan tindakan intervensi yang komprehensif merangkumi jangka masa pendek, sederhana dan panjang. Antara tindakan intervensi segera di bawah pelan jangka masa pendek yang sedang dan telah dilaksanakan adalah:

- 1) Memudahkan proses pengimportan makanan termasuk memansuhkan *Approved Permit* (AP);
- 2) Mengenakan sekatan eksport bagi komoditi yang kekurangan bekalan domestik seperti sekatan eksport ayam pedaging yang sedang berkuatkuasa;
- 3) Mewujudkan stok penimbai;
- 4) Memperkasakan advokasi kehilangan lepas tuai;
- 5) Melaksanakan program perintis pertanian;
- 6) Mewujudkan insurans tanaman;
- 7) Menyemak semula tarif elektrik sektor agromakanan;
- 8) Memberikan pengecualian khas pengambilan pekerja asing bagi sektor pertanian; dan

Tambahan lagi, tindakan intervensi di bawah pelan jangka masa sederhana dan panjang termasuklah:

- 1) Memberi galakan insentif cukai bersasar;

- 2) Menggalakkan adaptasi pemodenan dan digitalisasi dalam pertanian;
- 3) Memperkasa industri input makanan ternakan domestik termasuk penanaman jagung bijirin;
- 4) Menambah loji sembelihan dan loji pemprosesan diiktiraf di luar negara untuk diimport ke Malaysia; dan
- 5) Menggalakkan pelaburan timbal balik (*reverse investment*).

Antara strategi jangka panjang yang telah dan akan dilaksanakan oleh Kementerian Pertanian dan Industri Makanan (MAFI) untuk menangani isu sekuriti makanan adalah digariskan dalam Dasar Agromakanan Negara 2021-2030 (DAN 2.0) dan Pelan Tindakan Dasar Sekuriti Makanan Negara 2021-2025 (DSMN 2021-2025). Kementerian yakin semua pelan tindakan intervensi seperti yang dinyatakan akan memberi impak yang berkesan dalam memastikan kelestarian pengeluaran makanan terjamin kepada Keluarga Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATUK SERI PANGLIMA BUNG MOKTAR
BIN RADIN [KINABATANGAN]
TARIKH : 20 JULAI 2022 (RABU)

SOALAN

DATUK SERI PANGLIMA BUNG MOKTAR BIN RADIN [KINABATANGAN] minta **MENTERI KEWANGAN** menyatakan apakah kedudukan rizab kewangan negara dan sejauh manakah kemampuan kewangan negara dalam memberikan lebih banyak bantuan dari pelbagai aspek yang bersesuaian kepada masyarakat yang kian terhimpit dengan masalah ekonomi setelah terkesan dengan pandemik COVID-19.

JAWAPAN

Tuan Yang di-Pertua,

Jumlah rizab antarabangsa BNM adalah sebanyak USD109.0 bilion pada 30 Jun 2022, bersamaan dengan RM480.1 bilion. Paras rizab ini memadai untuk membiayai 5.8 bulan import barangan dan perkhidmatan, dan 1.1 kali jumlah hutang luar negeri jangka pendek. Berdasarkan penanda aras yang diterima pada peringkat antarabangsa, paras rizab antarabangsa BNM ini adalah mencukupi untuk mengurangkan kesan aliran keluar modal yang mendadak serta mengekalkan keadaan pasaran kewangan yang teratur.

Tuan Yang di-Pertua,

Hasil Kerajaan yang diunjurkan pada tahun 2022 adalah sebanyak RM234 bilion manakala jumlah perbelanjaan adalah sebanyak RM332.1 bilion. Daripada jumlah perbelanjaan tersebut, sebanyak RM23 bilion telah diperuntukkan di bawah Kumpulan Wang COVID-19 bagi membiayai pakej rangsangan serta langkah menangani pandemik. Secara keseluruhan, Kerajaan telah memperkenalkan lapan pakej bantuan dan rangsangan ekonomi berjumlah RM530 bilion dengan suntikan fiskal hampir RM90 bilion bagi meringankan beban rakyat dan perniagaan.

Usaha dan inisiatif Kerajaan telah menunjukkan kesan positif dan berjaya mengawal kadar penularan COVID-19, seterusnya membolehkan pembukaan semula aktiviti ekonomi dan sempadan negara. Walau bagaimanapun, senario ekonomi semasa berikutan ketegangan geopolitik, tekanan inflasi dan gangguan rantai makanan telah memberi impak tambahan kepada ekonomi dan rakyat. Bagi melindungi rakyat daripada beban kenaikan kos sara hidup, Kerajaan menjangkakan perbelanjaan subsidi dan bantuan sosial akan meningkat kepada sekitar RM77.7 bilion pada tahun 2022 berbanding unjuran asal sebanyak RM31 bilion. Peningkatan perbelanjaan ini dijangka tidak dapat ditampung sepenuhnya melalui peningkatan hasil terutamanya hasil berkaitan komoditi dan hasil tambahan lain. Dengan itu, Kerajaan juga akan

melaksanakan langkah penjimatan untuk membiayai sebahagian daripada peningkatan keperluan bantuan dan subsidi.

Perlu juga ditekankan bahawa Kerajaan mempunyai ruang yang terhad untuk menanggung peningkatan pinjaman bagi menampung lebih banyak bantuan. Semasa krisis COVID-19, Kerajaan telah meningkatkan had statutori hutang daripada 55% kepada 65% daripada KDNK, iaitu tahap tertinggi dalam sejarah. Kadar hutang kepada KDNK di Malaysia sudah mencapai tahap 63 peratus.

Kebolehan meningkatkan hutang negara juga perlu mengambil kira kemampuan keberhutangan (*debt affordability*) dan kemampunan hutang (*debt sustainability*). Sebelum krisis COVID-19, Kementerian Kewangan mempunyai had pentadbiran menguruskan kewangan negara supaya Nisbah Bayaran Khidmat Hutang (*Debt Service Ratio - DSR*) kepada Hasil bagi Malaysia tidak melebihi 15 peratus. Nisbah tersebut telahpun mencapai paras 16.3 peratus pada 2021 dan berdasarkan Bajet 2022 dijangka melebihi 18 peratus. Ini bermakna bagi setiap RM1 hasil Kerajaan, hampir 20 sen digunakan hanya untuk pembayaran faedah hutang dan tidak mengambil kira pun keupayaan untuk membayar balik jumlah pokok pinjaman Kerajaan. Dengan itu, keupayaan negara untuk menambah tahap keberhutangan adalah terhad berbanding dengan negara lain dengan nisbah DSR jauh lebih rendah seperti negara maju UK 6.6%, AS 5.2% dan Jepun 4.0%, dan serta negara jiran seperti Filipina 9.7%, Thailand 6.2% dan Singapura 0.1%.

Kerajaan juga akan melaksanakan inisiatif pembaharuan fiskal seperti pengenalan Akta Tanggungjawab Fiskal (FRA), Strategi Hasil Jangka Sederhana (MTRS) dan semakan semula perbelanjaan awam termasuk menambah baik program subsidi bersasar bagi memastikan kecekapan dan keberkesanan perbelanjaan Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN PANG HOK LIONG [LABIS]
TARIKH : 20 JULAI 2022 (RABU)

SOALAN

TUAN PANG HOK LIONG [LABIS] minta **MENTERI KEWANGAN** menyatakan jaminan yang dapat diberikan supaya subsidi untuk minyak masak berbotol, petrol RON95, tong gas dan barangan keperluan harian dapur tidak akan ditarik balik atau hapuskan.

JAWAPAN

Tuan Yang di-Pertua,

Kadar inflasi di Malaysia masih terkawal pada 2.2 peratus untuk suku pertama tahun 2022 dan baru-baru ini mencatat 2.8 peratus untuk bulan Mei 2022. Manakala pada bulan yang sama, kadar inflasi di negara maju seperti Amerika Syarikat dan United Kingdom mencecah 9 peratus, manakala Thailand adalah 7 peratus dan Singapura dan Filipina melebihi 5 peratus. Kadar inflasi Malaysia yang boleh dianggap sederhana ini adalah berikutan langkah Kerajaan untuk melaksanakan kawalan harga ke atas barangan dan perkhidmatan terpilih asas khususnya melalui pemberian subsidi terutamanya petrol RON95, diesel, LPG, minyak masak serta makanan asas seperti ayam, telur dan tepung gandum.

Kerajaan komited untuk membantu rakyat menghadapi cabaran kos sara hidup dan mengambil langkah untuk mengelakkan kenaikan harga barangan asas secara mendadak. Komitmen ini jelas ditunjukkan melalui langkah meneruskan dan menambahbaik bantuan dan subsidi, diunjurkan perbelanjaan bantuan dan subsidi akan mencecah RM77.7 bilion berbanding dengan peruntukan yang diluluskan sebanyak RM31 bilion dalam Bajet 2022.

Namun demikian, jaminan supaya segala subsidi tidak akan dihentikan tidak boleh dibuat kerana jika harga pasaran menurun secara mendadak, keperluan untuk menyediakan subsidi tidak berbangkit.

Di samping itu, pendekatan subsidi semasa yang melibatkan harga bersubsidi diberi secara pukal kepada semua penduduk di Malaysia tidak dapat ditampung selamanya, atau dalam kata lain, unsustainable kerana melibatkan ketirisan yang signifikan. Dengan itu, Kerajaan sedang menyemak dan menilai semula keberkesanan dan mekanisme program subsidi.

Pada masa ini, harga petrol RON95, diesel, LPG dan minyak masak yang dibayar oleh semua di peringkat runcit untuk petrol RON95, diesel, LPG dan minyak masak adalah kurang daripada setengah harga sebenar

pasaran tanpa subsidi. Sebagai contoh, Kerajaan telah mengekalkan harga pam RON95 pada adalah RM2.05 seliter. Tanpa subsidi, sementara harga pasaran tanpa subsidi telah pun mencapai RM4.70 seliter pada bulan Jun 2022.

Semua ahli Keluarga Malaysia, tidak kira golongan masyarakat B40, M40 dan T20 menikmati subsidi petrol tersebut. Adalah dianggarkan bahawa golongan T20 merupakan antara penerima manfaat yang terbesar bagi subsidi RON95 dan dijangka memanfaatkan subsidi bernilai RM8 bilion tahun ini.

Jumlah ini adalah hampir sama dengan peruntukan bantuan tunai RM8 bilion melalui Bantuan Keluarga Malaysia (BKM). Sebagai perbandingan, jumlah RM8 bilion boleh digunakan untuk membina 16 buah hospital dengan kapasiti 300 katil bagi setiap hospital, atau 160 buah sekolah dengan 30 bilik darjah bagi setiap sekolah. Sekiranya pemberian subsidi RON95 kepada golongan T20 berjumlah RM8 bilion tersebut diijamatkan, ianya dapat disalurkan kepada golongan berpendapatan rendah dalam bentuk bantuan atau digunakan untuk membiayai pembangunan negara.

Kerajaan juga sedang mengkaji mekanisme pemberian subsidi petrol, diesel, LPG supaya dapat dilaksanakan dengan lebih bersasar dan menumpukan bantuan dan subsidi kepada golongan yang benar-benar memerlukan bantuan. Pelaksanaan subsidi secara bersasar dijangka dapat mengoptimumkan sumber kewangan Kerajaan dan penjimatan yang dicapai dapat diagihkan semula untuk program yang lebih berkesan menyumbang kepada kesejahteraan rakyat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATUK SERI PANGLIMA HAJAH AZIZAH
BINTI DATUK SERI PANGLIMA HAJI
MOHD DUN [BEAUFORT]
TARIKH : 20 JULAI 2022 (RABU)

SOALAN

DATUK SERI PANGLIMA HAJAH AZIZAH BINTI DATUK SERI PANGLIMA HAJI MOHD DUN [BEAUFORT] minta **MENTERI KEWANGAN** menyatakan perkembangan terkini kajian semula oleh Kerajaan berhubung dengan isu pemberian khas peruntukan 40% kepada negeri Sabah di bawah Perlembagaan Persekutuan Perkara 112D.

JAWAPAN

Untuk makluman Ahli Yang Berhormat dan Dewan Yang Mulia ini,

Perkara yang dibangkitkan oleh Yang Berhormat telah difailkan ke mahkamah oleh 12 orang wakil rakyat dan Persatuan Undang-Undang Sabah (*Sabah Law Society*) terhadap Kerajaan Persekutuan dan Kerajaan Negeri Sabah.

Oleh yang demikian, tiada apa-apa ulasan atau jawapan boleh diberikan atas dasar *sub judice*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATO' MOHD NIZAR BIN HAJI ZAKARIA
[PARIT]
TARIKH : 20 JULAI 2022 (RABU)

SOALAN

DATO' MOHD NIZAR BIN HAJI ZAKARIA [PARIT] minta **MENTERI KEWANGAN** menyatakan implikasi dalam isu pemberian subsidi sama ada perlu diteruskan atau sebaliknya yang dilihat boleh memberi impak kepada dasar dan perancangan pembangunan negara secara jangka panjang.

JAWAPAN

Tuan Yang di-Pertua,

Perbelanjaan mengurus Kerajaan Persekutuan dijangka meningkat dengan ketara berbanding anggaran asal tahun disebabkan oleh peningkatan mendadak perbelanjaan bantuan dan subsidi yang dianggarkan mencecah **RM77.7 bilion** berbanding **RM31 bilion** yang disediakan bagi tahun 2022. Subsidi petrol, diesel dan *Liquefied Petroleum Gas* (LPG) adalah komponen tertinggi subsidi dan telah diunjurkan **RM37.3 bilion** untuk tahun 2022 (2021: **RM11 bilion**, 2020: **RM1.6 bilion**) disebabkan kenaikan harga minyak mentah dunia semasa kepada sekitar USD120 setong.

Berdasarkan laporan daripada Bank Negara Malaysia, inflasi keseluruhan menjadi sederhana kepada 2.2% pada suku tahun pertama tahun 2022. Hal ini berikutan rakyat dilindungi dari kenaikan harga global bahan api ekoran daripada pemberian subsidi oleh Kerajaan. Kerajaan akan terus melaksanakan pemberian bantuan dan subsidi bagi

melindungi rakyat daripada impak penuh kenaikan harga global komoditi dan makanan dunia.

Namun demikian, pendekatan semasa memberi subsidi secara pukal kepada semua penduduk di Malaysia mengakibatkan ketirisan yang tinggi. Kerajaan kini mengekalkan harga pam RON95 pada adalah RM2.05 seliter untuk semua di Malaysia, tanpa mengira dari golongan B40 atau T20, tanpa mengira warganegara atau tidak. Tanpa subsidi, harga tanpa subsidi telahpun mencapai RM4.70 seliter pada bulan Jun 2022.

Adalah dianggarkan bahawa golongan T20 merupakan antara penerima manfaat yang terbesar bagi subsidi RON95 dijangka akan memanfaatkan subsidi bernilai RM8 bilion tahun ini. Tanpa ketirisan subsidi tersebut kepada golongan T20, jumlah RM8 bilion boleh digunakan untuk membina 16 buah hospital dengan kapasiti 300 katil bagi setiap hospital, atau 160 buah sekolah dengan 30 bilik darjah bagi setiap sekolah.

Dengan itu, selagi ketirisan dalam pemberian subsidi tidak ditangani, agenda pembangunan negara akan terhad dari segi potensi untuk mengurangkan jurang pembangunan di antara wilayah dan komuniti. Kerajaan akan melaksanakan langkah perbelanjaan berhemah supaya kedudukan kewangan negara kekal terkawal. Kerajaan akan menyemak dan menilai semula keberkesanan program bantuan dan subsidi yang dilaksanakan bagi memastikan peruntukan yang optimum disediakan untuk membolehkan penjimatan yang diperoleh disalurkan kepada program-program yang mengutamakan kesejahteraan rakyat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

DARIPADA : PUAN TEO NIE CHING (KULAI)

TARIKH : 20 JULAI 2022 (RABU)

SOALAN

PUAN TEO NIE CHING (KULAI) minta **MENTERI PEMBANGUNAN WANITA, KELUARGA DAN MASYARAKAT** menyatakan jumlah Pusat Sokongan Sosial Setempat dan Rumah Perlindungan Khas Wanita yang telah ditambah di bawah Belanjawan 2022.

JAWAPAN

Tuan Yang di-Pertua,

Kementerian Pembangunan Wanita, Keluarga dan Masyarakat menerusi Ucapan Bajet 2021 telah dipertanggungjawabkan untuk menubuhkan Pusat Sokongan Sosial Setempat atau dengan kata ringkasnya PSSS.

PSSS ditubuhkan bertujuan untuk :

- (i) menangani isu-isu psikososial yang semakin menular dalam kalangan masyarakat;
- (ii) memberikan perkhidmatan psikososial yang holistik serta menyalurkan bantuan kepada kumpulan sasar Kementerian;
- (iii) menerima aduan dan pertanyaan, memperoleh maklumat dan nasihat, mendapatkan perkhidmatan segera seperti

kaunseling serta transit sementara yang berbentuk *immediate relief* (dengan izin) kepada kumpulan sasaran yang memerlukan; dan

- (iv) menjadi pemangkin kepada usaha *whole of government* serta *whole of society* dalam membendung masalah sosial.

Menerusi Belanjawan 2022, inisiatif ini diteruskan lagi bagi memperluaskan perkhidmatan PSSS di seluruh negara daripada **4 buah kepada 9 buah PSSS.**

PSSS memberikan perkhidmatan kepada masyarakat di seluruh negara ini dan pada masa yang sama turut menyantuni rakyat yang memerlukan melalui program Jelajah Aspirasi Keluarga Malaysia (AKM), Program Advokasi, Program Psikososial kepada mangsa bencana banjir di Pusat Pemindahan Sementara (PPS) serta program-program lain bersama komuniti setempat.

Pengoperasian PSSS ini turut melibatkan penyertaan Sukarelawan Kaunselor Berdaftar yang bertauliah di bawah Lembaga Kaunselor Malaysia, Skwad Waja di bawah Jabatan Pembangunan Wanita dan usahasama melalui Pertubuhan Bukan Kerajaan (NGO) sebagai rakan strategik.

Sejak beroperasi pada Oktober 2021 sehingga 3 Julai 2022, **kumpulan sasaran yang telah mendapatkan maklumat dan perkhidmatan secara terus di PSSS** adalah berjumlah **553,684** orang.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : DATO' SERI UTAMA HAJI MUKHRIZ BIN
TUN DR. MAHATHIR [JERLUN]**

TARIKH : 20 JULAI 2022 (RABU)

SOALAN

DATO' SERI UTAMA HAJI MUKHRIZ BIN TUN DR. MAHATHIR [JERLUN] minta **MENTERI PERTANIAN DAN INDUSTRI MAKANAN** menyatakan bilakah akan ditubuhkan Lembaga Pembangunan Unggas Nasional bagi menyelia di antara Kementerian-Kementerian yang bertanggungjawab ke atas penternakan ayam, pembekalan makanan ayam dan penjualan kepada pengguna bagi kepentingan semua pihak.

JAWAPAN

Tuan Yang di-Pertua,

Untuk makluman Ahli Yang Berhormat, industri ayam merupakan industri yang telah matang dengan kadar tahap sara diri (SSL) pada 104.5% untuk daging ayam/itik dan 116.6% untuk telur ayam/itik. Cadangan untuk menubuhkan Lembaga Industri Ayam Negara bagi menyelia ke atas penternakan ayam, pembekalan makanan ayam dan penjualan kepada pengguna bagi kepentingan semua pihak perlu mengambil kira:-

- (a) penelitian model yang bersesuaian agar berdaya tahan dan mampu mengatasi isu-isu yang dihadapi oleh industri ayam;
- (b) melaksanakan libat urus dengan Kementerian dan Jabatan berkaitan supaya dapat berfungsi secara holistik di samping mengelakkan pertindihan fungsi dan penggunaan sumber yang optimum; dan
- (c) memperhalusi penglibatan pihak swasta agar peranannya dapat terus dipertingkatkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : PUAN ISNARAISAH MUNIRAH BT
MAJILIS @ FAKHARUDY [KOTA BELUD]
TARIKH : 20 JULAI 2022 (RABU)

SOALAN

**PUAN ISNARAISAH MUNIRAH BT MAJILIS @ FAKHARUDY
[KOTA BELUD]** minta **MENTERI KEWANGAN** menyatakan :-

- (a)intipati persetujuan secara bersama di antara Kerajaan Persekutuan dan Kerajaan Sabah berkenaikan kenaikan kadar geran khas; dan
- (b)kaedah dan formula yang digunapakai serta bilakah ianya akan berkuatkuasa.

JAWAPAN

Untuk makluman Ahli Yang Berhormat dan Dewan Yang Mulia ini,

Perkara yang dibangkitkan oleh Yang Berhormat telah difailkan ke mahkamah oleh 12 orang wakil rakyat dan Persatuan Undang-Undang Sabah (*Sabah Law Society*) terhadap Kerajaan Persekutuan dan Kerajaan Negeri Sabah.

Oleh yang demikian, tiada apa-apa ulasan atau jawapan boleh diberikan atas dasar *sub judice*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATUK MOHD AZIS BIN JAMMAN
[SEPANGGAR]
TARIKH : 20 JULAI 2022 (RABU)

SOALAN

DATUK MOHD AZIS BIN JAMMAN [SEPANGGAR] minta **MENTERI KEWANGAN** menyatakan memandangkan Warta P.U.(A) 328/1970 dilaksanakan ketika negara di dalam keadaan darurat, adakah warta ini masih terpakai sehingga hari ini.

JAWAPAN

Untuk makluman Ahli Yang Berhormat dan Dewan Yang Mulia ini,

Perkara yang dibangkitkan oleh Yang Berhormat telah difailkan ke mahkamah oleh 12 orang wakil rakyat dan Persatuan Undang-Undang Sabah (*Sabah Law Society*) terhadap Kerajaan Persekutuan dan Kerajaan Negeri Sabah.

Oleh yang demikian, tiada apa-apa ulasan atau jawapan boleh diberikan atas dasar *sub judice*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : PUAN HANNAH YEOH TSEOW SUAN
[SEGAMBUT]
TARIKH : 20 JULAI 2022 (RABU)

SOALAN

PUAN HANNAH YEOH TSEOW SUAN [SEGAMBUT] minta **MENTERI KEWANGAN** menyatakan apakah asas Kerajaan mempertimbangkan semula Cukai Barang dan perkhidmatan (GST) dan jangka masa yang terlibat untuk melaksanakannya ketika rakyat berdepan dengan kenaikan harga barang keperluan harian dan baru pulih dari fasa pandemik COVID-19.

JAWAPAN

Tuan Yang di-Pertua,

Seperti Ahli Yang Berhormat sedia maklum, pandemik Covid-19 telah memberikan kesan kepada kita semua, baik di peringkat rakyat mahupun di peringkat negara. Dalam usaha mengekang wabak Covid-19 daripada terus merebak sehingga boleh mengatasi keupayaan sistem kesihatan awam negara untuk menanganinya, Kerajaan telah melaksanakan beberapa siri Perintah Kawalan Pergerakan (PKP) yang memaksa sebahagian besar aktiviti ekonomi terhenti dan seterusnya memberi kesan langsung bukan sahaja kepada perniagaan dan perusahaan, malahan kepada kelangsungan hidup sebahagian besar rakyat Malaysia. Bagi memastikan beban yang ditanggung oleh pelbagai lapisan masyarakat dalam menghadapi fasa pandemik tersebut dapat dikurangkan, pelbagai bantuan dalam bentuk tunai dan subsidi menyeluruh telah dan masih terus diberikan oleh Kerajaan.

Belum lagi kita pulih sepenuhnya daripada kesan pandemik, ekonomi negara terus diasak dengan pelbagai cabaran dari dalam dan luar negara. Konflik Russia – Ukraine, peningkatan harga komoditi utama dunia serta gangguan rantai bekalan global telah memberi kesan kepada rantai ekonomi domestik dan seterusnya telah memberi impak langsung kepada pendapatan perniagaan dan individu secara amnya dan mengurangkan hasil Kerajaan yang dikutip dalam bentuk cukai pendapatan. Dalam masa yang sama, beberapa hasil cukai dalam bentuk cukai tak langsung juga telah dilepaskan bagi membantu industri yang terkesan teruk akibat pandemik untuk terus berdaya tahan, contohnya melalui pengecualian cukai yang diberikan ke atas cukai jualan bagi kenderaan dan pengecualian cukai pelancongan. Oleh itu, Kerajaan berada dalam keadaan mencabar iaitu pendapatan Kerajaan semakin menyusut manakala perbelanjaan semakin bertambah dalam usaha membantu rakyat menghadapi cabaran ekonomi semasa.

Oleh itu, Kerajaan perlu mengkaji alternatif bagi menjana hasil yang lebih stabil berbanding cukai pendapatan, dan salah satu pilihan adalah dengan melaksanakan cukai kepenggunaan (*consumption tax*) yang lebih

berkesan berbanding cukai jualan dan cukai perkhidmatan (SST) yang diamalkan pada masa ini. Sebagai contoh, cukai kepenggunaan berasaskan nilai ditambah iaitu *Value Added Tax* (VAT) atau yang lebih kita kenali sebagai Cukai Barang dan Perkhidmatan (GST).

Sepertimana yang telah acapkali saya katakan sebelum ini, pelaksanaan sistem VAT atau GST buat masa ini masih dalam peringkat kajian. Sebagai Kerajaan yang prihatin dan pragmatik, kita memahami bahawa pengenalan sebarang bentuk cukai baharu dalam keadaan ekonomi yang sedang dalam fasa pemulihan bukan sahaja akan membebankan rakyat, malah berisiko untuk merencatkan momentum pemulihan ekonomi yang sedang berlangsung. Untuk itu, pelaksanaan sebarang bentuk cukai penggunaan bukan sahaja perlu mengambil kira senario semasa, malahan perlu juga memberi ruang bagi persiapan dan persediaan yang rapi di kedua-dua pihak Kerajaan dan pembayar cukai. Oleh yang demikian, setakat ini Kerajaan tidak bercadang untuk memperkenalkan sebarang cukai kepenggunaan baharu bagi menggantikan SST pada tahun ini dan sebelum pemulihan ekonomi berada di landasan yang kukuh.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : PUAN JUNE LEOW HSIAD HUI
(HULU SELANGOR)**

TARIKH : 20 JULAI 2022 (RABU)

SOALAN

PUAN JUNE LEOW HSIAD (HULU SELANGOR) minta **MENTERI PERTANIAN DAN INDUSTRI MAKANAN** menyatakan apakah usaha Kerajaan untuk menurunkan kadar inflasi makanan negara serta usaha untuk memastikan isu keselamatan makanan terjamin di masa hadapan.

JAWAPAN

Tuan Yang di-Pertua,

Untuk makluman Ahli Yang Berhormat, antara faktor yang memberi tekanan kepada inflasi makanan adalah kenaikan harga makanan ternakan dan baja serta pembukaan semula sektor ekonomi pasca COVID-19. Kerajaan serius dalam menangani kenaikan inflasi. Antara inisiatif yang dilaksanakan kerajaan bagi membendung isu kenaikan harga barangan adalah seperti berikut:

1. Pelaksanaan Skim Kawalan Harga Keluarga Malaysia (SKHKM) dan Musim Perayaan telah menetapkan harga siling runcit bagi beberapa barangan utama yang menjadi keperluan rakyat;
2. Pemberian subsidi terhadap tiga komponen utama iaitu bahan api, minyak masak serta elektrik, air, ayam dan telur telah membantu mengekang kenaikan inflasi yang lebih tinggi;
3. Penetapan harga Petrol Ron 95 RM2.05 seliter dan Diesel RM2.15 seliter sejak Mac 2021;
4. Pelaksanaan Jualan Keluarga Malaysia melibatkan 222 program yang meliputi lebih 1,274 lokasi di Semenanjung, Sabah, Sarawak dan Labuan bagi membantu rakyat mendapatkan bekalan keperluan harian pada harga lebih murah daripada pasaran; dan
5. Memberi bantuan tunai tambahan sebanyak RM100 kepada isi rumah kategori B40 dan RM50 kepada golongan bujang.

Kerajaan juga telah menubuhkan Jawatankuasa Teknikal Menangani Isu Sekuriti Bekalan Makanan Negara bagi memantau status bekalan komoditi utama makanan negara serta mengenal pasti isu dan mencari jalan penyelesaian jangka pendek, sederhana dan panjang terhadap isu sekuriti makanan negara. Antara langkah proaktif jangka pendek yang dilaksanakan termasuk:

1. Membatalkan kelulusan kuota import (AP) barangan makanan dari luar negara termasuk bagi ayam bulat dan keratan ayam selain menyekat pengeksportan ayam ke luar negara bagi tempoh sementara;
2. pelaksanaan stokpail ayam dan stok penimbal tambahan untuk produk ikan;
3. mempermudah proses pembayaran tuntutan subsidi harga ayam;
4. mudah cara prosedur import (IP) melalui penangguhan fi permit dan *priority lane* ke atas empat (4) komoditi merangkumi soya, gandum, jagung dan makanan ternakan berasaskan haiwan dan tumbuhan;
5. memberikan pengecualian khas bagi pengambilan pekerja asing dalam industri penternakan ayam;
6. mengkaji mekanisme mengurangkan kos minyak sawit mentah (*crude palm oil*) kepada syarikat-syarikat pengilangan makanan ternakan (*feedmill operators*) yang dikenali pasti bagi mengurangkan kos makanan ternakan;
7. penambahan abattoir dan loji pemprosesan luar negara bagi meningkatkan dan mempelbagaikan sumber import bekalan ayam dan daging.

Kerajaan turut bersetuju dengan pelaksanaan Dana Pembiayaan Agromakanan Keluarga Malaysia (DPAKM) di bawah Agrobank yang melibatkan peruntukan sebanyak RM800 juta bagi menjamin kesinambungan aktiviti pengeluaran makanan. Program DPAKM ini menawarkan kemudahan pembiayaan yang khusus sebanyak RM300 juta bagi ternakan ayam. Had maksimum pembiayaan ditetapkan sehingga RM5 juta dengan tempoh pembiayaan sehingga 8.5 tahun termasuk 6 bulan moratorium ditawarkan kepada semua golongan sasar.

Untuk makluman Ahli Yang Berhormat jua, Kerajaan telah memperuntukkan subsidi sebanyak RM369.5 juta bagi melanjutkan tempoh pemberian subsidi bermula 1 Julai 2022 hingga 31 Ogos 2022.

Manakala jumlah subsidi yang diperuntukkan bagi tempoh 5 Februari 2022 hingga 30 Jun 2022 adalah sebanyak RM730 juta. Ini menjadikan jumlah subsidi yang diluluskan sejak 5 Februari 2022 adalah sebanyak RM1.1 bilion. Setakat 15 Julai 2022, sebanyak 7,680 permohonan subsidi telah diluluskan berjumlah RM632.6 juta.

Kerajaan melaksanakan langkah intervensi melalui pemberian subsidi kepada penternak ini bagi meringankan beban penternak yang berhadapan dengan kenaikan kos pengeluaran ayam. Langkah intervensi ini diharap dapat menstabilkan kembali bekalan sekaligus memastikan Keluarga Malaysia dapat membeli ayam dan telur dengan harga yang berpatutan dan tidak terbeban dengan cabaran kos sara hidup.

Strategi-strategi yang digariskan oleh Kerajaan diharap dapat membantu mengurangkan tekanan terhadap harga makanan, sekaligus menyumbang kepada penurunan inflasi kelak. Pada masa yang sama, bagi memastikan isu sekuriti makanan negara sentiasa diberi perhatian, Kementerian turut memastikan isu-isu tersebut dibincang dan dibawa kepada pertimbangan Jemaah Menteri menerusi platform seperti Mesyuarat Jawatankuasa Kabinet Mengenai Dasar Sekuriti Makanan Negara (FSCC), Mesyuarat Jawatankuasa Teknikal Menangani Isu Sekuriti Bekalan Makanan Negara dan Mesyuarat Jawatankuasa Pasukan Jihad Tangani Inflasi. Kerajaan akan terus memainkan peranan efektif dengan kerjasama semua pihak bagi menjamin kemampuan memperoleh bekalan makanan yang mencukupi dan selamat pada harga berpatutan secara berterusan oleh Keluarga Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : DATIN PADUKA DR. TAN YEE KEW
[WANGSA MAJU]
TARIKH : 20 JULAI 2022 (RABU)

SOALAN

DATIN PADUKA DR. TAN YEE KEW [WANGSA MAJU] minta **MENTERI KEWANGAN** menyatakan status pelaksanaan program pemulihan ekonomi dan sejauh mana program-program tersebut berjaya mencapai sasaran mereka.

JAWAPAN

Tuan Yang di-Pertua,

Program Pemulihan Negara daripada kesan pandemik COVID-19 dipandu berdasarkan Pelan Pemulihan Negara (PPN) yang telah dilancarkan Kerajaan pada 26 Julai 2021. PPN mengandungi 4 strategi utama bagi membawa negara keluar dari kemelut pandemik COVID-19 secara berfasa dan selamat seperti berikut:

- i. Pelonggaran sekatan secara berfasa dan evident-based;
- ii. Mengukuhkan tindakbalas kesihatan awam ke atas pandemik;
- iii. Mengimunitisasikan rakyat; dan
- iv. Menyokong rakyat dan perniagaan melalui Pakej Perlindungan Rakyat dan Pemulihan Ekonomi (PEMULIH).

Sehingga kini, pencapaian pemulihan negara berdasarkan strategi-startegi PPN adalah seperti berikut:

(a) PEMBUKAAN SEMULA NEGARA

- i. Susulan keberkesanan tindakan pencegahan dan kawalan kesihatan awam termasuk program vaksinasi COVID-19 dalam menguruskan penularan jangkitan COVID-19 dalam negara, bermula 1 April 2022, negara telah memasuki fasa Peralihan ke Endemik di mana tiada lagi sekatan besar-besaran ke atas aktiviti kehidupan dan ekonomi rakyat serta sempadan negara dibuka semula;
- ii. Kesianambungan itu, KKM telah meneliti dan melakukan semakan semula ke atas langkah-langkah kawalan dan pencegahan COVID-19 yang boleh dilaksanakan semasa dalam Fasa Peralihan ke Endemik ini; dan
- iii. Tumpuan kini adalah supaya rakyat terus memahami risiko penularan COVID-19, mengamalkan langkah-langkah kesihatan awam dan sentiasa berhati-hati dalam melaksanakan aktiviti harian untuk kekal selamat.

(b) PROGRAM IMUNISASI COVID-19 KEBANGSAAN (PICK)

- i. Setakat 11 Julai 2022, sebanyak 83.7% keseluruhan populasi negara telah diberikan vaksinasi lengkap (dua dos), manakala sebanyak 49.5% telah menerima dos penggalak; dan
- ii. Usaha untuk meningkatkan pengambilan dos penggalak sedang giat dilaksanakan bagi memastikan kadar perlindungan yang tinggi di kalangan rakyat dan memastikan penularan kekal minima.

(c) INDIKATOR KEUPAYAAN TINDAKBALAS KESIHATAN AWAM

- i. Indikator-indikator kesihatan awam terus menunjukkan tren penambahbaikan prestasi berbanding awal tahun 2022. Ini menunjukkan sistem kesihatan awam tidak lagi terbeban dan berupaya menangani keperluan situasi semasa; dan
- ii. Setakat 11 Julai 2022, kadar penggunaan penggunaan ventilators adalah pada tahap 42%; penggunaan katil ICUs (61.5%); penggunaan katil hospital (60.6%); dan PKRC (20.6%)

(d) PRESTASI PAKEJ PEMULIH

- i. Setakat 31 Mei 2022, sebanyak RM115.5 bilion daripada RM139.1 bilion di bawah PEMULIH telah dibelanjakan yang memanfaatkan seramai 8.8 juta rakyat dan 166.5 ribu peniagaan; dan
- ii. Sebanyak 43 inisiatif telah diumumkan dan pada waktu ini, sebanyak 16 inisiatif masih dalam pelaksanaan dan dijangka berakhir pada Disember 2022 manakala sebanyak 27 inisiatif telah pun selesai.

Secara keseluruhannya, PPN telah mencapai hasil yang diharapkan berdasarkan strategi dan inisiatif yang dilaksanakan. Kini, Kerajaan sedang dalam tindakan merangka Pelan Pemulihan Negara 2.0 yang akan memberikan tumpuan kepada strategi pemulihan ekonomi Negara pasca pandemik.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2021**

PERTANYAAN : LISAN

DARIPADA : TUAN SIM TZE TZIN (BAYAN BARU)

TARIKH : 20 JULAI 2022 (RABU)

SOALAN

TUAN SIM TZE TZIN (BAYAN BARU) minta **MENTERI PERTANIAN DAN INDUSTRI MAKANAN** menyatakan rancangan Kementerian untuk menangani food security dari segi import makanan ruji seperti tepung gandum, gula dan sebagainya akibat kekurangan pengeluaran dunia dan kenaikan harga mendadak.

JAWAPAN

Tuan Yang di-Pertua,

Untuk makluman Ahli Yang Berhormat, matlamat utama Pelan Tindakan Dasar Sekuriti Makanan Negara (Pelan Tindakan DSMN) 2021-2025 adalah memastikan kelangsungan bekalan makanan yang cukup, selamat, bernutrisi dan mampu beli secara berterusan kepada rakyat. Dalam hal ini, usaha-usaha untuk meningkatkan hasil pertanian akan dipergiatkan bagi memperbanyak pengeluaran makanan secara domestik dan mengurangkan kebergantungan kepada import makanan.

Secara khususnya, Kementerian Pertanian dan Industri Makanan (MAFI) sentiasa menjaga kepentingan dan kesejahteraan para pesawah dalam sektor padi dan beras negara memandangkan komoditi beras merupakan makanan ruji rakyat Malaysia. Kerajaan juga telah meningkatkan stokpail beras daripada 150,000 tan metrik kepada 290,000 tan secara berperingkat menjelang tahun 2022.

Usaha untuk merancakkan pengeluaran dan peningkatan produktiviti beras negara telah dipergiat menerusi pelaksanaan Program Smart Sawah Berskala Besar (Smart SBB). Program ini merupakan inisiatif kerjasama awam-swasta yang membolehkan pesawah menikmati peningkatan hasil padi per tan metrik setahun sekaligus meningkatkan nilai pendapatan tahunan mereka.

Usaha-usaha ini adalah bagi mengurangkan import beras sebagaimana yang digariskan di bawah Pelan Tindakan DSMN 2021-2025.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN AHMAD FAHMI BIN MOHAMED
FADZIL [LEMBAH PANTAI]
TARIKH : 20 JULAI 2022 (RABU)

SOALAN

TUAN AHMAD FAHMI BIN MOHAMED FADZIL [LEMBAH PANTAI] minta **MENTERI KEWANGAN** menyatakan dasar dan implikasi kewangan Kerajaan berhubung subsidi makanan, garis masa rasionalisasi subsidi serta apakah mekanisme bagi pemberian subsidi bersasar yang akan dilaksanakan kelak.

JAWAPAN

Tuan Yang di-Pertua,

Kerajaan peka kepada kenaikan harga komoditi dan kadar inflasi ekoran gangguan kepada rantai bekalan global dan konflik Ukraine-Rusia, yang telah mengakibatkan impak kenaikan harga barangan asas kepada kebanyakan negara di seluruh dunia, termasuk Malaysia. Dengan itu, Kerajaan telah mengambil langkah untuk melindungi rakyat daripada kesan penuh kenaikan harga komoditi dan makanan global melalui langkah kawalan harga serta subsidi barangan kepenggunaan.

Kerajaan mengunjurkan perbelanjaan bantuan dan subsidi akan mencecah RM77.7 bilion berbanding peruntukan yang diluluskan dalam Bajet 2022 sebanyak RM31 bilion. Peningkatan bantuan dan subsidi yang mendadak diakibatkan terutamanya peningkatan keperluan subsidi sedia ada berhubung petrol, diesel, *Liquefied Petroleum Gas* (LPG) dan minyak masak. Di samping itu, Kerajaan juga telah

memperkenalkan subsidi baharu untuk tahun 2022 berhubung dengan elektrik serta ayam dan telur.

Untuk makanan, dalam Bajet 2022, Kerajaan hanya memperuntukkan RM40 juta untuk subsidi tepung gandum. Berikutan kenaikan harga makanan asas, Kerajaan telah meluluskan subsidi ayam dan telur dari Februari hingga Ogos bernilai RM1.1 bilion. Pemberian Kerajaan ini berdasarkan kepada keprihatinan untuk membantu meringankan kos sara hidup rakyat. Di samping itu, Kerajaan telah menambahbaik Bantuan Keluarga Malaysia (BKM) yang bernilai RM8 bilion dan dinikmati 8.6 juta penerima dengan bantuan tunai tambahan bernilai RM630 juta bagi membantu golongan B40 menghadapi kenaikan kos makanan asas pada separuh tahun kedua 2022.

Pemberian dan pengagihan bantuan dan subsidi secara bersasar merupakan antara matlamat Kerajaan untuk membantu golongan yang benar-benar memerlukan serta mengurangkan ketirisan yang berlaku. Kerajaan juga akan mengkaji semula mekanisme subsidi petrol, diesel, LPG supaya dapat dilaksanakan dengan lebih bersasar dan menumpukan bantuan dan subsidi kepada golongan rentan dan mereka yang benar-benar memerlukan bantuan. Pelaksanaan subsidi secara bersasar dijangka dapat mengoptimumkan sumber kewangan Kerajaan dan penjimatan yang dicapai dapat diagihkan semula untuk program yang lebih berkesan menyumbang kepada kesejahteraan rakyat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

DARIPADA : TUAN CHONG CHIENG JEN (STAMPIN)

TARIKH : 20 JULAI 2022 (RABU)

SOALAN

TUAN CHONG CHIENG JEN (STAMPIN) minta **MENTERI PERTANIAN DAN INDUSTRI MAKANAN** menyatakan apakah kesan terhadap penternak ayam akibat daripada pelaksanaan Harga Maksimum Ayam dan Telur Ayam sepanjang 62 hari bermula 1 Julai 2022 dan adakah Kementerian akan memperuntukkan dana untuk menanggung kerugian mereka akibat pelaksanaan harga maksimum tersebut.

JAWAPAN

Tuan Yang di-Pertua,

Untuk makluman Ahli Yang Berhormat, pada 29 Jun 2022 Kerajaan memutuskan untuk tidak mengapungkan harga ayam dan telur serta menetapkan harga siling baharu mulai 1 Julai sehingga 31 Ogos 2022 kepada kedua-dua komoditi berkenaan seperti berikut:

- (i) harga siling runcit ayam standard pada kadar RM9.40 sekilogram; dan
- (ii) harga siling runcit ayam telur pada kadar RM0.45 sebiji bagi gred A, RM0.43 sebiji bagi gred B dan RM0.41 sebiji bagi gred C.

Kerajaan juga bersetuju untuk melanjutkan tempoh pemberian subsidi dalam tempoh yang sama iaitu RM1.20 sekilogram kepada penternak ayam pedaging dan RM0.03 sebiji kepada penternak ayam penelur.

Kerajaan telah memperuntukkan subsidi sebanyak RM369.5 juta bermula 1 Julai 2022 hingga 31 Ogos 2022. Manakala jumlah subsidi yang diperuntukkan bagi tempoh 5 Februari 2022 hingga 30 Jun 2022 adalah sebanyak RM730 juta. Ini menjadikan jumlah subsidi yang diluluskan sejak 5 Februari 2022 adalah sebanyak RM1.1 bilion. Setakat 15 Julai 2022, sebanyak 7,680 permohonan subsidi telah diluluskan berjumlah RM632.6 juta.

Kerajaan telah melaksanakan langkah intervensi melalui pemberian subsidi kepada penternak bagi meringankan beban penternak yang berhadapan dengan kenaikan kos pengeluaran ayam. Langkah intervensi ini diharap dapat menstabilkan kembali bekalan sekaligus memastikan Keluarga Malaysia dapat membeli ayam dan telur dengan harga yang berpatutan dan tidak terbeban dengan cabaran kos sara hidup.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' JOHARI BIN ABDUL
[SUNGAI PETANI]**

TARIKH : 20 JULAI 2022 (RABU)

SOALAN

DATO' JOHARI BIN ABDUL [SUNGAI PETANI] minta **MENTERI KANAN PENDIDIKAN** menyatakan berapa jumlah unit Kuarters Kementerian Pendidikan yang telah diambil alih, di mana dan berapa anggaran kos bagi memperbaiki kerosakan kuarters ini.

JAWAPAN

Tuan Yang di-Pertua,

Untuk makluman Ahli Yang Berhormat, jumlah keseluruhan kuarters di bawah seliaan Kementerian Pendidikan Malaysia (KPM) adalah sebanyak 47,947 unit di seluruh Malaysia termasuk di Sabah dan Sarawak.

Dalam memastikan kuarters digunakan secara optimum, KPM telah mengambil dua pendekatan iaitu menyelenggara kuarters guru berpenghuni dan mengoptimumkan penggunaan kuarters guru yang kosong. Sehingga bulan Jun 2022, KPM telah memperuntukkan sebanyak RM17.6 juta untuk menyelenggara kuarters KPM yang mendapat permintaan untuk diduduki di seluruh negara. Manakala, bagi tahun 2021 peruntukan penyelenggaraan kuarters adalah sebanyak RM29.2 juta.

Sebagai langkah mengoptimumkan penggunaan kuarters guru yang kosong, KPM telah melaksanakan pelbagai pendekatan termasuk menyewa kepada pihak luar. Dari tahun 2011 sehingga 2021, KPM telah menyewakan sebanyak 566 unit kuarters kosong di negeri Pulau Pinang, Kedah, Perak dan Perlis kepada agensi awam dan swasta. Daripada jumlah tersebut, sebanyak 478 unit kuarters disewakan kepada universiti awam dan swasta, manakala sebanyak 88 unit kuarters disewakan kepada syarikat swasta. Kuarters yang disewa ini adalah untuk penginapan pelajar dan pekerja.

KPM juga telah meluluskan sebanyak enam unit kuarters untuk ditukar fungsi kepada pejabat operasi Jabatan Pertahanan Awam (JPAM) dan Taska KEMAS. Sementara 38 kuarters lagi telah ditukar fungsi kepada stor penyimpanan fail, peralatan sukan, bilik pengajaran dan pembelajaran, galeri seni, surau, bengkel, pejabat pentadbiran, koperasi sekolah dan lain-lain lagi. Mulai Januari hingga Julai 2022, sebanyak tiga unit kuarters guru telah diluluskan tukar fungsi kepada bilik pendidikan khas, bilik kokurikulum dan koperasi.

SOALAN NO : 123

Di samping itu, kerjasama dengan kementerian lain turut diadakan bagi membenarkan kakitangan daripada kementerian berkenaan untuk menduduki kuarters KPM. Data sehingga 30 Jun 2022, sebanyak 352 unit kuarters dihuni oleh kakitangan selain daripada KPM seperti Jabatan Bomba dan Penyelamat Malaysia, klinik kerajaan dan Jabatan Pendidikan Politeknik dan Kolej Komuniti.

Selain itu, KPM juga telah melaksanakan tukar Kementerian Jabatan Pengguna (KJP) kuarters kepada Kementerian Pertahanan (MINDEF). Pertukaran KJP ini melibatkan 80 unit Kuarters Institusi Pendidikan (KIP) Bukit Kayu Hitam untuk penempatan Rumah Keluarga Angkatan Tentera (RKAT) Batalion-5 Rejimen Sempadan, Kem Bukit Kayu Hitam pada tahun 2015.

KPM terus komited untuk memastikan kuarters KPM dapat dioptimumkan penggunaannya berdasarkan kepada pelan tindakan strategik yang telah dirangka.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DR. AZMAN BIN ISMAIL [KUALA KEDAH]

TARIKH : 20 JULAI 2022 (KHAMIS)

SOALAN

DR. AZMAN BIN ISMAIL [KUALA KEDAH] minta **MENTERI KANAN PENDIDIKAN** menyatakan langkah-langkah Kementerian di dalam memastikan bahawa penilaian pelajar sekolah yang dilakukan oleh guru-guru berlaku secara profesional, objektif serta adil khususnya bagi komponen penilaian yang melibatkan peperiksaan penting bertaraf nasional di sekolah rendah dan menengah.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa melaksanakan penambahbaikan kepada sistem pentaksiran dan penilaian murid seiring dengan keperluan semasa. Dalam Sistem Pentaksiran Pendidikan Kebangsaan, murid ditaksir melalui Pentaksiran Berasaskan Sekolah (PBS) dan Peperiksaan Pusat.

Berikutan pemansuhan Ujian Pencapaian Sekolah Rendah (UPSR) mulai tahun 2021 dan Pentaksiran Tingkatan Tiga (PT3) mulai tahun 2022, KPM memberi tumpuan kepada pemeraksanaan PBS, melibatkan komponen Pentaksiran Bilik Darjah (PBD), Pentaksiran Aktiviti Jasmani, Sukan dan Kokurikulum (PAJSK) serta Pentaksiran Psikometrik (PPSi).

Untuk makluman Ahli Yang Berhormat, PBS telah diperkenalkan lebih 10 tahun yang lalu, iaitu mulai tahun 2011 di peringkat sekolah rendah dan tahun 2012 di peringkat sekolah menengah. Pentaksiran ini bertujuan untuk

menilai aspek intelek, emosi, rohani, jasmani dan sosial selaras dengan Falsafah Pendidikan Kebangsaan.

Dalam konteks PBD, guru memantau perkembangan, kemajuan dan penguasaan setiap murid dalam proses pembelajaran mereka termasuk kemahiran asas membaca, menulis dan mengira (3M). Dengan ini, guru boleh merancang dan mengubah suai kaedah Pengajaran dan Pembelajaran (PdP) bagi membantu setiap murid meningkatkan tahap penguasaan pembelajaran mereka. Pelaksanaan PBD secara berterusan dapat mempersiapkan murid dengan pengetahuan, kemahiran dan nilai sebagai asas yang kukuh untuk mengikuti pembelajaran di peringkat seterusnya.

Antara pendekatan dalam pengukuhan PBD bagi murid Tahun 4 hingga Tingkatan 3 mulai tahun 2022 adalah dengan menambah baik pengurusan ujian akhir sesi akademik melalui penyediaan soalan yang setara standardnya oleh KPM. Soalan tersebut disediakan oleh guru yang berkepakaran dalam pembinaan item dan disimpan dalam sistem bank soalan yang dibangunkan oleh KPM.

Untuk tujuan pelaksanaan ujian akhir sesi akademik, pihak sekolah akan menjana set soalan daripada sistem tersebut dan ditadbir di sekolah seperti mana ujian akhir tahun sebelum ini. Panduan penskoran juga akan disediakan untuk kemudahan guru.

Penambahbaikan kepada ujian akhir sesi akademik ini adalah bagi membolehkan guru dan ibu bapa bersama-sama membantu membangunkan potensi murid bermula daripada peringkat sekolah rendah. Dalam mencapai hasrat ini, pelaporan ujian akhir sesi akademik akan digunakan untuk membolehkan intervensi awal dilakukan bagi mengoptimumkan potensi murid. Pelaporan ini bukan untuk tujuan perbandingan pencapaian antara murid atau sekolah.

Untuk makluman Ahli Yang Berhormat, kejayaan dan kemenjadian murid haruslah dilihat secara holistik dan bukan semata-mata berdasarkan prestasi dalam bidang akademik sahaja. Justeru, pentaksiran melalui PAJSK dan PPSi juga diperkukuh bagi menilai perkembangan murid dalam aspek sukan, kokurikulum, nilai murni, minat dan kecenderungan serta

pembentukan sahsiah.

KPM juga akan menambah baik dan memantapkan kaedah pelaporan PBD. Melalui kaedah ini, pencapaian murid dilaporkan secara menyeluruh sebanyak dua kali setahun iaitu pada pertengahan sesi akademik dan akhir sesi akademik dengan menggunakan deskriptor tahap penguasaan yang komprehensif dan jelas. Pelaporan ini juga menilai tahap usaha murid dalam pembelajaran. Di samping itu, guru kelas dan guru mata pelajaran akan memberi ulasan dan cadangan intervensi bagi mengoptimumkan potensi murid.

Selain daripada pelaporan PBD, laporan akhir sesi akademik akan turut disertakan dengan pelaporan PAJSK dan PPSi. Secara keseluruhan, penambahbaikan pelaporan PBS dapat memberi gambaran mengenai kemenjadian murid secara menyeluruh, komprehensif dan bermakna. Pemerkasaan PBS merupakan antara pendekatan KPM untuk beralih daripada pembelajaran berorientasi peperiksaan kepada pembelajaran yang lebih menyeronokkan untuk murid.

Selain itu, KPM juga mempergiatkan program latihan untuk pentadbir dan guru bagi meningkatkan kemahiran serta memantapkan pelaksanaan pentaksiran berterusan di sekolah. Guru juga akan terus dilatih untuk meningkatkan inovasi dan kreativiti dalam pengajaran dan pembelajaran termasuk penggunaan teknologi digital.

Bagi memastikan guru-guru dapat melaksanakan PBD secara profesional, objektif serta adil, maka penjaminan kualiti yang terdiri daripada empat proses iaitu pementoran, pemantauan, penyelarasan dan pengesanan (4P) turut dilaksanakan. Penjaminan kualiti merupakan piawaian untuk menentukan kualiti pelaksanaan PBD mengikut garis panduan yang ditetapkan. Dalam hal ini, kualiti hendaklah menjadi keutamaan dalam semua aspek dan peringkat pentaksiran sama ada di sekolah rendah atau menengah. KPM komited memastikan penjaminan kualiti diberi keutamaan dalam semua aspek dan peringkat pentaksiran bagi memastikan guru dapat melaksanakan pentaksiran secara profesional, objektif serta adil. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : LISAN

**DARIPADA : PUAN HAJAH FUZIAH BINTI SALLEH
(KUANTAN)**

TARIKH : 20 JULAI 2022 (RABU)

SOALAN

PUAN HAJAH FUZIAH BINTI SALLEH (KUANTAN) minta **MENTERI
PEMBANGUNAN WANITA, KELUARGA DAN MASYARAKAT**
menyatakan:-

- (a) jumlah Taman Asuhan Kanak-Kanak (TASKA) di rumah yang telah berjaya didaftarkan bagi tempoh bermula Januari 2022 sehingga Jun 2022 mengikut bulan dan adakah insentif disediakan bagi yang berjaya didaftarkan; dan
- (b) apakah tindakan susulan pihak Kementerian yang akan dilaksanakan ke atas taska yang tidak berdaftar.

JAWAPAN (a)

Tuan Yang di-Pertua,

Kementerian Pembangunan Wanita, Keluarga dan Masyarakat amat memandang serius terhadap pendaftaran TASKA kerana ia melibatkan keselamatan dan kesejahteraan kanak-kanak yang dihantar ke TASKA.

Sehingga Jun 2022, sebanyak 392 buah TASKA di Rumah telah dikenalpasti untuk didaftarkan di bawah Akta Taman Asuhan Kanak-Kanak 1984. Pendaftaran TASKA ini adalah tertakluk kepada syarat dan peraturan yang telah ditetapkan oleh pihak berkuasa tempatan, Jabatan Kesihatan Negeri dan Jabatan Bomba dan Penyelamat.

Bagi tempoh Januari hingga Jun 2022, tiada insentif yang diberikan kepada pengusaha TASKA. Namun begitu, terdapat beberapa insentif yang diberikan oleh Kerajaan kepada TASKA yang berdaftar di bawah Jabatan Kebajikan Masyarakat sebelum ini. Antaranya ialah:

1. Pada tahun 2020, Bantuan Khas kepada pengusaha TASKA yang terkesan dengan Perintah Kawalan Pergerakan di bawah insentif Pelan Jana Semula Ekonomi Negara (PENJANA) sebanyak RM1,500 bagi setiap TASKA di Rumah yang berdaftar; dan
2. Pada tahun 2021, Bantuan Khas kepada pengusaha TASKA yang terkesan dengan Perintah Kawalan Pergerakan di bawah insentif Pakej Perlindungan Rakyat Dan Pemulihan Ekonomi (PEMULIH) sebanyak RM800 kepada setiap TASKA di Rumah yang berdaftar dengan JKM.

JAWAPAN (b)

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat Malaysia (JKM) telah diberi tanggungjawab untuk menguatkuasakan Akta Taman Asuhan Kanak-Kanak 1984 [*Akta 308*] dan Peraturan-Peraturan Taman Asuhan Kanak-Kanak 2012.

Kementerian Pembangunan Wanita, Keluarga dan Masyarakat melalui Jabatan Kebajikan Masyarakat juga sentiasa giat menggerakkan usaha pendaftaran TASKA dengan memperkenalkan Kempen Jom Daftar yang bertujuan meningkatkan kesedaran ibu bapa dan masyarakat tentang kepentingan TASKA berdaftar.

Kempen Jom Daftar ini memberi peluang kepada semua TASKA yang belum berdaftar untuk mendapatkan khidmat nasihat berhubung pendaftaran TASKA daripada JKMM dan agensi teknikal yang terlibat.

Seksyen 6 (1) Akta Taman Asuhan Kanak-Kanak 1984 memperuntukan tiada seorang pun boleh menjalankan atau mengambil bahagian dalam pengurusan suatu taman asuhan kanak-kanak yang tidak didaftarkan di bawah peruntukan Akta ini.

Terdapat tiga (3) tindakan penguatkuasaan yang boleh diambil ke atas TASKA tidak berdaftar iaitu lak atau sita di bawah seksyen 20A, kompaun di bawah seksyen 21A dan menjalankan pendakwaan di mahkamah di bawah seksyen 21. Sejak tahun 2020 sehingga Mei 2022, 13 buah TASKA tidak berdaftar telah diambil tindakan dengan jumlah kompaun/dakwa sebanyak RM38,100.00.

Jika sabit kesalahan, pengusaha Taman Asuhan Kanak-Kanak (TASKA) berkenaannya boleh didenda tidak lebih RM10,000 atau di penjara tidak lebih 2 tahun atau kedua-duanya sekali di bawah seksyen 6(2).

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN OSCAR LING CHAI YEW [SIBU]
TARIKH : 20 JULAI 2022 (RABU)

SOALAN

TUAN OSCAR LING CHAI YEW [SIBU] minta **MENTERI KEWANGAN** menyatakan tentang keadaan kadar inflasi dalam Malaysia dan juga perbandingannya dengan negara-negara jiran kita. Adakah Malaysia dalam landasan yang betul untuk menangani masalah inflasi ini.

JAWAPAN

Tuan Yang di-Pertua,

Tekanan inflasi pada tahun 2022 merupakan fenomena global selaras dengan harga minyak mentah Brent yang kekal melebihi USD100 se tong semenjak hujung Mac 2022. Gangguan rantai bekalan dunia yang telah menjejaskan bekalan baja dan makanan ternakan juga telah meningkatkan harga makanan dengan mendadak. Sebagai sebuah ekonomi yang terbuka, Malaysia tidak terkecuali daripada tekanan inflasi global. Ini bermakna, kenaikan harga barangan sukar untuk dielakkan sepenuhnya. Namun begitu, Kerajaan sentiasa prihatin terhadap peningkatan kadar inflasi yang menimbulkan keresahan dalam kalangan rakyat dan perniagaan serta terus memantau perkembangan ekonomi global semasa.

Berdasarkan data terkini, kadar inflasi untuk bulan Mei 2022 mencatat 2.8 peratus, didorong oleh kumpulan makanan dan minuman bukan alkohol (5.2%), pengangkutan (3.9%) dan restoran dan hotel (3.7%). Manakala pada bulan yang sama, kadar inflasi di negara maju seperti Amerika Syarikat dan United Kingdom mencecah 9 peratus, manakala Thailand adalah 7 peratus dan Singapura dan Filipina melebihi 5 peratus.

Kadar inflasi yang sederhana ini adalah berikutan kawalan harga ke atas barangan dan perkhidmatan terpilih khususnya melalui pemberian subsidi harga bahan api dan makanan terpilih serta rebat elektrik untuk pengguna domestik.

Tuan Yang di-Pertua,

Sebagai langkah jangka pendek untuk menangani peningkatan inflasi dalam negara sekaligus mengurangkan kos sara hidup rakyat akibat kenaikan harga yang ketara, Kerajaan telah dan akan terus melaksanakan langkah seperti mengawal harga barangan dan perkhidmatan keperluan khususnya melalui penyaluran pelbagai subsidi bagi menstabilkan harga barangan asas. Berikutan dasar tersebut,

tanggungan bantuan dan subsidi penggunaan untuk tahun 2022 diunjurkan mencecah RM77.7 bilion iaitu peningkatan mendadak berbanding dengan peruntukan yang diluluskan dalam Bajet 2022 sebanyak RM31 bilion. Peningkatan subsidi merupakan jumlah yang ditanggung oleh Kerajaan bagi melindungi isirumah daripada lebih terkesan berikutan peningkatan harga dan inflasi global.

Bantuan tunai juga masih diteruskan dan ditambahbaik kepada golongan yang memerlukan untuk meringankan beban kos sara hidup mereka. Sebagai contoh, Bantuan Keluarga Malaysia (BKM) bernilai 8 bilion ringgit dijangka memanfaatkan 8.6 juta penerima. Selain itu, Kerajaan turut mengumumkan bantuan tunai tambahan 630 juta ringgit mulai 27 Jun 2022 bagi membantu menampung kenaikan harga makanan asas seperti ayam dan telur pada bulan Julai 2022.

Selain itu, produktiviti pengeluaran juga akan diberi perhatian bagi memastikan pengeluar mempunyai keupayaan dan daya saing untuk menghasilkan produk mereka dalam pasaran tempatan sekaligus membantu menstabilkan penawaran untuk memenuhi permintaan yang dijangka meningkat susulan pembukaan ekonomi pasca Covid-19.

Namun demikian, dari sudut pengurusan fiskal yang mampan untuk jangkamasa panjang, pemberian subsidi yang lebih bersasar perlu dilaksanakan agar perbelanjaan Kerajaan dilaksanakan secara cekap dan berkesan khususnya dalam memastikan kedudukan kewangan Kerajaan kekal kukuh, seterusnya dapat menyediakan ruang fiskal yang mencukupi dalam menghadapi sebarang krisis pada masa hadapan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SYED ABU HUSSIN BIN HAFIZ
SYED ABDUL FASAL (BUKIT GANTANG)**

TARIKH : 20 JULAI 2022 (RABU)

SOALAN

DATO' SYED ABU HUSSIN BIN HAFIZ SYED ABDUL FASAL (BUKIT GANTANG) minta **MENTERI TENAGA DAN SUMBER ASLI** menyatakan langkah yang dilaksanakan Kementerian bagi menambah baik ekosistem dan biodiversiti bagi kawasan Kuala Sepetang dan Trong serta usaha yang dimainkan oleh Kementerian dalam Kempen Penanaman 100 Juta Pokok di kawasan ini. Kedua-dua kawasan ini mempunyai jenis baka dan pokok paya bakau yang terbaik di dunia.

JAWAPAN

Tuan Yang di-Pertua,

1. Untuk makluman Ahli Yang Berhormat, antara usaha yang dilaksanakan Kementerian Tenaga dan Sumber Asli (KeTSA) dalam menambahbaik ekosistem dan biodiversiti di kawasan Kuala Sepetang dan Trong adalah melalui pelaksanaan penanaman pokok spesies-spesies hutan paya laut dan Program *Communication, Education and Public Awareness* (CEPA) yang melibatkan komuniti masyarakat, badan bukan kerajaan (NGO), pelajar dan pelbagai agensi. Selain itu, Jabatan Perhutanan Semenanjung Malaysia (JPSM) melalui Jabatan Perhutanan Negeri Perak juga telah menyediakan Rancangan Kerja Hutan Paya Laut Matang bagi tahun 2020 hingga 2029. Rancangan Kerja Hutan Paya Laut Matang ini disediakan bertujuan untuk dijadikan rujukan rasmi dalam merancang, menilai, mengurus dan mengawal selia Hutan Paya Laut

Matang serta menyokong pengurusan yang efektif bagi Unit Pengurusan Hutan Negeri Perak.

3. Selain itu, KeTSA melalui JPSM dan Jabatan Perhutanan Negeri Perak juga telah melaksanakan pelbagai aktiviti di bawah Program Penghijauan Malaysia: Kempen Penanaman 100 Juta Pokok di kawasan ini. Sebanyak 1,226,861 pokok merangkumi dua spesies iaitu Bakau Minyak dan Bakau Kurap telah ditanam di kawasan ini sejak pelancaran kempen pada 5 Januari 2021. Di samping itu, antara aktiviti utama lain yang telah dijalankan adalah seperti berikut:

- (i) Program penanaman bersama Ahli Mesyuarat Bersama Jabatan (MBJ) Ibu Pejabat JPSM di Pusat Eko Pelajaran Hutan Paya Laut Matang, Kuala Sepetang, Perak pada 9 November 2021. Program ini melibatkan penanaman sebanyak 200 pokok daripada 60 orang peserta;
- (ii) Program penanaman pokok sempena lawatan Tuan Yang Terutama Duta Jerman ke Malaysia di Pusat Eko Pelajaran Hutan Paya Laut Matang, Kuala Sepetang, Perak pada 19 November 2021. Program ini melibatkan penanaman sebanyak 20 pokok daripada 20 orang peserta;
- (iii) Program Penyemaian Benih Bakau bersama Hospital KPJ Taiping Sempena Hari Alam Sekitar Sedunia di Pusat Eko Pelajaran Kuala Sepetang, Matang, Perak pada 2 Julai 2022. Program ini melibatkan penanaman sebanyak 500 pokok daripada 20 orang peserta; dan
- (iv) Program Penghijauan Malaysia: Kempen Penanaman 100 Juta Pokok sempena Program Mesra Rakyat Keluarga Malaysia (Zon Tengah), KeTSA. Program ini melibatkan penanaman sebanyak 303 pokok daripada 30 orang peserta. Selain itu, JPSM melalui Jabatan Perhutanan Negeri Perak juga mengagihkannya sebanyak 50 pokok Bidara kepada masjid-masjid dan surau-surau di Kampung Sungai Tinggi, Trong, Perak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN WONG KAH WOH [IPOH TIMUR]
TARIKH : 20 JULAI 2022 (RABU)

SOALAN

TUAN WONG KAH WOH [IPOH TIMUR] minta **MENTERI KEWANGAN** menyatakan jumlah penerima manfaat di bawah Program MySalam sejak pelaksanaannya (mengikut tahun) dan jumlah pampasan yang telah diberikan setakat kini. Sama ada Kerajaan bercadang untuk meluaskan pelaksanaan program ini kepada golongan M40.

JAWAPAN

Tuan Yang di-Pertua,

Untuk makluman Ahli Yang Berhormat, 6,000 orang telah menerima manfaat Skim mySalam pada tahun 2019 dengan jumlah tuntutan dibayar yang melibatkan manfaat hospitalisasi dan penyakit kritikal adalah lebih daripada RM11.5 juta.

Pada tahun 2020, jumlah tuntutan yang dibayar meningkat dengan ketara kepada RM99.3 juta yang melibatkan pembayaran kepada lebih 86,000 orang. Peningkatan ini juga adalah selaras dengan keputusan Kerajaan untuk meluaskan pelaksanaan Skim mySalam kepada golongan B40 yang dihospitalisasi sebagai pesakit COVID-19 dan yang di bawah siasatan (PUI COVID-19).

Bagi tahun 2021 pula, seramai 360,000 orang telah menerima manfaat mySalam dengan jumlah tuntutan dibayar lebih daripada RM254.7 juta. Manakala bagi tahun 2022 sehingga 30 Jun, lebih 400,000 orang telah menerima manfaat mySalam dengan tuntutan dibayar adalah lebih daripada RM227.5 juta.

Kerajaan tidak bercadang untuk meluaskan Skim mySalam kepada golongan M40 kerana memberi keutamaan kepada menambahbaik liputan dan manfaat Skim mySalam kepada golongan sasaran iaitu B40.

Untuk makluman Yang Berhormat,

Pertama, perluasan kepada golongan M40 tidak dapat dibuat kerana Surat Ikatan Amanah Skim mySalam jelas menetapkan manfaat Skim tersebut hanya diberikan kepada golongan B40 sahaja.

Kedua, Kerajaan telah memperluaskan liputan Skim mySalam di kalangan B40 dengan meningkatkan nilai ambang pendapatan isirumah daripada RM4,000 kepada RM5,000 bulanan dan juga merangkumi golongan belia di bawah 40 tahun. Dengan itu, Skim mySalam pada tahun 2022 memberi perlindungan kepada lebih 10.2 juta golongan B40 berbanding dengan 4.7 juta pada tahun 2019.

Ketiga, Kerajaan telah menambahbaik manfaat yang diterima oleh B40 di bawah skim mySalam melalui memanjangkan manfaat kepada PUI COVID-19 serta bantuan peranti perubatan, termasuk untuk tanggungan penerima BKM.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : TUAN LIM LIP ENG [KEPONG]
TARIKH : 20 JULAI 2022 (RABU)

SOALAN

TUAN LIM LIP ENG [KEPONG] minta **MENTERI KEWANGAN** menyatakan senarai 20 jumlah gaji dan elaun paling tinggi bagi syarikat berkaitan Kerajaan (GLC) dan syarikat pelaburan berkaitan Kerajaan (GLIC) tanpa menyebut nama individu dan jawatan mereka. Adakah Kerajaan berhasrat untuk membekukan semua kenaikan gaji dan elaun bagi pengurusan tertinggi GLC dan GLIC sehingga ekonomi negara kembali pulih.

JAWAPAN

Tuan yang di-Pertua,

Untuk makluman Yang Berhormat, penetapan gaji dan elaun di dalam syarikat berkaitan Kerajaan (GLC) dan syarikat pelaburan berkaitan Kerajaan (GLIC) adalah berdasarkan kepada beberapa kriteria utama seperti saiz syarikat, jenis perniagaan, status syarikat (tersenarai atau tidak tersenarai), kompleksiti tugas dan tanggungjawab serta lain-lain kriteria lagi. Selain itu, Kerajaan turut mengambil kira faktor kajian pasaran bagi memastikan gaji dan elaun yang ditetapkan berpadanan atau *mark-to-market*. Perkara ini penting bagi memastikan syarikat-syarikat berkenaan dapat mengekalkan bakat dan kemahiran kakitangan (*right talent and skill set*) selain dapat menarik bakat yang terbaik daripada pasaran untuk menyertai syarikat. Perkara ini penting bagi memastikan syarikat-syarikat berkaitan Kerajaan kekal berdaya saing terutamanya dalam mengharungi keadaan ekonomi ketika ini. Bagi GLC yang disenaraikan, butiran emolumen turut dilaporkan menerusi laporan tahunan mereka.

Sekian, terima kasih.

**PEMBERITAHUAN PERTANYAAN
DEWAN RAKYAT MESYUARAT KEDUA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN SYED SADDIQ BIN SYED ABDUL RAHMAN [MUAR]

TARIKH : 20 JULAI 2022 (RABU)

SOALAN

Tuan Syed Saddiq bin Syed Abdul Rahman [Muar] minta **MENTERI KOMUNIKASI DAN MULTIMEDIA** menyatakan status pemberian tablet Peranti Siswa yang akan diagihkan kepada mahasiswa pada Jun 2022. Adakah akan berlaku penangguhan dan perubahan lagi dalam proses pemberian ini. Mohon juga penjelasan Kerajaan:

- (a) berapa jumlah tablet yang telah diagihkan dan bakal diagihkan; dan
- (b) apa spesifikasi tablet yang telah diagihkan dan siapa yang telah menerima tablet yang diagihkan dan di mana mereka ditempatkan.

JAWAPAN

Tuan Yang Dipertua,

Untuk makluman Ahli Yang Berhormat, keputusan dan perincian mengenai pemberian tablet di bawah Inisiatif PerantiSiswa akan diumumkan oleh YB MenKOMM pada 4 Ogos 2022.

Sekian, terima kasih.